



Allah

"Risalatul Murid"

PETUNJUK
JALAN
THARIQAT

Oleh: Imam Habib Abdullah bin Alwi AlHaddad

“Risalutuf-Murid”

Petunjuk Jalan Thariqat

*Bagi sesiapa yang ingin memilih kebersihan dari kekotoran
dan Khas bagi Murid yang Mempunyai Keinginan Hakiki
Untuk Menuju Kepada Allah swt & Rasulullah saw*

Panduan yang harus dilaksanakan supaya tercapai maksud “Hati”

Oleh: Imam Habib Abdullah Alwi Haddad

Isi Kandungan

1.	<i>Pengantar Pentafsir.....</i>	5
2.	<i>Muqadimmah.....</i>	8
3.	<i>Pendahuluan.....</i>	9
4.	<i>Masalah Thariqat.....</i>	11
5.	<i>Bagaimana Memelihara Rahasia Kebatinan Itu?.....</i>	12
6.	<i>Taubat</i>	13
7.	<i>Memelihara Diri Dari Dosa.....</i>	15
8.	<i>Memelihara Hati.....</i>	16
9.	<i>Mencegah Seluruh Anggota Dari Maksiat.....</i>	18
10.	<i>Bencana Lisan.....</i>	19
11.	<i>Bencana Telinga Dan Mata.....</i>	20
12.	<i>Sentiasa Dalam Taharah.....</i>	22
13.	<i>Memperbanyak Yang Dianjurkan Dan Menjauhi Yang Dilarang.....</i>	23
14.	<i>Solat Tahajjud Di Tengah Malam.....</i>	27
15.	<i>Memelihara Solat Lima Waktu.....</i>	28
16.	<i>Roh Ibadat.....</i>	30
17.	<i>Melazimkan Jumaat Dan Jamaah.....</i>	32
18.	<i>Peranan Zikir.....</i>	34
19.	<i>Lazimkan Diri Bertafakur.....</i>	36
20.	<i>Bagaimana Menolak Sifat Malas Untuk Bertaat.....</i>	37
21.	<i>Jalan Menuju Kepada Allah.....</i>	43
22.	<i>Kategori Nafsu.....</i>	45
23.	<i>Ujian Hidup Fakir.....</i>	48
24.	<i>Pembahagian Rezeki.....</i>	51
25.	<i>Jangan Panjang Harapan.....</i>	56
26.	<i>Bersabar Terhadap Penganiayaan Orang.....</i>	57
27.	<i>Jangan Takutkan Manusia.....</i>	60
28.	<i>Mukasyafah (Pengingkapan) Rahasia.....</i>	68
29.	<i>Hakikat Keramat.....</i>	70
30.	<i>Sentiasa Menyangka Baik Terhadap Tuhan.....</i>	70
31.	<i>Hukum Mencari Reski.....</i>	75
32.	<i>Teman Yang Baik.....</i>	77
33.	<i>Perhubunganmu Dengan Seorang Syeikh.....</i>	79
34.	<i>Meletakkan Kepercayaan Kepada Syeikh.....</i>	80
35.	<i>Syeikh Yang Kamil.....</i>	84
36.	<i>Mencari Syeikh Yang Tulen.....</i>	85
37.	<i>Penutup Bicara.....</i>	87
38.	<i>Sifat Seorang Murid.....</i>	90

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ، وَلَا حَوْلَ وَلَا قُوَّةَ إِلَّا بِاللَّهِ، اللَّهُمَّ صَلِّ وَسَلِّمْ عَلَيَّ سَيِّدِنَا
مُحَمَّدٍ مِفْتَاحِ بَابِ رَحْمَةِ اللَّهِ، عَدَدَ مَا فِي عِلْمِ اللَّهِ، صَلَاةً وَسَلَامًا
دَائِمِينَ يَدْوَامِ مُلْكِ اللَّهِ، وَعَلَى آلِهِ وَصَحْبِهِ وَمَنْ وَاوَاهُ.



Pengantar Pentafsir:

Segala puji bagi Allah, tiada illah yang berhak disembah dengan sebenar melainkan Dia. Shalawat dan Salam semoga tercurah atas Penutup para Rasul dan Nabi, Muhammad saw, atas keluarga dan para sahabat serta orang-orang yang mengikuti mereka dengan baik sampai hari kemudian kelak.

Amma ba'du, Alhamdulillah, dengan rahmat pertolongan Allah dapat diakhiri penafsiran kitab "Risatul Murid" karangan Al-Quthb Aqthob Wal Ghouts Al-Habib Abdullah bin Alwi AlHaddad ra yang telah diterjemahkan bahasa oleh Syed Ahmad Semait. Kami mengucapkan syukur kepada Allah Taala yang telah memberi taufiq pada Syed Ahmad Semait didalam jasanya meluangkan masa sehingga selesailah terjemahan bahasa oleh beliau atas pertolongan dan keizinan dari Allah jua. Semoga Allah Taala merahmati beliau atas jasa dan niat baik beliau dan mengumpulkan beliau didalam kumpulan orang-orang yang 'bahagia'.

Dengan ini kami ingin mengambil kesempatan untuk mengenalkan sedikit tokoh yang agung bagi mereka yang belum mengenali beliau, walaupun kami yakin bahwa seluruh makhluk dibumi ini sudahpun mengenali latar belakang seorang manusia yang mencintai Allah dan RasulNya dan Allah serta RasulNya mencintai beliau ra.

Tentang Al-Habib Abdullah Al-Haddad;

Al-Arifbillah Quthbil Anfas Al-Imam Habib Umar bin Abdurrohman Al-Athos ra mengatakan; "Al-Habib Abdullah Al-Haddad ibarat pakaian yang dilipat dan baru dibuka di zaman ini, sebab beliau termasuk orang terdahulu, hanya saja ditunda kehidupan beliau demi kebahagiaan umat di zaman ini (abad 12 H)".

Al-Imam Arifbillah Al-Habib Ali bin Abdullah Al-Idrus ra mengatakan; "Sayyid Abdullah bin Alwy Al-Haddad adalah Sultan seluruh golongan Ba Alawy".

Al-Imam Arifbillah Muhammad bin Abdurrahman Madehej ra mengatakan; "Mutiara ucapan Al-Habib Abdullah Al-Haddad merupakan obat bagi mereka yang mempunyai hati cemerlang sebab mutiara beliau segar dan baru, langsung dari Allah swt. Di zaman sekarang ini jangan tertipu dengan siapapun, walaupun sudah melihat dia sudah memperlihatkan banyak melakukan amal ibadah dan menampakkan karamah, sesungguhnya orang zaman sekarang tidak mampu berbuat apa-apa jika mereka tidak berhubungan dengan Al-Habib Abdullah Al-Haddad kerana Allah swt telah menghibahkan kepada beliau banyak hal yang tidak mungkin dapat diukur."

Al-Imam Abdullah bin Ahmad Bafaqih ra mengatakan; "Sejak kecil Al-Habib Abdullah Al-Haddad bila matahari mulai menyising, mencari beberapa masjid yang ada di kota Tarim untuk sholat sunnah 100 hingga 200 raka'at kemudian berdoa dan sering membaca Yasin sambil menangis. Al-Habib Abdullah Al-Haddad telah mendapat anugerah (fath) dari Allah sejak masa kecilnya".

Sayyid Syaikh Al-Imam Khoir Al-Diin Al-Dzarkali ra menyebut Al-Habib Abdullah Al-Haddad sebagai fadhilun min ahli Tarim (orang utama dari Kota Tarim).

Al-Habib Muhammad bin Zein bin Smith ra berkata; “Masa kecil Al-Habib Abdullah Al-Haddad adalah masa kecil yang unik. Uniknya semasa kecil beliau sudah mampu membahaskan masalah-masalah sufistik yang sulit seperti mengaji dan mengkaji pemikiran Syaikh Ibnu Al-Faridh, Ibnu Aroby, Ibnu Athoilah dan kitab-kitab Al-Ghodzali. Beliau tumbuh dari fitrah yang asli dan sempurna dalam kemanusiaannya, wataknya dan kepribadiannya”.

Al-Habib Hasan bin Alwy bin Awudh Bahsin ra mengatakan; “Bahwa Allah telah mengumpulkan pada diri Al-Habib Al-Haddad syarat-syarat Al-Quthbaniyyah”.

Al-Habib Abu Bakar bin Said Al-Jufri ra berkata tentang majelis Al-Habib Abdullah Al-Haddad sebagai majelis ilmu tanpa belajar (ilmun billa ta’alum) dan merupakan kebaikan secara menyeluruh. Dalam kesempatan yang lain beliau mengatakan, “Aku telah berkumpul dengan lebih dari 40 Waliyullah, tetapi aku tidak pernah menyaksikan yang seperti Al-Habib Abdullah Al-Haddad dan tidak ada pula yang mengunggulinya, beliau adalah Nafs Rahmani, bahwa Al-Habib Abdullah Al-Haddad adalah asal dan tiada segala sesuatu kecuali dari dirinya”.

Seorang guru Masjidil Haram dan Nabawi, Syaikh Syihab Ahmad al-Tanbakati ra berkata; “Aku dulu sangat ber-ta’alluq (bergantung) kepada Sayyidi Syaikh Abdul Qadir Al-Jailani. Kadang-kadang dia nampak di hadapan mataku. Akan tetapi setelah aku ber-intima’ (condong) kepada Al-Habib Abdullah Al-Haddad, maka aku tidak lagi melihatnya. Kejadian ini aku sampaikan kepada Al-Habib Abdullah Al-Haddad. Beliau berkata; ‘Syaikh Abdul Qadir Al-Jailani di sisi kami bagaikan ayah. Bila yang satu ghaib (tidak terlihat), maka akan diganti dengan yang lainnya. Allah lebih mengetahui.’ Maka semenjak itu aku ber-ta’alluq kepadanya”.

Al-Habib Ahmad bin Zain Al-Habsyi ra; seorang murid Al-Habib Abdullah Al-Haddad yang mendapat mandat besar dari beliau, menyatakan kekagumannya terhadap gurunya dengan mengatakan, “Seandainya aku dan tuanku Al-Habib Abdullah Al-Haddad ziarah ke makam, kemudian beliau mengatakan kepada orang-orang yang mati untuk bangkit dari kuburnya, pasti mereka akan bangkit sebagai orang-orang hidup dengan izin Allah. Kerana aku menyaksikan sendiri bagaimana dia setiap hari telah mampu menghidupkan orang-orang yang bodoh dan lupa dengan cahaya ilmu dan nasihat. Beliau adalah lautan ilmu pengetahuan yang tiada bertepi, yang sampai pada tingkatan Mujtahid dalam ilmu-ilmu Islam, Iman dan Ihsan. Beliau adalah mujaddid pada ilmu-ilmu tersebut bagi penghuni zaman ini”.

Syaikh Abdurrahman Al-Baiti ra pernah berziarah bersama Al-Habib Abdullah Al-Haddad ke makam Sayidina Al-Faqih Al-Muqoddam Muhammad bin Ali Ba’Alawy, dalam hatinya terbetik sebuah pertanyaan ketika sedang berziarah, “Bila dalam sebuah majelis zikir para sufi hadir Al-Faqih Al-Muqaddam, Syaikh Abdurrahman Asseqaff, Syaikh Umar al-Mukhdar, Syaikh Abdullah Al-Idrus, Syaikh Abdul Qadir Al-Jailani dan yang semisal setara dengan mereka, mana diantara mereka yang akan berada di baris depan? Pada waktu itu guruku, Al-Habib Abdullah Al-Haddad, menyingkap apa yang ada dibenakku, kemudian dia mengatakan, ‘Saya adalah jalan keluar bagi mereka, dan tiada seseorang yang boleh masuk kepada mereka kecuali melaluiku.’ Setelah itu aku memahami bahwa beliau Al-Habib Abdullah Al-Haddad, adalah dari abad 2 H, yang diakhirkan kemunculannya oleh Allah swt pada abad ini sebagai rahmat bagi penghuninya”.

Al-Habib Ahmad bin Umar bin Semith ra. Mengatakan; “Bahwa Allah memudahkan bagi pembaca karya-karya Al-Habib Abdullah Al-Haddad untuk mendapat pemahaman (futuh), dan

berkah membaca karyanya Allah memudahkan segala urusannya agama, dunia dan akhirat, serta akan diberi 'Afiat (kesejahteraan) yang sempurna dan besar kepadanya".

Al-Habib Thohir bin Umar Al-Hadad ra. Mengatakan; "Semoga Allah mencurahkan kebahagiaan dan kelapangan, serta rezeki yang halal, banyak dan memudahkannya, bagi mereka yang hendak membaca karya-karya Al-Quthb Aqthob wal Ghouts Al-Habib Abdullah bin Alwy Al-Haddad ra".

Al-Habib Umar bin Zain bin Semith ra mengatakan bahwa seseorang yang hidup sezaman dengan Al-Habib Abdullah Al-Haddad ra; bermukim di Makkah, sehari setelah Al-Habib Abdullah Al-Haddad wafat, ia memberitahukan kepada sejumlah orang bahwa semalam beliau ra sudah wafat. Ketika ditanya darimana ia mengetahuinya, ia menjawab, "Tiap hari, siang dan malam, saya melihat beliau selalu datang berthawaf mengelilingi Ka'bah (padahal beliau berada di Tarim, Hadhramaut). Hari ini saya tidak melihatnya lagi, kerana itulah saya mengetahui bahwa beliau sudah wafat".

Alhamdulillah, semoga karangan beliau ini dapat dijadikan pedoman bagi sesiapa yang benar-benar mempunyai keinginan yang hakiki untuk menempuh jalan para salaf yang terdahulu dan semoga Allah Taala melimpahkan futuh (kepahaman) dan juga dapat mengamalkan segala garis pandu dari beliau atas pertolongan dan keizinan dari Allah Taala Yang Maha Pengampun Lagi Maha Permudahkan. Kami yakin, bahwa Allah Taala tidak akan menghampakan hamba-hambanya yang benar-benar ingin berhijrah pada Allah dan RasulNya dan sesungguhnya Allah Taala tidak pernah menghampakan hamba-hambanya! Semoga Allah Taala memberikan nihayahNya pada para pembaca khususnya bagi para salik untuk mencapai niat hati.

Semoga Allah Taala dengan keredhaanNya dapat mengumpulkan kita semua didalam golongan hamba-hambanya yang 'bahagia' dan menerima keampunan kita semua. Amin Ya Rabbal Alamin.

Kami sedekahkan segala kebaikan-kebaikan pada Guru, Kedua IbuBapa, Keluarga dan sekalian Kaum Muslimin dan kami redha menerima segala kesalahan-kesalahan yang terdapat dalam penafsiran kitab ini. Yang sempurna itu dari Allah dan yang buruk itu dari diri kami sendiri.

Kami mohon maaf diatas kekurangan-kekurangan dan kesalahan yang timbul disana-sini. Sebagai manusia kami tentunya tidak dapat terlepas dari kesalahan dan kekeliruan. Oleh kerana itu kami mengharapkan teguran dan pembetulan para pembaca sekalian untuk lebih menyempurnakan kitab Risalutul Murid ini. Kerana kitab-kitab dari para salaf seperti ini merupakan perbendaharaan yang sangat berharga bagi kaum muslimin, khususnya bagi anak cucu kita dan generasi dimasa mendatang.

Mudah-mudahan amal ini menjadi amal sholeh bagi kita semua, pada hari yang tiada lagi berguna harta dan keturunan kecuali orang-orang yang datang menemui Allah dengan hati yang salim.

Sesungguhnya Allah Taala Maha Berkuasa atas segala sesuatu.

Faqir ila Rabbihi Al-Jalil

Muqadimmah:

Keterangan:

“Alhamdulillah dengan Inayah dan TaufiqNya dimana peraturan dan garisan bagi murid AlHaq yang di ambil dari terjemahan buku “Risalatul Murid – Jalan Petunjuk Thariqat” oleh Imam Habib Abdullah Bin Alwi AlHaddad bagi murid murid mempunyai keinginan yang hakiki untuk mencapai maksud “Hatinya” yang tidak bercampur baur oleh selain daripadaNya.

Risalah kecil ini termuat Ilmu Thariqat untuk salik yang menuntut IlmuThariqat sebagai pedoman di mana akan di sampaikan cara cara khususnya bagi murid murid yang hakiki sahaja supaya tercapai maksud hati mereka dengan Inayah dan Taufiq dari Allah swt dan RasulNya saw”.

Siapakah Ahli Ahli Thariqat?

“Sesiapa saja yang ingin memilih kebersihan dari yang kotor, ingin menyeduk yang jernih dari yang keladak dalam mengarahkan diri menuju ke jalan akhriat, jalan yang penuh dengan ranjau dan duri, jalan tempat semua manusia diduga dan diuji, siapa diantara mereka yang dapat melaksanakan peraturan dan mengerjakan amalan yang sholeh, sehingga Malaikat Maut datang menjemputnya dengan lemah lembut diiringi dengan niat yang baik dari mereka itu ‘untuk membawa mereka keHadirat Allah saw’, dimana dalam meninggalkan dunia ini yang fana dan memperolehi ‘Husnul – Khatimah’, iaitu suatu keuntungan yang amat besar. Insyallah.

*Sesiapa yang tidak ada keinginan untuk memilih kebersihan dari yang kotor maka **jangan** membaca risalah kecil ini kerana akan membuang masa mereka saja. Tetapi bagi mereka yang ingin mengetahui lebih lanjut dimana Hatinya berdetik untuk meneruskan pembacaannya akan isi kandungan, peraturan dan garisan yang termuat didalamnya. Mudah mudahan mereka dapat Inayah daripada Allah swt dan RasulNya. Amin.*

Harus dipahami bahwa ketentuan dari Allah swt pasti berlaku atas sesiapa yang menceburkan diri di dalam Ilmu Thariqat. Khabar ini bukan untuk menakutkan mereka yang pertama kali menceburkan diri di dalam mengikuti peraturan dan garisan, penuh dengan ujian dan cubaan kerana Allah swt melihat akan kedalaman Hati (niat sebenar) seseorang samada Cinta, Kasih, Sayang dan menyerahkan Jiwa Raganya kepada yang Memiliki, Menghidupkan dan Mematikan dirinya bukan selain daripadaNya”.

Seterusnya perhatikan di sini akan pengertian Murid dan Syeikh

“Murid bukanlah pelajar di bangku sekolah bahkan maksudnya ialah seseorang yang mencari pemimpin ke jalan Allah menerusi seorang Syeikh. Sedangkan Syeikh pula ialah Gurunya atau Pemimpinnya dimana diambil pelajaran, samada dengan cara biasa: iaitu belajar, ataupun dengan cara luar biasa iaitu: menerusi pandangan seorang guru yang ada kalanya dengan berhadapan muka dan ada kalanya menerusi pandangan Hati.

Ilmu ini ialah Ilmu yang khusus yang diberikan oleh Allah swt kepada para kekasih dan para pencari dan bukan ilmu yang boleh dibelajar menerusi seorang guru ataupun dapat diterangkan selok-beloknya didalam sebuah buku, sebagaimana umumnya berlaku kepada ilmu zahir. Orang yang mengetahuinya hanya mereka yang telah mengalaminya saja, seperti

Auliya Allah, para Shiddiqin dan Sholihin; iaitu orang orang yang telah dikurniakan Allah kepada mereka Ilmu Kebatinan.

Semuga Allah swt mengurniakan kita semua TaufiqNya supaya dapat mencontohi perjalanan para Salaf Sholeh dan para Ulama Sholihin, supaya kita semua dilindungiNya dari segala cita cita yang tidak baik, dipeliharaNya dari segala bahaya dan malapetaka, sehingga terselamat di dunia dan di akhirat, sesungguhnya Dia Pemberi Taufiq dan Hadiyeh. Amin, Khair Insyallah”.

Pendahuluan:

Dengan nama Allah Maha Pengasih Maha Penyayang.
Tiada Daya dan Tiada Usaha melainkan dengan Izin Allah Maha Tinggi dan Maha Agung.

Alhamdulillah, segala puji bagi Allah yang dengan kehendakNya telah meletakkan “dorongan kemauan” di dalam hati para murid murid sebagai pencarinya. Insyallah dengan “dorongan kemauan” itu akan membimbing murid menuju ke jalan kebahagiaan; iaitu **“Jalan Iman dan Ibadah”** dan menolak segala keinginan untuk meninggikan diri dan mencari pangkat.

Keterangan:

“Yang di maksud “dorongan kemauan” dengan Qudrat dan Iradah Allah Taala yang terkandung di dalam IlmuNya menghulurkan tanganNya untuk menarik hambaNya diatas IradahNya. Kata “Dorongan” adalah seperti menghulurkan tangan (maha suci Allah daripapada mempunyai sifat seperti makhlukNya) untuk memimbing HambaNya menuju kepada Kehampiran denganNya iaitu Jalan Kebahagiaan. Kata “Kemauan” bermaksud dengan Iradah (kehendakNya) Allah Taala memilih Hamba pilihanNya untuk memimpin tangan HambaNya ke Jalan Kebahagiaan Dunia & Akhirat”. Masyallah, Subhanallah . . .

Yang di maksudkan “Jalan Iman dan Ibadah” adalah pegangan keimanan yang sangat kuat seolah olah dirinya dapat melihat Allah swt sebagai Tuhan yang disembah dan melaksanakan segala Ibadah mengikut jejak langkah para Salaf dengan berpandukan AlQuran dan Sunnah Rasul saw.

Perhatikan dengan teliti pemberian Allah Taala yang sungguh luarbiasa yang tidak dapat kita fikirkan dan rasakan, dimana Dia sendiri dengan sifat Kasih Sayang menjemput hamba hambaNya yang sedar akan adanya ‘dorongan kemauan’ di dalam hati mereka. Sesiapa yang menyedari ‘dorongan kemauan’ itu, sambutlah tanganNya dan terimalah panggilanNya dengan meletakkan dinding dinding besi yang kukuh dan kuat mengelilingi ‘dorongan kemauan’ tersebut daripada di ganggu oleh sesiapaapun juga.

Jika orang yang asyik mencari dunia, apatah lagi mengejarnya dengan penuh tenaga dan perhatian akan tersungkur ke dalam api neraka serta di timpa kecelakaan dan kehinaan dari penghuni bumi dan penghuni langit. Maka sewajarnya bagi orang yang waras akal fikiran membelakangkan dan memelihara diri daripada terperangkap dalam tarikan dunia dan isinya”.

Orang yang berkeinginan masuk surga tidak cukup hanya dengan “Angan Angan”, malah hendaklah disertakan dengan keimanan dan amal Sholeh.

Keterangan:

“Dengan berangan angan, seseorang tidak akan dapat memasuki surga bersama dengan Allah swt dan RasulNya saw tanpa Iman dan Amal Sholeh. Iman adalah keyakinan penuh dan Amal Sholeh dengan melaksanakan segala perintah dan menjauhi segala larangan Allah.

Bagi sesiapa yang dapat melaksanakannya akan memperoleh kepujian dan penghargaan daripada penghuni bumi dan penghuni langit dan diiringi oleh balasan pahala yang besar yang tidak akan berakhir dan putus dengan kemurahan dan rahmat Allah swt”.

Orang yang rugi adalah pencari dan pengejar dunia yang pasti mendapat ancaman daripada Allah Taala (*ini adalah jaminan daripada Allah Taala*) iaitu orang yang mencari dan mengejar dunia dengan penuh kemahuan yang melalaikan daripada beramal untuk akhirat (ya itu melaksanakan perintah dan menjauhi larangannya), samada dia tidak percaya tentang kehidupan di akhirat ataupun mempercayai tetapi tidak menyediakan dirinya untuk beramal.

“Siapakah Orang Yang Rugi?”

Orang yang rugi itu ada 2 jenis keadaan:

1. ***Tidak percaya tentang kehidupan di akhirat***, Maka dia adalah orang **Kafir** yang akan tinggal kekal di dalam api neraka.
2. ***Yang mempercayainya tetapi tidak membuat sebarang Amal untuk dirinya***, maka dia adalah seorang **Fasiq** yang telah di calonkan sebagai “bahan api neraka”. Nauzubillah min zalik.

Sabda Rasulullah saw;

“Sesungguhnya tiap tiap amal itu adalah dengan (beserta dengan) niat dan sesungguhnya bagi tiap manusia itu (balasan) apa yang telah diniatkan. Barangsiapa berhijrah (berpindah negeri) kerana Allah dan RasulNya maka hijrahnya itu kepada Allah dan RasulNya. Dan barangsiapa berhijrah kerana dunia yang dicarinya atau kerana seorang perempuan yang mahu dikhawininya, maka hijrahnya itu adalah kepada apa yang ia berhijrah kerananya”

Rasulullah saw telah mengajar kita bahwa tiap tiap amal itu tidak akan dikira melainkan dengan disertakan dengan niat. Setiap manusia akan diberi ganjaran dan balasan pahala menurut apa yang diniatkan, jika niatnya baik, maka baiklah balasanya; dan jika buruk, maka buruk pulalah balasanya.

Bila seseorang ada menyimpan niat yang buruk, tidak syak lagi amalnya juga akan menjadi buruk, meskipun pada zahir amalnya nampak baik. Umpama seorang yang mengerjakan amal baik kerana hendak menunjuk nunjuk kepada orang lain.

Nabi saw telah mengingatkan kita bahwa sesiapa yang membuat sesuatu amal bakti semata mata kerana Allah Taala dan mengikuti jejak Rasulullah saw, maka Allah Taala **menjamin** pahalanya dan segala amal itu akan tertuju untuk mendapatkan keredhaanNya dan masuk syurgaNya malahan mendapat tempat disisi NabiNya saw juga menjadi orang kesayangannya.

Sesiapa yang beramal bakti dengan niat selain Allah, maka mintalah balasan dan ganjaran itu kepada siapa yang ia bermuka muka dengannya. Sudah tentu orang itu tidak memiliki apa apa untuk dirinya apatah lagi untuk memberikannya kepada orang lain, samada manfaat atau mudharat, mati atau hidup dan tidak ada kuasa pula di Hari Kebangkitan kelak.

Masalah Thariqat

Dorongan Batin Untuk Menuju Ke Jalan Allah

Ketahuilah bahwa jalan permulaan yang ditempuh ialah munculnya semacam dorongan yang kuat didalam hati yang mengerakkan, menarik dan mengajak untuk kita menuju ke jalan Allah Taala dan menuju ke jalan akhirat serta membelakangkan dunia dan membelakangkan segala yang menjadi kebiasaan kita pada mengejar dunia; seperti mengumpulkan harta dan kekayaan, bersenang lenang mengikuti kehendak syahwat dan hawa nafsu juga bermegah megah dengan keindahan dan kemewahan termasuk keluarga, kaum kerabat, sahabat handai yang dicintai dan lain lain lagi.

Dorongan ini merupakan “Rahsia Ketuhanan” yang diberikan ke dalam batin hambaNya samada dengan cara menakutkan atau mengembirakan ataupun dengan cara menimbulkan perasaan rindu kepada ZatNya ataupun juga melalui pertemuan dengan para wali Allah atau ketika mendapat pandangan daripada mereka. Kadang kadang dorongan itu terjadi tanpa ada sesuatu sebab yang tertentu.

Bercita cita untuk mendapatkan “dorongan” serupa itu sangat sangat disuruh dan digalakkan. Tetapi bercita cita atau berharap saja untuk meningkat tanpa berusaha dan menetap dipintunya adalah suatu keputusan yang bodoh. Betapa tidak, bukankah Rasulullah saw pernah bersabda;

“Sesungguhnya Tuhan telah menyediakan berbagai limpahan (kurnia) pada setiap MASA, maka hendaklah kamu mencarinya”

Sesiapa yang telah diberikan penghargaan oleh Allah Taala dengan dapatnya “dorongan” mulia ini maka hendaklah dia meletakkan dirinya pada tempat yang sesuai. Hendaklah kita mengetahui bahwa pemberian Allah Taala ini adalah **NIKMAT TERTINGGI** antara nikmat nikmatNya yang lain yang tidak dapat ditentukan darjatnya dan tidak dapat diNILAI kesyukuran atasnya.

Keterangan:

“Masyallah, sedarlah wahai sekalian saudaraku, Ini adalah “Penghargaan dan Penghormatan” yang datang langsung daripada Allah swt. Maka hendaklah kita mengetahui akan pemberian Allah Taala ini adalah Nikmat Tertinggi antara nikmat nikmatNya yang lain dan janganlah kita rosakkan dan cacatkan “Penghargaan, Penghormatan dan Nikmat Tertinggi” dengan mengabaikannya atau melalaikan”.

“Meletakkan diri kita pada tempat sesuai bermaksud; “Dorongan Kemauan_Rahsia Ketuhanan” ini seperti Permata yang sangat sangat berharga dimana kita tidak dibenarkan meletaknya dilumpur atau berdekatan dengan lumpur. Fahamilah maksud ini”.

Maka wajarlah kita membanyakkan kesyukuran terhadap Allah Taala atas nikmat besar yang telah diberikan kepada kita yang sudah **dipilih dan mungkin akan diutamakanNya (sekiranya kita mengikuti akan peraturan yang telah digariskan oleh Habib Abdullah bin Alwi AlHaddad)**, kita antara orang orang yang setaraf dan rakan-rakan seperjuangan untuk diberikannya nikmat itu.

Betapa banyaknya orang Islam yang telah mencapai usia 80 tahun atau lebih tetapi masih belum lagi diberikan “dorongan” serupa itu dan hati mereka tidak pernah sekalipun diketuk oleh “Rahsia Ketuhanan” ini.

Keterangan:

“Alhamdulillah, kami panjatkan syukur kepadaMu Ya Allaaah yang telah memberi dan meletakkan “dorongan Kemauan_Rahsia Ketuhanan” ke dalam hati hambaMu yang kotor ini, yang penuh dengan dosa dan noda, buta mata zahir dan buta mata batin kami yang selama ini sudah banyak kami remehkan perintah dan laranganMu, mengabaikan dan melalaikan segala nikmat yang Engkau sentiasa berikan dengan tidak mensyukuriMu dengan sewajarnya. Astagfirullah . . . Alhamdulillah”

“Ya Allaaah, kami adalah hambaMu yang tidak ada Daya dan Upaya untuk menjaga pemberianMu yang tak ternilai ini. Kami mohon kepadaMu, Berilah kami Perlindungan, Bantuan, Pertolongan dan kekuatan supaya dapat menjaga dan membawa “Dorongan Kemauan_Rahsia KetuhananMu” ini sebaik baik mungkin. Hanya dengan kehendak dan izinMu jua yang kami harapkan yang akan berlaku dan pasti berlaku. Kami mohon kepadaMu dengan keberkahan Nabi dan RasulMu, Muhammad saw, dengan keberkahan Ahli BaitNya dan ZuriatiNya, dengan keberkahan Para Habaib yang kami Cintai, dengan keberkahan Guru kami dan Guru Guru mereka. Amin, Amin, Amin, Ya Rabbal Alamin.

Bagaimana Cara Memelihara “Dorongan Kemauan_Rahsia Ketuhanan”

Setiap murid harus rajin berusaha untuk **memperkuh** (menguatkan), **memelihara** dan **mengikuti** ajakan dorongan kebatinan ini seperti berikut:

1. **Memperkuhkannya:** Dengan memperbanyakkan Mengingati Allah Taala, Merenung dan Meneliti segala Kekuasaan Allah Taala dan senantiasa berdampingan dengan Para Wali Allah, Ulama Ulama, Para Guru Guru.
2. **Memeliharanya:** Menjauhkan diri dari bercampur gaul dengan orang orang yang terlindung dari pandangan Allah Taala dan juga dengan meletakkan belakang segala was was dan tipu daya syaitan.
3. **Mengikuti:** Berlumba lumba kembali / menuju ke jalan Allah, berlaku benar dalam menghadapi segala PerintahNya, tidak bermalas malas, tidak menanggung-nanggguhkan dan tidak melambat-lambatkannya. Apabila sampai saja masanya hendaklah menunaikannya dan apabila merasa seruan bakti hendaklah tidak tunggu tunggu lagi. Berhati hati dari ucapan besok atau lusa sebab yang demikian adalah dari hasutan syaitan. Hendaklah terus mengerjakan segala amal baik dengan segera dengan tidak menunggu-nunggu ataupun mencari keuzuran (mencari alasan alasan) kerana tidak ada masa lapang, penat, kurang sihat ataupun belum sampai masa untuk beramal dan sebagainya.

Berkata Abur-Rabi' rhm: Tunjukkanlah dirimu ke jalan Allah kepada Allah dalam keadaan tempang dan cacat anggota dan jangan menunggu waktu sihat saja kerana menunggu waktu sihat adalah kerugian.

Keterangan:

“Maksud; Tunjukkan pada Allah Taala walaupun jasad kita penat, letih dan mempunyai halangan halangan lain yang datang, kita tetap hadir pada hari yang telah kita khususkan buat ‘Dia’ dimana kita dapat menimba ilmu untuk membersihkan dan mendekatkan diri

kepadaNya. Kita tetap menjalankan segala perintahnya dan menjaga larangannya. Menjalankan wirid wirid harian dan lain lain”.

Keterangan:

“Jangan menunggu waktu sihat bermaksud; orang yang sihat tidak ada ujian dan cubaan dan dengan mudah dapat hadir tanpa memberikan alasan, melaksanakan amal bakti tetapi orang yang penat selepas kerja, letih, yang sakit dan ada saja halangan-halangan supaya dia tidak dapat hadir, melaksanakan amal bakti itu adalah ujian dan cubaan berat baginya. Sekiranya dia dapat mengatasi masalah ini maka Allah Taala akan “SENYUM” keatas dirinya kerana dia mempunyai Haqul Yakin bahwa kehadirannya akan membuat Allah Taala, senyum, Rasulullah saw, senyum, Para Malaikat yang ditugaskan menjaga majlis bakti, senyum, Para penduduk bumi, senyum, Para penduduk langit senyum. Masyallah, Subhanallah, Allahu Akbar, Allahu Akbar, Allahu Akbar”.

Berkata Ibu Atha’ didalam kitabnya Al-Hikam: Melambat lambatkan suatu pekerjaan sehingga ada peluang menunjukkan kebodohan jiwanya.

Keterangan:

“Maksud; Mencari alasan demi alasan supaya tidak perlu hadir untuk melaksanakan amal bakti dan menunda-nundakan peluang (untuk mencari alasan alasan) untuk diberi menunjukkan dia lebih senang mendengar nasihat syaitan daripada seruan Allah Taala dan RasulNya”.

Taubat

Langkah pertama yang harus dilalui oleh setiap murid dalam menuju kepada Allah Taala ialah dengan bertaubat kepada Allah Taala dengan sebenar benarnya taubat daripada segala dosa.

Jika ada sesuatu hak orang lain dalam simpanannya yang telah dizaliminya pada masa lalu, maka haruslah dikembalikan pada pemilik hak jika barangnya masih ada. Jika barangnya sudah tidak ada haruslah diganti dengan lain ataupun dipohon dari pemiliknya untuk dihalalkan.

Sebab orang (murid) yang masih bergantung *zimmatnya* (menanggung hak orang) dengan hak orang lain tidak berkemungkinan dapat menuju ke jalan Allah Taala.

“Habib Abdullah AlHaddad menjelaskan bahwa bertaubat harus dilakukan pada semua murid murid yang ada keinginan untuk menuju kepada Allah swt dengan taubat yang benar, mengandungi maksud “dengan penuh keinsafan dan ikhlas atas taubatnya itu”.

Keterangan:

“Sekiranya ada didalam simpanannya atau sudah dihilangkan atau sudah dijualnya tanpa pengetahuan pemiliknya hendaklah di kembalikan sekiranya masih ada. Sekiranya sudah tidak ada harus diganti. Sekiranya tidak berkemampuan hendaklah memohon maaf pada pemiliknya supaya menghalalkannya sekiranya pemilik itu setuju. Kalau tidak, maka mahu atau tidak harus digantikan, tidak ada jalan lain.

Terjebaknya seseorang melakukan demikian adalah seperti berikut:

1. Suka menjadi Pak Sanggup: Pada permulaannya ada niat yang bersih untuk menolong pada pemilik samada untuk di simpan atau untuk diperbaiki barang kepunyaan pemilik itu.

2. *Niat bersih bertukar: Pada suatu masa datanglah niat si pak sanggup itu bertukar kerana desakkan kehidupan yang sempit sehingga sanggup menjual atau mengadai barang kepunyaan pemilik itu tanpa pengetahuan pemilik sebenar. Kerana didalam kiraannya, dia sanggup menggantikan atau menebus balik barangan itu semula pada masa tertentu.*

3. *Hati yang kotor: Bila sudah tidak dapat mengembalikan barang kepunyaan pemilik, hatinya bertukar menjadi kotor hingga sanggup buat tak tahu yang dia ada menerima sesuatu barangan yang bukan kepunyaannya yang harus dikembalikan walaupun berdepan dengan pemilik yang sebenar tanpa segan silu dan perasaan takut.*

4. *Tiada ketakutan dalam hatinya: Pertama, Allah Maha Mengetahui akan sikap si pak sanggup itu yang tidak akan dapat mengembalikan barangan kepunyaan pemilik sebenar tetapi Tuhan mengizinkan juga kerana ada kemungkinan datang pada pak sanggup itu sifat tahu memilih untuk menjadi seorang yang amanah didalam perjanjiannya. Kedua, oleh kerana cetek ilmu pengetahuan agama maka si pak sanggup itu tidak dapat menilai mana yang baik, mana yang buruk dimana ada tertanam didalam hatinya bahwa bila ada rezki akan dikembalikannya. Ketiga, si pak sanggup lupa dan tidak tahu bahwa dia tidak mempunyai keupayaan dan kuasa untuk mengembalikan barangan itu hanya bersandar kepada rezki yang akan datang tanpa berusaha untuk membuat sesuatu tapi hanya duduk dan mengharap aje. Keempat, maka Tuhan menghinanya kerana tidak mahu berusaha untuk mengembalikan barang kepunyaan pemilik kerana hatinya tidak ada perasaan takut kepada pemilik barangan itu. Bila sudah ada sifat tidak takut pada pemilik walaupun berdepan dengan pemilik, itu menunjukkan bahwa hakikatnya si pak sanggup tidak takutkan Tuhannya, itupun kalau dia ada Tuhan”.*

“Habib Abdullah juga menyebut tentang perjalanan murid menuju kepada Tuhan tidak berkemungkinan sampai kepada Tuhan selagi ada menanggung hak orang lain. Terpulanglah kepada Tuhan untuk menghakimi hambanya samada dibenarkannya untuk meneruskan perjalanan hambanya atau tidak. Ini tergantung pada si hamba samada ketidak sanggupan yang sebenar yang di alami dirinya, keikhlasan hati, bertaubat sebenarnya, mempunyai perasaan malu dan takut pada pemilik barang, berjanji dengan Tuhan tidak akan mengulangi sikapnya untuk menjadi pak sanggup pada masa akan datang dan menjaga hatinya supaya dibersihkan semula”.

Syarat taubat yang sah ialah menyesali diri atas segala dosa yang lalu dengan sebenar benar penyesalan serta berazam kuat tidak akan buat lagi dosa selama masih hidup termasuk jangan berdetik (cita cita) untuk melakukan dosa kerana perbuatan itu akan merosakkan taubatnya yang sebenar dan tidak diterima oleh Allah Taala.

Keterangan:

“Kita harus memahami apa itu Taubat dan apa kesan sampingannya. Bagaimana cara untuk bertaubat yang berkesan pada hati?Apabila taubat itu berkesan maka akan datang pertolongan dari Tuhan untuk membantu dan mengingatkan kita dari melakukan perbuatan mungkar pada masa yang mendatang.

Taubat yang sebenarnya adalah suatu perbuatan yang datang dari hati untuk mengucapkan PENGAKUAN pada Tuhan beserta dengan PENYESALAN atas perbuatan perbuatan yang lalu. Apa itu PENGAKUAN, iaitu bersumpah kepada Allah Taala. PENYESALAN adalah PERASAAN KEINSAFAN yang datang dari lubuk hati seorang hamba beserta RASA IKHLAS.

Bagaimana RASA IKHLAS datang? MENYEDARI dirinya tidak ada kuasa dan kemampuan untuk membuat sesuatu walau sebesar zarrah sekalipun. MENYEDARI dirinya dimiliki Tuhan yang menjadikannya. MENYEDARI dirinya dihidupkan dan akan dimatikan oleh Tuhannya. MENYEDARI perbuatan dirinya akan dihadapkan pada Tuhan untuk ditimbang segala amalan-amalannya kelak. Dari mana datangnya MENYEDARI? Itu adalah perbuatan Allah Taala pada hambanya yang hendak diselamatkan dari Api Neraka”.

“Sekiranya kita faham akan keterangan diatas itu ada mengandungi beberapa perkara yang mudah dan juga berat supaya jangan mempermainkan seperti berikut:

- 1. PENGAKUAN adalah BERSUMPAH PADA ALLAH TAALA.*
- 2. PENYESALAN adalah PERASAAN KEINSAFAN.*
- 3. RASA IKHLAS adalah MENYEDARI.*

Bila ketiga perkara ini dapat difahami dan dilakukan barulah Taubat itu Insyallah berkesan pada diri kita”.

Setiap murid harus mengakui dirinya bersifat cuai dan lalai dalam menunaikan hak hak Tuhan yang wajib atas dirinya. Apabila rasa kesalan atas kecuai dan kelalaian, maka hati akan berpatah hati dan menyesal mengenangkan diri yang malang. Maka ketahuilah ketika itu Allah akan bersama sesuai dengan firmanNya dalam sebuah Hadis Qudsi;

“Aku sentiasa berada bersama sama orang yang berpatah hatinya kerana AKU”

Keterangan:

“Sila rujuk keterangan diatas; untuk mengakui akan sifat yang sering cuai, lalai dan malas atas perintah Tuhan yang diwajibkan pada diri, hendaklah dilakukan dengan adab dan melaksanakan panduan tersebut sebaik-baiknya. Dengan berwudhu dan selesai shalat berdoalah kepada Tuhan dan mengakulah didepan pintuNya dan mohonlah bantuan dariNya”.

Memelihara Diri Dari Dosa

Setiap murid harus menjauhkan diri dari melakukan dosa dosa kecil apatah lagi dosa besar seperti menjauhi dari mengambil minuman yang beracun. Hendaklah takut untuk melakukan dosa lebih pada takut dan gentar jika terminum dan termakan racun yang mematikan. Sebab dosa dan maksiat akan mematikan hati seperti racun membinasakan badan.

Keterangan:

“Mengapakah kita boleh dan sanggup melakukan dosa kecil atau dosa besar? Tetapi akan TAKUT bila seseorang memberitahu bahwa makanan ataupun minuman mengandungi racun dan serta merta akan menjauhi dari mengambil makanan ataupun minuman itu. Mengapa perkara ini tidak berlaku pada diri kita semasa melakukan dosa kecil ataupun dosa besar? Adakah kerana tidak ada khabar akan perbuatan dosa kecil dan besar akan membinasakan badan dan mendapat siksaan dari Allah Taala? Alasan apa yang hendak diberikan sedangkan, keterangan dari AlQuran sudah dijelaskan. Nabi dan RasulNya sudah mengingatkan. Para Ulama sudah maklumkan dan Para Guru sudah mengkhabarkanya. Yang menjadi masalah pada diri adalah kerana tidak mempunyai perasaan TAKUT PADA ALLAH. Kenapa tidak ada PERASAAN TAKUT PADA ALLAH seperti MENJAUHI

MAKANAN ATAU MINUMAN YANG BERACUN? Ini disebabkan oleh tiada Iman (tidak ada kepercayaan kepada hukum Allah Taala). Kerana apa tidak ada kepercayaan? Tidak MENGENAL TUHANNYA? Kenapa tidak mengenali Tuhannya. Kerana tidak ada ILMU. Kenapa tidak ada ILMU? Tidak mahu belajar. Kenapa tidak mahu belajar? Saya tak dapat jawab . . . Sebab Iblis pun TAKUT pada ALLAH. Kalau manusia tidak TAKUT PADA ALLAH nak letak manusia KAT MANA ? ? ?”

Adapun hati bila sudah binasa maka akan binasalah bersamanya diakhirat yang menyebabkan seseorang tidak akan terselamat dari kemurkaan Allah dan siksaanya. Hanya orang yang hatinya suci bersih saja yang dapat menuju kepada Allah untuk mendapat keredhaan dan balasan pahalaNya.

Keterangan:

“Habib Abdullah menjelaskan, bila hati sudah binasa akan bersamanya diakhirat daripada terselamat dari kemurkaan Allah dan siksaanya. Manusia bila hatinya sudah binasa dapat dilihat dari percakapan dan perbuatan semasa hidupnya didunia dan dia sendiri yang menunjukkan dirinya sebagai calon manusia yang mendapat kemurkaan Allah dan siksaanya. Berlindunglah diri kita daripada mendapat jempunan percalonan dari Allah swt yang diberi keistimewaan akan kemurkaan dan siksaanya dan bermohon ampunan untuk mereka dan kita semua, Amin. Hanya hati seseorang yang suci bersih sahaja yang dapat menuju kepadaNya. Dengan itu haruslah kita menjaga hati kita berpandukan AlQuran, Sunnah Nabi saw, Panduan dan Garisan yang ditunjuk dan diajarkan oleh para habaib, ulama dan guru guru”.

Memelihara Hati

Setiap murid (samada suka atau tidak, sekiranya dia mengakui dirinya sebagai seorang murid yang menuntut) harus berusaha memelihara hatinya daripada Was Was, Cita Cita Kosong (suka berangan angan) dan apa saja yang datang dalam fikirannya yang kotor.

Pintu hati setiap murid harus didirikan sempadan dengan dibangunkan dinding supaya dapat mengawasi sesuatu yang datang menghampirinya. Sekiranya tidak ada persiapan sempadan dan dinding pada diri setiap murid, mana mungkin dapat dilihat gejala gejala yang disebutkan diatas tadi masuk dan merosakkan diri murid itu.

Apabila hati sudah rosak akan menjadi susah untuk mengeluarkan penyakit yang sudah berselaput didalamnya. Sepertinya dari usia muda sudah banyak melalaikan tanggungjawab sebagai hamba tuhan dengan tidak menjalankan kewajipan dan menjauhi laranganNya. Pasti gejala gejala itu sudah melekat seakan-akan sudah dipatri. Kerana itulah setiap murid harus sentiasa membersihkan hatinya yang menjadi tempat pandangan Tuhan supaya hati tidak tertarik pada pujukkan hawa nafsu dan syahwat keduniaan.

Murid murid harus memelihara hatinya dan harus mengenali musuh-musuhnya supaya tidak melangkah masuk kesempadan dan dinding yang telah dibangunkan, tidak masuk kerumahnya, dimana boleh membawanya jauh dari Allah swt. Tanpa mengenali musuh-musuhnya mana mungkin dapat menghalang dari serangan mereka?

Keterangan:

Perhatian harus di tekankan seperti berikut:

1. *“Memelihara hati dari sifat dendam khusumat, sifat hasad dengki, sifat suka menipu dan sifat suka membelit terhadap kaum Muslimin.*
2. *Jangan sekali-kali suka pada sangkaan buruk terhadap sesiapaapun dari kaum Mu'minin. Sebaiknya ditujukan hatinya untuk menasihati kaum Muslimin, bersifat pengasih dan sentiasa bersangka baik kepada semua orang. Sifat begini sangat susah untuk diamalkan kerana sentiasa melihat akan kelemahan orang lain khususnya seperguruan. Hanya dia INGAT dia yang faham dan suka ketawakan rakan seperguruan dan orang lain.*
3. *Segala kebaikan yang disukai harus disukai untuk orang lain. Jangan halang orang lain untuk dapat membuat kebaikan.*
4. *Setiap murid harus mengetahui bahwa hati mempunyai berbagai penyakit-penyakit yang lebih berat, lebih buruk dan lebih busuk dari maksiat-maksiat pancaindera. Oleh kerana ada penyakit itulah maka murid tidak boleh menerima makrifatullah (mengenal Allah) akan kecintaannya melainkan di hapuskan habis-habisan penyakit itu. Contoh penyakit yang bahaya ini ialah sifat membesarkan diri atau bongkak, riya' dan hasad dengki. Bila ada sifat membesar diri menandakan kurang akal (kefahaman tak ada / tak faham) dan jahil. Siapa yang membesarkan diri, tidak ada rasa kebimbangan sekiranya dia meninggi diri terhadap orang lain dengan apa yang Allah kurniakan kelebihan-kelebihanNya kelak Allah akan merampas semula segala kurniaNya disebabkan kelakuan dan perbuatannya yang buruk yang ingin MENCUBA MENANDINGI KUASA TUHAN dalam Sifat KebesaranNya. Manakala sifat riya' pula suka menunjuk-nunjuk menandakan hatinya kosong daripada sifat suka membesarkan Allah dan suka mengagungkan Allah kerana amal yang dibuatnya hanya pura pura saja. Dia merasa kurang puas amalnya jika diketahui oleh Tuhan Rabbul Alamin saja. Jadi kena tunjuk pada orang lain yang dia tu Alim, Wara, ada Ilmu dan tempat orang menanyakan fatwa.*
5. *Selain dari itu, harus setiap murid menjaga pancainderanya seperti mata, jangan melihat apa-apa yang haram, yang shubhat, apa yang boleh menaikkan syahwat. Mulut, jangan banyak cakap. Sebaliknya banyak diamkan diri. Banyakkan membaca Quran, Zikir dan berdoa. Jaga mulut daripada terkeluar perkataan-perkataan yang kotor dan boleh menjatuhkan maruah kaum muslim dan bukan muslim. Telinga, jangan mendengar cerita-cerita bohong, cerita kosong, cerita menaruh harapan dan lain-lain. Jadikan telinga suka mendengar bacaan Quran, Zikir, dan Berdoa. Suka mendengar nasihat-nasihat dan lain-lain. Tangan, jagalah tangan daripada mengambil barang kepunyaan orang lain tanpa izin. Jangan nak tunjuk kuat dengan tangan, asyik nak tumbuk orang aje hingga lupa tumbukkan dari Tuhan tak nampak. Jadikan tangan itu suka kepada kebajikan, mengambil wudhu, mengambil Quran, mengambil Tasbih dan lain-lain. Kaki, jadikan kaki suka dan redha ke masjid, ketempat kuliah, menziarah ulama, menziarah orang sakit, menziarah kubur dan lain-lain. Masyallah. Banyak sangatlah.*
6. *Setiap murid hendaklah berzuhud didunia. Sekiranya tidak mampu berzuhud didunia hendaklah menuntut dunia (mintak) dari Pemilik dunia itu sendiri; iaitu Allah swt. Semua hati manusia berada didalam genggaman Tuhan.*

7. *Jauhkan, buang sifat hasad kerana sifat hasad jelas menentang kekuasaan Allah Taala dan membantah akan kudratNya dalam kerajaanNya. Allah swt menganugerahkan nikmatNya kepada setiap hambaNya dan sudah semestinya atas kehendakNya. Sekiranya setiap hamba khususnya murid memilih sesuatu yang bertentangan dengan apa yang dipikirkan oleh Allah swt itu menandakan si hamba sudah melakukan kurang ajar terhadap Allah swt dan wajib mendapat kemurkaanNya.*
8. *Tidak baik memeram dengki terhadap sesiapa yang bersaing dengannya dalam sesuatu tujuan ataupun yang pernah membantunya dalam sesuatu urusan.*
9. *Harus menanamkan rasa cinta terhadap saudara saudaranya didalam hati serta berusaha dengan zahirnya mengajak dan mengumpul mereka supaya belajar agama untuk menuju ke jalan Allah dan berlumba lumba dalam mentaatiNya.*
10. *Jauhkan pada Cintakan Dunia kerana itu ada Pokok Segala Bencana sebagaimana tersebut didalam sebuah hadis. “Jika hati terselamat dari penyakit cintakan dunia, niscaya ia menjadi putih dan bersih, baik dan bercahaya; dan ketika itu sesuilah untuk menerima limpahan cahaya dari Allah swt dan mudahlah baginya untuk menyingkap (menangkap) rahasia-rahasia Tuhan”.*

Mencegah Seluruh Anggota Dari Maksiat

Panduan selanjutnya diharuskan setiap murid untuk berusaha mencegah dirinya dan seluruh anggota dari melakukan maksiat dan dosa. Setiap anggota harus digesa (diajak bersama) untuk mengerjakan ketaataan semata-mata kepada dan kerana Allah Taala dan tidak mengerakkan diri dan anggota untuk melakukan sesuatu melainkan perkara itu boleh dan mendatangkan manfaat pada dirinya di Hari Akhirat.

Keterangan:

“Dari panduan dan nasihat-nasihat yang lalu, dimana setiap salik dan murid harus mengikuti panduan dan nasihat itu sekiranya niat dan tujuan si salik dan murid itu benar, semata-mata inginkan Allah Taala. Maka dari tajuk diatas itu tidak akan ada sesuatu yang boleh mencegah atau menghalang si salik dan murid yang sudah dan akan mengambil dan melaksanakan panduan dan nasihat dari Imam Habib Abdullah Bin Alwi AlHaddad.

Oleh kerana niat dan tujuan si salik itu benar maka dengan dorongan kemauan iaitu rahsia ketuhanan yang sudah dicampakkan kedalam hati si salik dan murid maka selaras (kena) pada niat dan tujuan si salik dan murid maka tumbuhlah pergerakan dan perbuatan untuk membersihkan diri si salik dan murid dengan segera.

Sangat menyedikan perkara ini tidak akan boleh berlaku pada murid di mana dorongan kemauan_rahsia ketuhanan yang dilimpahkan pada mereka tidak selaras (tidak kena / tidak tepat) oleh kerana niat dan tujuan si salik dan murid itu tidak benar dan bohong belaka. Hanya mereka yang benar niatannya akan mengambil panduan dan garisan ini didalam menjalankan perlaksanaan tersebut. Benarlah kata Imam Habib Abdullah bahwa, dorongan kemauan_rahsia ketuhanan diberikan oleh Allah kepada yang dipilihNya tetapi hanya mereka sahaja yang tidak mahu menerima pemberian Allah Taala. Tidak mahu berusaha dengan sekuat tenaga, tidak mahu istiqamah dalam pelaksanaan. Asyik nak cepat aje. Lekas bosan, lekat penat, suka menangguhkan dan melambatkan.

Melihat dorongan batin itu satu perkara yang kecil yang tidak ada harga yang diberikan oleh Allah Taala. Alasan-alasan itu menunjukkan bahwa niatan dan tujuannya tidak benar yang berkuasa pada diri murid sebenarnya ialah Iblis dan Syaitan kerana mereka lebih senang mengikuti nasihat mereka daripada nasihat Imam Habib Abdullah AlHaddad. **Maka yang sebenar benar si salik dan murid yang menjalankan panduan dan nasihat nasihat itulah yang dikatakan oleh Imam Habib Abdullah AlHaddad, hamba yang DIUTAMAKAN oleh Allah Taala.** Untuk tidak mengajak diri dan anggota dari melakukan sesuatu yang tidak mendatangkan kemanfaatan didunia dan akhirat, lihatlah pada niat dan tujuan yang ditanamkan. Hanya itulah jalan yang ada. Selain berdoa . . .”

Bencana Lisan

Setiap murid murid harus bersungguh sungguh dalam memelihara lisan (lidah) mereka kerana bentuk lisan itu kecil akan tetapi bencananya sangat berat sekali.

Keterangan:

“Langkah seterusnya bagi murid-murid hendaknya menjaga lidah yang zahir dan lidah yang batin daripada mengeluarkan kata-kata yang hina, kata-kata yang mendatangkan dosa dan kata-kata yang tidak mendatangkan faedah.

Ikutilah langkah panduan seterusnya;

1. Kita mempunyai dua lidah. Yang Zahir terletak dimulut dan Yang Batin letaknya didalam hati. Setiap kali didalam permulaan percakapan baik pada zahir mahupun batin, hendaklah kita berfikir dahulu samada percakapan itu baik atau tidak disisi Allah. Adakah percakapan itu akan menjatuhkan maruah pada orang yang ditujukan percakapan? Perlukah untuk bercakap dan untuk apa dan apa faedahnya?

2. Tahanlah lidah daripada bercakap bohong (hanya ingin menunjukkan diri yang betul dan benar, menutup perkara yang sebenar dan lain-lain), tahan lidah dari mengumpat (bercerita pasal orang lain terutama kesalahan orang lain).

3. Hindarilah segala percakapan yang dilarang oleh agama.

4. Menjaga diri dari mengeluarkan percakapan yang cabul dan kotor.

5. Jalan sekali-kali melibatkan diri dalam perkara-perkara yang tidak ada kena mengena dengan diri sendiri (jangan suka memasang telinga pada perbualan orang lain) walaupun perbuatan itu tidak haram, namun akan **mengeraskan hati** dan mensia-siakan waktu tanpa faedah.

6. Jangan mengerakkan lidah kecuali membaca AlQuran, Berzikir, Berdoa, Menyampaikan nasihat kepada saudara yang Muslim, Menyuruh berbuat ma'ruf (baik) dan mencegah berbuat munkar (jahat).

7. Menyuruh sesuatu hajat keduniaan yang akan membantunya untuk kepentingan akhiratnya.

8. Hindarilah lidah menjadi ‘munafiq’; sekiranya susah untuk menjadi orang yang menjaga amanah, lebih baik **‘DIAM’**.

Nabi saw pernah bersabda; “Setiap percakapan anak Adam dikira atasnya, kecuali berzikir kepada Allah ataupun menyuruh berbuat ma’ruf (baik) dan melarang berbuat munkar (jahat)”.

Bencana Telinga Dan Mata

Ketahuilah, bahwasanya pendengaran dan penglihatan merupakan dua pintu yang sentiasa terbuka menuju ke hati. Apa saja yang masuk menerusi kedua pancaindera ini akan sampai ke hati. Terlalu banyak perkara yang didengar dan terlalu banyak perkara yang dilihat oleh mata manusia dari perkara-perkara yang tidak layak untuk sampai ke dalam hati. Maka susah untuk dihapuskan bekas-bekas kesan itu. Sebab hati akan segera terpengaruh dengan segala apa saja yang datang menghampirinya. Apabila hati telah terpengaruh dengan sesuatu perkara, niscaya sukarlah untuk memadamkan kesan itu.

Keterangan:

“Bab seterusnya perjelasan tentang peringatan terhadap dua pintu yang tidak diketahui dan disedari akan peranan pintu yang dikatakan sentiasa terbuka. Bermaksud pintu ini tidak ditutup selagi kita masih bernafas walaupun kita didalam tidur iaitu pendengaran dan penglihatan. Sememangnya sudah terlalu banyak yang kita dengar dan lihat dimana kita menyalahkan penggunaan pada kedua pancaindera tersebut. Oleh kerana pendengaran dan penglihatan sudah sehati dengan diri kita sejak kita dilahir tanpa kita mengetahui akan adanya kerosakkan bila disalahgunakan. Kita senantiasanya berdepan dengan penglihatan yang terbuka kepada pendengaran didalam kehidupan. Maka sudah sampai saatnya kita menjaga pendengaran dan penglihatan kita supaya tidak mendatangkan kerosakkan pada hati. Bila tidak dijaga maka apa saja yang baik atau buruk dari penglihatan dan pendengaran akan terus masuk kedalam hati. Kalau yang baik masuk, alhamdulillah tetapi kalau yang buruk masuk, maka susahlah bagi diri kita untuk mengeluarkannya. Sekiranya dapat dikeluarkan akan tetapi akan meninggalkan kesan. Mudah-mudahan kita dapat pertolongan dari Allah untuk menjaga kedua pintu tersebut dari kerosakkan. Itupun tergantung pada niat kita samada kita benar benar hendak menjaganya atau tidak”.

Seorang murid harus berhati-hati untuk memelihara pendengarannya dan penglihatannya dari perkara-perkara yang tidak baik. Dia harus berusaha bersungguh sungguh untuk membenteng seluruh anggotanya daripada maksiat dan dosa dan daripada campurtangan dalam urusan-urusan yang tidak ada kena mengena dengan dirinya.

Keterangan:

“Seterusnya, setiap murid harus menjaga segala pendengarannya dan penglihatannya dari setiap perkara yang tidak baik. Masalahnya, mana yang dikatakan perkara yang tidak baik pada pendengaran dan penglihatan? Inilah masalah yang dihadapi oleh setiap murid yang tidak mahu berusaha dalam memahami tajuk ini. Tidak faham dan tidak mahu faham kerana merasa tidak penting untuk mempelajari Hukum Fiqih kerana bagi mereka tidak mustahak. Mereka hanya asyik dibuai oleh syaitan untuk belajar Bersuluk (ilmu tasauif) saja. Cukup bagi mereka. Tetapi tidak mengambil langkah-langkah seperti telah digariskan. Hanya dok asyik menunggu. Bashirah murid begini ditutup oleh Allah supaya tidak tahu akan Hukum FiqihNya, dimana tanpa pengetahuan hukum fiqih hanyutlah murid itu didalam perjalanan ilmu bersuluk (sesat).

Bentengkanlah segala pendengaran dan penglihatan dan seluruh anggota kamu dengan Hukum Fiqih. Kalau tak tahu akan hukum fiqih maka hendaklah murid itu tanpa lengah lengah

belajar Hukum Fiqih jangan terbawa oleh ilmu suluk (ilmu tasawuf). Jangan sekali-kali campurtangan dalam urusan yang tidak ada kena mengena dengan diri kamu. Ingat, pesan ini, jangan campurtangan”.

Awas, jangan memandang kepada kenikmatan kehidupan dunia dan keindahannya dengan pandangan yang memikat hati kerana sesungguhnya zahir keindahan dunia itu adalah fitnah, penuh dengan bencana dan batinnya pula adalah tauladan penuh dengan makna. Banyak murid yang memandang kepada sesuatu kelazatan dan keindahan (kenikmatan) dunia lalu hatinya terpicat kepadanya. Maka dia terus mencintainya dan berusaha untuk mengumpul dan menyimpannya.

Keterangan:

(Ini adalah salah satu peringatan keras oleh Habib Abdullah Alwi AlHaddad, dimana setiap salik dan murid tidak dibenarkan untuk memandang kepada kenikmatan kehidupan dunia dan segala keindahannya. Bila pandangan mereka tertumpu pada kenikmatan dunia, maka akan menjeratkan hati untuk mendapatkannya. Oleh kerana salik dan murid tidak memahami istilah bagaimana untuk mengambil dan bila untuk menolak pandangan kepada segala keindahan dunia maka akan terperangkaplah mereka. Sebagai contoh; bagi sesiapa yang sudah menikmati (dapat) pekerjaan iaitu rezki yang telah diberikan oleh Allah Taala sebagai keperluan untuk kehidupan hambaNya, diizinkan hambaNya dapat beribadah dan sentiasa dapat RASA untuk bersyukur dan juga sentiasa dapat berdamping dengan alim ulama dan orang-orang Sholeh.

Bila mana pandangan kenikmatan dunia ini disalah pandang, maka Allah Taala meletakkan rezki lain dan pada pandangan salik dan murid sebagai satu lagi nikmat yang lebih besar dari Allah Taala maka ditinggalkan rezki yang pertama dan menyahut rezki yang kedua. Maka akan lalailah dan akan gelaplah hati salik dan murid yang terperangkap oleh hawanya sendiri. Begitu juga dengan orang yang berniaga. Kerana rezki pertama itu rezki sebenar, rezki yang kedua belum tentu lagi. Maha Suci Allah Taala dengan IlmuNya menguji hambaNya”.

Setiap murid harus memandu penglihatannya kepada segala ciptaan-ciptaan Tuhan supaya tidak melihat daripadanya melainkan dengan pandangan penuh insaf dan i'tibar. Ketika melihat kepada sesuatu ciptaan hendaklah mengingat bahwa ciptaan itu akan binasa dan pergi tidak kembali lagi. Sebelumnya semua ciptaan-ciptaan itu tidak ada, lalu Allah mengadakannya dan betapa banyak anak Adam yang telah terpicat dan terpengaruh dengan ciptaan-ciptaanNya akan tetapi mereka itu telah pergi dan binasa, manakala ciptaan-ciptaan Tuhan itu tetap akan ditinggalkannya untuk diwarisi oleh orang-orang yang terbelakang dari orang-orang yang terdahulu.

Keterangan:

(Subhanallah, salah satu kesilapan yang dilakukan oleh salik dan murid tidak dapat pandangan (melihat) yang rezki yang Allah Taala itu adalah CIPTAANNYA, kerana apa?

Sebelumnya rezki itu tidak ada pada diri salik dan murid, Subhanallah. Kita sering melihat nikmat Allah tetapi bukan dengan pandangan PENUH INSAF! dan I'TIBAR. Pandangan dengan Insaf adalah memahami rezki dalam apa bentuk juapun adalah CIPTAANNYA, dimana Dia dengan sifat QudratNya untuk mengadakan ciptaan itu dan MEMBERHENTIKAN CIPTAANNYA!

Pandangan dengan I'tibar adalah tidak memandang pada CIPTAANYA yang tidak mengena dengan diri kita. Kerana bila memaling pandangan pada rezki yang telah diberikanNya menandakan seolah-olah kita tidak bersyukur pada pemberianNya. Kalau bersyukur, kenapa boleh paling ke rezki yang lain, yang belum tentu ada? Itu menandakan kurang Adab. Lihatlah keliling kita, berapa banyak ciptaan Allah yang telah diciptakan dan telah dihentikanNya. Contoh; Ayah dan ibu, dulu ada, sekarang tak ada. Wang Ringgit, semalam ada, hari ini tak ada. Dulu ada kerja, sekarang tak ada. Dulu bujang, sekarang ada famili dan banyak banyak lagi. BUKANKAH INI CIPTAANNYA. Kalau ada wang ringgit, harta berupa rumah maka akan ditinggalkan juga untuk diwarisi atau direbut-rebutkan. Kalau tak nak tinggalkan wang ringgit dan harta maka wang ringgit dan harta akan tinggalkan kita juga”.

Lantaran itu wahai murid, lihatlah kepada ciptaan-ciptaan Allah yang ada sekarang ini, tetapi jangan melekat penglihatan dalam hati. Lihatlah dengan pandangan seorang yang mengaku kesempurnaannya kekuasaan Zat yang mencipta dan yang mengadakannya; iaitu Allah swt. Sebenarnya, semua ciptaan-ciptaan Allah Taala yang ada diatas muka bumi ini senantiasa menyeru dengan lidahnya, didengar oleh orang-orang yang bercahaya hatinya yang dapat melihat kepada sesuatu dengan Nur Allah Taala bahwasanya Tiada Tuhan Melainkan Allah, Tuhan Maha Kuasa Lagi Bijaksana.

Sentiasa Dalam Taharah

Setiap murid hendaknya sentiasa didalam taharah (wudhu). Setiap kali berhadass, hendaknya segera berwudhu lalu sembahyang dua rakaat. Sekiranya dia mempunyai isteri dan dia bersetubuh, maka hendaklah dia segera mandi janabah (mandi bersih) pada masa itu juga supaya dia tidak terus menerus dalam keadaan junub (kotor).

Keterangan:

“Islam dibangunkan berlandas Kesucian (kebersihan) Jasmani dan Rohani supaya dapat mencapai Akhlak yang Mulia seperti yang dicontohkan oleh Rasulullah saw dimana setiap murid yang ingin mencapai Akhlak yang Mulia disisi Allah Taala harus mencontohi Rasulullah saw kerana beliau saw senantiasa didalam kebersihan dengan taharah (wudhu). Hikmah taharah (wudhu) sebenarnya adalah sebagai pendinding bagi sesiapa yang bertaharah (berwudhu) dengan sempurna semata-mata untuk Allah Taala kerana selalu merasa ingin mengadap kepadaNya samada didalam Hak Waktu ataupun diluar Hak Waktu.

Bila wudhu seseorang sempurna berlandaskan hukum syariat dan sejalan dengan niatnya insyallah maka akan sempurnalah wudhunya. Bila wudhunya benar dan hatinya benar maka insyallah sholatnya benar. Untuk mengetahui samada wudhu dan sholatnya sempurna hendaklah melihat samada segala perintah dan larangan Allah Taala dapat dilaksanakan dengan ringan dan mudah. Begitu juga sekiranya murid mempunyai isteri maka digalakkan untuk segera mandi janabah pada masa itu supaya sentiasa didalam taharah (wudhu). Hikmahnya adalah supaya bila ajal datang menjemputnya maka berada didalam taharah”.

Supaya seorang murid itu sentiasa didalam taharah, hendaklah dia mengurangi makan dan mengurangi minum, sebab orang yang banyak makan dan minum selalu didatangi hadas dan apabila selalu sangat berhadass, tentulah akan menyusahkannya untuk mengekalkan dirinya didalam taharah setiap masa. Selain itu, mengurangi makan juga akan membantunya bangun

ditengahmalam untuk beribadat, sedang amal ditengahmalam itu adalah sangat sangat dituntut dan digalakkan.

Keterangan:

“Salah satu cara untuk mengekalkan (bertahan) taharahnya hendaklah kurang makan dan minum. Bila kurang makan dan minum, maka akan kurang ke tandas (untuk membuang hajat) dengan cara ini dapat mengekalkan taharahnya. Selain dari itu mengurangkan makan dan minum dapat membantu untuk beribadat diwaktu malam yang dituntut dalam Islam seperti yang dilakukan oleh Rasulullah saw”.

Seorang murid hendaknya tidak makan kecuali diwaktu lapar dan tidak tidur kecuali sudah mengantuk, tidak berbicara kecuali diwaktu perlu dan tidak bercampur-gaul dengan orang ramai kecuali dalam percampur-gaul itu ada faedah.

Keterangan:

“Dilarang juga kepada murid supaya jangan makan kecuali sudah lapar dan tidak tidur kecuali sudah mengantuk. Sekiranya dia tidak merasa lapar dan ingin makan menunjukkan dia terpengaruh dengan syahwatnya. Begitu juga, tidak tidur kecuali sudah mengantuk. Bila perbuatan ini diamalkan selalu akan membawa kepada kemalasan. Dilarang kepada murid supaya tidak bercakap kecuali pada waktu dan masa yang perlu sahaja dan tidak bercampur-gaul dengan orang ramai kecuali dalam pergaulan itu mendatangkan faedah. Bila perbuatan itu mengandungi maksiat hendaknya lekas-lekas hari dari campur-gaul. Sekiranya dia kekalkan juga campur-gaul akan mengundang perbuatan dosa sedangkan itu bukan matmalatnya. Setiap murid yang dalam proses penyucian batin hendaklah menerapkan cara-cara ini supaya dapat menjauhi permainan nafsu syahwatnya”.

Sesiapa yang suka makan banyak, hatinya akan menjadi keras seperti batu dan ketika itu segala anggotanya akan merasa berat dan malas untuk beribadah.

Banyak makan akan menarik kamu kepada banyak tidur dan banyak cakap. Apabila seseorang banyak tidur dan banyak cakap menunjukkan segala kehendak dan cita-citanya akan menjadi gambaran, semata-mata angan-angan sahaja bukan hakikat.

Dalam sebuah hadits tersebut;

“Tiada suatu tempat yang dipenuhi oleh anak Adam yang lebih mencelakakan daripada perutnya. Cukuplah untuk anak Adam itu beberapa suap makanan untuk menegakkan tulang belakangnya (untuk menahan kelaparan). Jika itu tidak dapat dipertahankan, maka hendaklah dibahagi tiga, sepertiga untuk makanan, sepertiga untuk minuman dan sepertiga lagi untuk pernafasan”

Memperbanyak Yang Dianjurkan & Menjauhi Yang Dilarang

Seorang murid harus menjadi orang yang paling jauh dari segala rupa maksiat dan perkara-perkara yang dilarang, disamping menjadi orang yang sangat menjaga yang fardhu dan perkara-perkara yang dianjurkan. Seterusnya hendaklah kamu menjadi orang yang amat memelihara segala amal yang boleh mendekatkan dirinya kepada Allah Taala, amat cenderung untuk membuat bakti dan kebajikan. Sebab seseorang murid itu tidak akan berbeza dengan manusia ramai, melainkan dengan sifat-sifat keistimewaannya; seperti berada dijalan Allah,

selalu membuat taat terhadapNya, serta mengasingkan diri dari segala perkara yang bakal menghalangnya untuk beribadat kepada Allah swt.

Keterangan:

“Setiap orang yang menceburkan dirinya mempelajari ilmu tasawuf (ilmu batin) adalah sebagai seorang murid yang masih didalam perjalanan untuk mengetahui dan mengamalkan pengetahuannya untuk mendapakan kehampiran dengan Allah Taala. Maka panduan dan garisan seterusnya oleh Imam Abdullah Bin Alwi AlHaddad untuk setiap murid supaya dapat mengukuhkan lagi perjalanan mereka sebagai berikut:

1. Hendaknya menjadi orang yang paling jauh dari segala rupa maksiat dan perkara-perkara yang dilarang bermaksud; Hendaklah setiap murid mengenal pasti segala rupa maksiat yang sedang berlaku dan mungkin akan berlaku dan tidak bersama dengan mereka yang melakukan maksiat juga yang bershubhat dalam melakukan perkara-perkara yang dilarang oleh Allah Taala dan RasulNya. Untuk mengetahui samada maksiat atau pun larangan yang dilakukan mereka atau akan dilakukan hendaklah mengambil apa saja tindakan dan perbuatan mereka (dari segi percakapan, pergerakan badan, mata dan sebagainya) dan melandaskan kesemua tindakan dan perbuatan itu dengan Ilmu Pengetahuan Syariat (Syara’). Ini yang dimaksudkan segala rupa maksiat dan larangan. Bila seseorang murid dapat berbuat demikian, Insyallah akan mendapat pertolongan dari Allah dan RasulNya. Setelah mendapat jawapan hendaklah tanpa langkah-langkah mengambil tindakan untuk meninggalkan tempat mereka, kerana dengan melambatkan atau melengahkan tindakan itu akan mengundang tindakan dari Hawa ataupun Nafsu untuk menyerang kamu dengan langkah mereka yang selanjutnya. Fahamkan ini kerana hawa nafsu akan menggunakan istilah; “Siapa cepat dia selamat. Siapa lambat terikatlah dia”.

2. Menjaga segala yang difardukan (perkara-perkara yang diwajibkan atas setiap muslim) jangan sampai terlepas akan hak-hak Allah Taala. Kerana setiap waktu ada hak-hak seperti sholat lima waktu yang sangat-sangat penting dan wajib bagi setiap muslim untuk melaksanakan sebagai batas permisahan seseorang yang pengamal ajaran islam atau yang berada didalam golongan musyrik ataupun fasiq. Hak waktu (sholat) merupakan tiang islam sekiranya seseorang yang beragama islam tidak melaksanakan kewajipan yang telah ditetapkan oleh syariat Allah maka dia sebenarnya tidak beriman pada Allah dan RasulNya secara hakikat. Kerana seluruh para Ulama dari dahulu hingga sekarang dan akan datang telah mengariskan bahwa tidak ada alasan yang boleh diberikan seseorang yang beriman pada Allah dan RasulNya melainkan tidak siuman (gila atau hilang ingatan) atau kematian. Hanya dua alasan ini yang dibenarkan oleh Allah dan RasulNya sahaja. Sekiranya tidak mahu mendirikan sholat maka hendaklah menjadi orang gila ataupun seorang yang hilang ingatan, baru digugurkan kewajipan bersholat. Begitu juga pada kefardhuan-kefardhuan lain yang telah ditetapkan didalam hukum syariat dimana dapat dirujuk pada kitab fiqh.

3. Memperbanyakkan pelaksanaan perkara-perkara yang dianjurkan oleh Agama Islam. Selain kewajipan pada hak-hak waktu, setiap murid harus mengerjakan perkara-perkara yang boleh mendekatkan dirinya pada Allah dengan bersholat sunnat, membaca alquran, berzikir, bermunajat, bertafakur, muhasabah diri dan lain-lain. Perkara ini adalah yang bersangkutan dengan dirinya sahaja maka perkara lain yang harus dilakukan murid seperti contoh; hadir kelas agama, berziarah kepada kedua ibubapa (sekiranya tinggal berasingan), berziarah pada guru, berziarah pada alim ulama, berziarah ke kuburan pada hari Jumaat, berziarah kepada kaum kerabat (yang melaksanakan perintah agama), bersholat jemaah dimasjid, bersholat jemaah dirumah bersama keluarga, senantiasa menasihati keluarga terdekat, dan banyak lagi.

Asalkan perkara itu tidak ada unsur haram, syubhat dan bidaah. Bila perkara ini dapat diterapakan akan membawa kepada kedekatan pada Allah dan akan membuat dirinya jatuh minat untuk mengerjakan perkara-perkara kebaktian dan amal kebajikan.

Dengan pelaksanaan perkara-perkara yang disebutkan diatas maka murid akan berbeza dengan kelakuan, perbuatan dan perangai manusia ramai (manusia lain) dimana mereka didalam alam khayalan dan dunia yang menjadi buruan mereka. Disinilah letaknya keistimewaan murid yang senantiasa berada dijalan Allah dan selalu melonjak-lonjak keinginan untuk melaksanakan ketaatan kepada Allah Taala. Maka cara ini akan membuat murid minat dan suka untuk mengasingkan dirinya daripada segala perkara yang boleh menghalang dirinya untuk beribadat kepada Allah swt dalam apa bentuk rupa pun”.

Seorang murid harus tidak menyia-yiakan nafasnya, sangat berkira dengan masanya, tidak akan membiarkan masa itu berlalu, samada sedikit ataupun banyak, melainkan dihabiskannya dalam membuat kerja-kerja yang akan mendekatkannya kepada Tuhan, iaitu amal dan bakti yang akan mendatangkan manfaat untuk akhiratnya.

Keterangan:

“Maksud ayat diatas seperti berikut;

1. Janganlah kamu menyia-yiakan nafas yang telah diberikan oleh Tuhan kerana Dia memberinya berlandaskan sebab (ada tujuan) dan bukan percuma. Dia padang mashyar kelak akan dihadapkan pada Tuhan dan akan ditanya tentang nafas yang telah diberikan olehNya dengan soalan ‘apa yang telah kamu lakukan (gunakan) nafas yang diberikan olehKu’. Allah Taala menjadikan kamu dari tidak ada kepada ada. Maka diberikan nafas supaya kamu dapat hidup dan senantiasa bersyukur padaNya dan tujuan yang sebenarnya adalah untuk kamu mengabdikan kepadaNya. Itulah KEHIDUPAN DIDUNIA.

2. Jangan sekali-kali kamu membiarkan waktu (masa) berlalu begitu saja. Jangan sekali-kali berada didalam keadaan lalai kepadaNya. Biarpun kita bersama keluarga, semasa bekerja, semasa berniaga dan lain-lain. Isikan (selitkan) waktu itu untuk sentiasa mengingatiNya, dimana bila mengingatiNya, maka akan datang kesyukuran yang dipanjatkan kepadaNya. Isikan masa kamu dalam membuat perkara-perkara yang boleh mendekatkan diri kamu kepada Tuhan dengan jalan beramal dan mengerjakan kebaktian yang ada manfaat (ada kebaikan dan kelebihannya) untuk dibawa keakhirat”.

Seorang murid harus mengatur suatu masa khas untuk setiap amal dan ibadatnya, ditunaikan segala amal dan ibadat itu pada masanya yang tertentu, tidak dicuaikan atau ditinggalkan sesuatupun daripadanya samada dalam masa susah atau masa senang. Hendaklah ia memperbanyak membaca alQuran alKarim dengan mentadabburkan (meneliti) makna-makna dan mentartilkan lafaz-lafaznya.

Keterangan:

“Langkah seterusnya yang harus diamalkan seperti berikut;

1. Salah satu cara mudah untuk setiap murid senantiasa berada didalam pengabdian kepada Allah adalah menguruskan masa khas dengan bijak supaya dapat menjalankan amal ibadahnya. Tidak kira samada murid itu bekerja, berniaga atau pun tidak, hendaklah pandai mengaturkan waktunya pada pagi, petang dan malam untuk melaksanakan amal ibadah. Allah Taala memberi kamu 24 jam sehari. Dari 24 jam itu berapa jam yang kamu boleh berikan

kepada Allah? Hanya untuk bersama denganNya. Ini juga adalah salah satu tanda kesyukuran seorang hamba kepada Tuannya. Yang dimaksudkan disini bukan pelaksanaan diatas perkara kefardhuan (wajib). Masa khas adalah diluar waktu fardhu kerana terletaknya terima kasih kepadaNya. Kefardhuan adalah perkara yang diperintahkan olehNya tetapi masa khas adalah dari seorang hamba ikhlas untuk TuhanNya.

2. Sesudah mengariskan masa khas setiap hari. Seterusnya harus bersifat amanah dan tidak cuai (lalai) didalam menunaikan masa khas itu samada dimasa susah ataupun senang, dimasa kuat ataupun penat. Sekiranya gagal melaksanakan masa khas bererti tidak amanah terhadap Tuhanmu. Disinilah kekuatan pengorbanan yang sebenar dapat diukur setiap orang. Adakah daya pengorbanan pada diri untukNya atau tidak? Kalau tidak, mengapa perkara-perkara yang lain dapat dikerjakan? Seperti bekerja, berniaga, berkumpul dengan kawan-kawan, bersama dengan sanak famili, duduk depan TV, mendengar lagu-lagu dan lain-lain. Mengapa? Tanyalah pada diri sendiri, jawapannya ada pada diri.

3. Sekiranya dapat melakukan masa khas ini pada masa yang ditetapkan dalam keadaan susah dan penat, masyallah, pertolongan dariNya akan sentiasa diberikan olehNya. Pasti.

4. Memperbanyakkan membaca AlQuran dengan meneliti maknanya. Bukan lagunya. Kamu bukan nak masuk pertandingan bukan? Jadikan bacaan AlQuran sebagai rutin harian kerana dapat membantu menguatkan hati”.

Ketika membaca itu, hendaklah merasakan kebesaran Zat Tuhan yang seolah-olah sedang berkata-kata kepadaNya, sedang dia membaca bicara itu. Janganlah membaca alQuran, sebagaimana yang dibaca oleh orang-orang yang alpa dan lalai. Mereka membaca alQuran dengan lidah yang fasih dan suara yang merdu, akan tetapi hatinya kosong dari khusyu' ada ta'zhim. Mereka membaca alQuran dari awal hingga akhir, sedang mereka tiada faham satu pun dari maksud dan maknanya dan mereka tiada tahu kerana apa alQuran itu diturunkan. Jika mereka tahu, niscaya mereka akan mengamalkan segala kandungannya. Sesungguhnya ilmu itu akan berguna apabila diamalkan. Orang yang berilmu tetapi tiada mengamalkan ilmunya, niscaya tiada beza antaranya dengan orang yang jahil, melainkan dalam suatu segi saja; iaitu Allah Taala akan menjadikan hujjah (bukti) atas dirinya di Hari Kiamat. Dengan ukuran ini, maka si jahil itu akan lebih bernasib baik dari si alim yang tiada beramal di Hari Kiamat. Sebab itu ada pepatah mengatakan; “Setiap ilmu yang tiada membawa manfaat ke atas dirimu, maka lebih baik engkau kembali jahil saja”.

Keterangan:

“Bab anjuran untuk memperbanyakkan membaca alQuran; dengan pencapaian zauk (perasaan) kebesaran Zat Tuhan ketika membaca hendaklah menyakinkan pada dirinya sedang berkata-kata dengan Kalam Allah, melalui Kalam Allah. Perasaan ini tidak akan dapat dengan cepat melainkan dengan diistiqamah amalan membaca alQuran secara rutin dan istiqamah. Insyallah dengan keyakinan yang tipis akan menjadi tebal didalam proses kesabaran dan disertai juga dengan berdoa kepadaNya. Dilarang bagi kamu membaca alQuran seperti orang-orang yang lalai dan didalam keadaan lupa. Bermaksud; sekiranya kamu menyakini yang diri kamu berkata-kata melalui KalamNya selagi gus denganNya, mana mungkin berada didalam keadaan orang yang lalai dan lupa. Mungkin akan terfikir bagaimana mungkin seseorang dapat mencapai keyakinan yang begitu tinggi sebegitu? Benar, kita adalah manusia yang diciptakan oleh Allah Taala yang penuh dengan dosa dan noda. Yang sentiasa lupa dan lalai, walaupun hati kita menginginkan untuk kedekatan denganNya.

Fahamkan, yang penting disini adalah pelaksanaan yang dianjurkan olehNya iaitu dapat menjalankan apa yang disuruh olehnya dengan niatan untuk dekat kepadaNya. Walaupun hati kita lalai dan lupa pada tahap awal pelaksanaan tetapi hakikat sudah dekat denganNya bilamana tangan mencapai alQuran dan membaca KalamNya dengan KalamNya. Itulah kehampiran yang kita tidak dapat melihat! Soal menyakini adalah diatas kemurahan kurniaNya, bila Dia hendak memberikanNya, asalkan kerja jalan. Insyallah.

Janganlah kamu membaca alQuran dengan lidah yang fasih (lancar) dan suara yang merdu (suara yang sedap aja) tetapi hati kosong dari khusyu' dan ta'zhim (perasaan membesarkan apa yang dianjurkan olehNya). Jagalah hati kamu jangan sampai kosong dari khusyu'. Ini boleh digantikan dengan cara berpegang pada niat yang kuat iaitu hanya melaksanakan apa yang disuruh olehNya, inilah selemah-lemah niat yang boleh disandarkan pada peringkat permulaan.

Mari bangun membaca alQuran didalam keadaan faham akan maksud, makna dan perintahNya. Kerana itulah alQuran diturunkan kepada umat Muhammad saw. Caranya ialah dengan membaca alQuran dengan membaca tafsiran supaya kita dapat faham akan maksud, makna dan apa yang diperintahNya. Dengan cara begini akan capai tahap suka mengamalkan isi kandungan, suruhan dan tegahan dariNya. Kerana ilmu pengetahuan tidak akan berguna apabila tidak diamalkan.

Hanya orang yang benar-benar berilmu akan mengamalkan ilmu pengetahuannya dan itu akan membezakan dirinya dengan orang jahil (orang yang bodoh). Apa itu orang yang bodoh dari segi makna sebenarnya? Orang yang bodoh adalah orang yang tidak ada perasaan takut pada Allah Taala. Jadikanlah diri sebagai manusia yang bernasib baik dengan mengamalkan ilmu dan jangan letakkan diri lebih hina dari orang yang jahil kerana tidak mahu mengamalkan ilmu pengetahuan. Jangan menceburkan diri kepada ilmu yang tidak mendatangkan faedah, maka tidak, lebih baik berada jahil seperti semula. Ambil langkah-langkah ini setapak demi setapak, insyallah lambat laun akan capai ke-tempat yang di-idam-idamkan”.

Sembahyang Tahajjud DiTengahmalam

Adakan masa untuk kamu bangun bertahajjud ditengahmalam, sebab malam itu adalah waktu seorang hamba berkhawatir dengan tuannya. Oleh itu hendaklah kamu memperbanyak tadharru' dan istighfar ditengahmalam. Jangan lupa bermunajat kepada Tuhan kamu dengan bahasa yang merendah diri dan berserah diri dengan hati yang penuh yakin tentang kelemahan dan ketidak-upayaan diri. Awas, jangan sekali-kali kamu abaikan bangun ditengahmalam. Jangan sampai waktu berjaga malam itu tiba melainkan kamu segera bangun serta berzikir kepada Allah swt.

Keterangan:

“Alhamdulillah, syukur pada Allah Taala yang telah menjadikan malam supaya manusia dapat istirahat badan selepas mencari rezki pada siang hari didunia supaya dapat menyehatkan badan untuk meneruskan pencarian rezkiNya yang telah ditaburkan oleh Para Malaikat pada malam hari berikutnya dan keesokan hari.

Subhanallah, Maha Suci Allah, yang telah menjadikan malam itu juga sebagai majlis khas untuk para hambaNya yang menginginkan bantuan, perlingungan, pertolongan, keselamatan, kesejahteraan, keampunan dan keridhaanNya dari segala gangguan dunia dan keselamatan akhirat sesudah menjalan kewajipan-kewajipan sebagai manusia. Dimana Dia dengan sifat kasih sayangNya telah membentangkan permaidani sambil menunggu hambaNya datang untuk

mendengar permohonan dengan menghadapkan wajahnya kepada wajahNya yang suci. Setiap malam tanpa henti dan tanpa jemu, diturunkan rahmat dariNya dan Dia memberi, membahagikan dan menurunkan pada sesiapa yang menginginkan bantuan, perlingungan, pertolongan, keselamatan, kesejahteraan, keampunan dan keridhaanNya hanya duduk dipermaidani yang sudah dibentangkan olehNya dengan menundukkan muka, merendahkan suara kepada Kebesaran dan KeagunganNya dengan di iringi kesedaran sifat Kasih SayangNya, sambil meluahkan segala ketidakmampuan dan kelemahan diri untuk menjalankan kewajipan-kewajipan ketaatan dan menjauhkan diri dari segala perkara maksiat dan laranganNya dengan tidak menceburkan diri dalam perbuatan bida'ah dan juga berserah diri kepadaNya. Dimanakah boleh dapat pemberian yang sebesar begini? Pada hal, Dia yang menunggu, kita yang lalai (tidor). Dia hendak membahagi, kita tidak mahu menerima. Kita yang buta mata hati dan berdetik soalan dari hati, Kenapa? Nak buat apa? Aku penat! Aku mengantuk. Besok nak kerja. Besok ada rancangan dengan famili. Besok ada meeting besar, Besok meeting penentuan, mungkin aku boleh jadi kaya, Besok nak jumpa kawan. Sekarang aku bersama kawan-kawan. Sekarang aku bersama kaum kerabat dan banyak-banyak lagi soalan yang akan dikeluarkan oleh hawa nafsu. Mungkin itu yang akan tercetus dari lubuk hati kamu. Semua perkara yang jahat adab ini dapat dengan mudah lakukan. Macam ada loceng (alarm) memberitahu akan urusan-urusan yang wajib ditepati. Daifnya kita. Lemahnya diri dan tebal punya bodoh. Mudah-mudahan tidak.

Sebenarnya kita dihadang olehNya (tak dapat melihat hakikatnya)! Dengan tidak ada kefahaman itu maka kita diberatkan lagi oleh hawa nafsu dan syaitan. Maka dengan itu wahai setiap murid, adakan masa (mengetepikan masa) untuk bangun bertahajjud ditengahmalam untuk duduk dipermaidani yang telah dibentangkan dan beribadahlah, mengakulah dirimu menghendaki bantuan, perlindungan dan pertolongan dan merayulah kepadaNya sekuat tenaga dan berserah diri kepadaNya, bukan dengan cara berpekik-pekik, jangan salah faham. Asyik salah faham yang diikuti, tak paham, tak nak Tanya. Bodoh lagi, bila nak keluar dari tong kebodohan! Asyik malu nak tanya konon, sebenarnya rasa sudah pandai. Masyallah. Nauzubillah. Jangan abaikan dirimu terlenu oleh peluhkan hawa (bukan pelukan dunia) yang mengaysikkan. Jangan waktu malam datang kamu masih dipembaringan atau dilalaikan oleh makhluknya. Bangunlah dan berzikirlah kepadaNya”.

Memelihara Sembahyang Lima Waktu

Hendaklah para murid mengambil berat dalam mendirikan sembahyang lima waktu dengan menyempurnakan berdirinya, bacaanya, khusyu'nya, ruku'nya, sujudnya dan seterusnya terhadap rukun-rukun dan sunnat-sunnatnya. Sebelum memulakan sembahyang hendaklah kamu ingat didalam hati bahwa kamu akan berhadapan dengan Tuhan yang Maha Mulia dan Maha Agung. Ingat, jangan sekali-kali kamu bermunajat kepada Raja dari sekalian raja dan Pembesar dari sekalian pembesar dengan hati yang lalai, terlenu didalam awang-awangan kealpaan dan waswas, menerawang didalam lapangan angan-angan dan pemikiran keduniaan, kelak kamu akan dimurkai Allah Taala dan dihalau dari pintu menuju kepadaNya. Rasulullah saw bersadba;

“Apabila seorang hamba berdiri untuk menunaikan sembahyang, maka Allah Taala akan memerhatikan gerak-gerinya. Apabila sihamba menoleh kebelakang. Allah Taala akan berkata kepadanya: Hai anak Adam! Engkau telah menoleh kepada siapa yang lebih baik lagi bagimu daripadaKu! Jika ia menoleh lagi, Allah Taala akan berkata sekali lagi seperti yang tersebut tadi. Jika ia menoleh kali ketiga, maka Allah Taala akan memalingkan perhatianNya dari orang itu”

Kalau orang yang menoleh dengan wajahnya yang zahir saja, Allah Taala telah memalingkan perhatian daripadanya, apatah lagi jika ia memalingkan hatinya didalam sembahyang kepada urusan-urusan keduniaan dan keindahannya, tentulah lebih-lebih lagi. Allah Taala tidak melihat kepada tubuh badan manusia dan perkara-perkara yang zahir akan tetapi Dia memandang hati manusia dan batinnya.

Keterangan:

“Dalam Bab ini, Habib Abdullah AlHaddad menyuruh setiap salik dan setiap murid wajib mengambil berat dalam mendirikan sembahyang lima waktu yang difardhukan oleh Allah Taala kerana ini adalah tanda tanda bagi mereka yang beriman seperti berikut;

1. Kewajipan sembahyang diwajibkan keatas setiap manusia yang sudah baligh atau sudah mengalami mimpi, cukup umurnya dan dapat membezakan mana yang baik dan mana yang buruk. Kewajipan ini akan gugur bila seseorang yang mengalami keuzuran, gila dan nyayuk. Bila tidak ada keuzuran yang disebutkan tadi maka kewajipan sembahyang tidak boleh ditinggalkan. Kalau ditinggalkan maka hukunya berdosa.

2. Pengucapan dua kalimat syahadat hendaklah dilafazkan kerana pengucapan (ikrar) kepada Allah Taala iaitu pengakuan jauh didalam hatinya bahwa Allah adalah Tuhannya dan pengakuan bahwa Muhammad adalah RasulNya. Bererti bila seseorang yang sudah baligh dan membuat pengucapan syahadat maka kewajipan sholat dilaksanakan pada dirinya. Sekiranya dia tidak membuat pengucapan pada dua kalimat syahadat itu walaupun dia sudah mencapai usia baligh maka haram untuk dirinya mendirikan sholat kerana tidak ada pengakuan dari dirinya.

3. Sholat adalah tanda seseorang yang mengamalkan perintah Tuhannya sekaligus menunjukkan perbezaan antara orang yang hanya mengaku beriman dan yang tidak beriman. Yang bertopeng dan yang tidak bertopeng. Yang mengaku beragama Islam pada hal tidak. Yang hanya memakai nama Islam tetapi tidak mengamalkan ajaran Islam dan tidak patuh pada perintah dan menjauhi larangNya. Maka berdosalah dia kepada Tuhannya.

4. Sholat adalah batas pemisah antara seseorang yang beriman pada Allah dan RasulNya dan seseorang yang tidak mendirikan sholat mereka termasuk dalam kumpulan musyrik dan fasiq. Perbezaan yang sangat ketara dan jauhkan dirimu dari mereka yang dicapkan oleh Allah Taala dan RasulNya sebagai orang yang musyrik dan fasiq kalau nak selamat didunia dan diakhirat. Kalau tak nak selamat go ahead aje . . .

5. Sempurnakan segala Rukun Sholat dan Sunnat-sunnatnya. Kalau tak tahu dan tak faham, pergi belajar. Kerana untuk menyempurnakan qiyam (berdiri), rukuk dan sujud dan segala sunnat-sunnat boleh dipelajari melalui bab rukun-rukun sholat dan sunnat-sunnat sholat.

6. Harus mengambil berat tentang bacaan surah-surahnya dengan tartil dan mengetahui maknanya. Kerana dapat membantu dirinya untuk mendapatkan khusyu’.

7. Sebelum menginjakkan kaki kesejadah hendaklah kamu tanamkan dalam hati bahwa dirimu akan berhadapan dengan Allah Taala Yang Maha Mulia, Maha Agung (Besar) dan Maha Pengasih dan Penyayang.

8. *Jangan berdoa pada Allah dengan hati yang lalai, hati yang tidak tertumpu pada kebesarannya. Tekankan selalu didalam sembahyang bahwa Dia Maha Melihat dan Maha Mendengar bilamana kamu berada didalam hati yang lalai. Amalkan selalu cara ini.*

9. *Jauhkan dirimu bila berhadapan dengannya dari was-was. Kerana was-was itu adalah tiupan dari syaitan yang tidak mahu kamu menumpukan perhatian kamu padanya.*

10. *Jangan ikutkan pikiran kamu yang melayang pada angan-angan dan memikirkan dunia (dalam sholat, ingat apa nak buat lepas sholat) ini juga adalah hembusan dari syaitan.*

11. *Ingat, bilamana kamu menunaikan sholat, Allah Taala akan memerhatikan segala gerak-geri kamu. Jangan bermain dengan tubuh badanmu! Kalau kamu menoleh kebelakang (bermaksud; hilang perhatian kamu sampai ketiga kali, maka Allah akan memalingkan perhatiannya dari kamu). Ingat!*

Jauhkan dirimu dari segala yang disebutkan diatas supaya kamu tidak mendapat kemurkaan (kemarahan) Allah Taala dan dihalaunya diri kamu dari pintu (bermaksud ingat) menuju kepadanya.

Roh Ibadat

Ketahuilah, bahwa roh semua ibadat dan maksudnya, ialah menghadirkan diri dihadirat Allah swt. Barangsiapa yang mengerjakan ibadat yang kosong dari menghadirkan diri, maka ibadat itu sia-sia dan tiada berguna. Perumpaan orang yang tiada menghadirkan diri dihadirat Allah Taala didalam peribadatnya, samalah seperti seorang yang menghadiahkan kepada seorang Maharaja barang yang rosak, ataupun sebuah peti yang kosong tiada berisi apa-apa. Bukankah sepatutnya orang ini mendapat siksa dan tidak diberi balasan terhadap hadiahnya?

Keterangan:

“Bab ini tersangat penting bagi semua muslimin, murid dan salik kerana ia berkaitan dengan Ibu Ibadah. Maka perkara ini tidak boleh diambil mudah atau diperkecilkan atau tidak dihiraukan maka akibatnya semua ibadahnya menjadi rosak dan tidak diterima oleh Allah Taala. Segala perbuatan ibadah ketaatan, pengabdian dan segala amal-amal kebajikan akan menjadi sia-sia belaka tetapi apa yang didapati hanya penat lelah dan sangkaan yang salah kerana mengangap diterima ibadahnya.

Maka maksud Roh Ibadat dari Habib Abdullah Alwi Al-Haddad ialah menghadirkan diri dihadirat Allah Taala. Maksud menghadirkan diri adalah berhadapan dan menumpukan perhatian kepada Allah dimana bukan saja berhadapan dengan hati tetapi dengan jiwa dan raga dimana terbagi didalam 3 bahagian seperti berikut:

Ketaatan, Pengabdian dan Amal Kebajikan:

1. *Ketaatan; Dilaksanakan dalam menuruti segala perintah dan menjauhi segala larangan dari Allah Taala seperti; sholat, puasa, zakat dan haji. Ini yang dikatakan ketaatan dan beruntunglah bagi sesiapa yang dapat melaksanakannya dengan baik.*

2. *Pengabdian; Dilaksanakan dalam penghambaan terhadap Allah Taala. Iaitu melayani segala suruhan dan menjauhi segala larangan Tuan (Tuhan)nya itulah kerja sihamba. Kalau tidak dapat melayan kehendak Tuan, bukan hamba namanya.*

3. *Amal Kebajikan; Dilaksanakan dalam perkara-perkara sunnah yang dibawa dan ditunjukkan oleh Nabi Muhammad saw, para sahabat beliau dan para salaf seperti, sholat sunnat, puasa sunnat, berzikir, berdoa, membaca AlQuran dan segala perkara yang berhubungan diantara manusia dan manusia.*

Beruntunglah bagi sesiapa yang dapat melaksanakan dengan baik dan dengan sempurna akan ketiga-tiga perkara diatas dan amat rugilah bagi sesiapa yang tidak melaksanakan atau melaksanakan dengan tidak baik dan dengan tidak sempurna.

Ketahuilah; ketiga-tiga perkara itu wajib disertakan dengan kehadiran diri (hati) jika menginginkan keridhaan dari Allah Taala.

Langkah-langkah yang mudah untuk menghadirkan diri didalam ketaatan, pengabdian dan amal kebajikan seperti berikut;

Untuk ketaatan yang paling penting ialah KEHADIRAN DIRI (HATI) dimana tanpanya maka pelaksanaan ketaatan ditolak dan tidak berguna. Ambillah langkah-langkah seperti;

- a) Faham akan segala rukun sholat, dimana letaknya sah dan batalnya. Dimana wajib dan dimana sunnat dan pelaksanaannya.*
- b) Memohon keizinan dariNya supaya dapat melaksanakan perintah suruhannya dengan baik sebelum sholat.*
- c) Berabdab dengan baik dan menyakinkan diri kamu akan berhadapan kepada wajahNya. Seperti kamu berhadapan dengan seorang raja dunia atau orang mulia samada bersangkutan pada dunia ataupun akhirat. Maka berhadapan denganNya haruslah lebih-lebih lagi.*
- d) Menanamkan keyakinan bahwa Dia melihat (memperhatikan perbuatan kamu yang zahir batin) dan mendengar segala apa yang keluar dari lidah dan hati kamu.*
- e) Tanamkan keyakinan bahwa Allah Melihat dan Mendengar (sekiranya kamu lemah didalam menghadapkan hati dan wajah kamu).*
- f) Mengangkat takbir dengan penuh khusyu' disertakan dengan menzahirkan kaabah (bagi sesiapa yang lemah keyakinannya bahwa Allah Melihat dan Mendengar) dengan perasaan merendahkan diri kepada Kebesaran dan KeagunganNya.*
- g) Hendaklah memahami takbiratul ihram akan maknanya yang sebenar.*
- h) Memahami makna surah-surah yang dibaca dan wajib memahami makna surah fatihah.*
- i) Membaca tahiyat awal dan akhir dengan penuh kesedaran dan memberi salam kepada Nabi Muhammad saw dengan seikhlas-ikhlasnya dengan menghadapkan hati kamu ke maqamnya.*
- j) Semasa rukun sujud hendaklah bermohon padanya dan membuat pengakuan kepadaNya dengan ikhlas.*
- k) Memberi salam dengan merasai akan terpisahnya diri kamu dan kembali ke dunia.*

Begitulah langkah-langkah yang sederhana yang harus diterapkan semasa mendirikan ketaatan didalam sholat bagi setiap muslimin.

Jangan sekali-kali kamu tidak menghadirkan hati dan jiwa raga kepadaNya kerana perbuatan kamu itu akan mengundang akan KemarahanNya dan boleh mendapat bencana di dunia ini kemudian diakhirat kelak dikeranakan kamu tidak beradab bila berhadapan denganNya tetapi

boleh beradab dengan makhluknya terutama manusia.

Sekiranya fikiran kamu melayang sebentar maka lekas-lekas menanamkan keyakinan bahwa Dia Maha Melihat dan Maha Mendengar”.

Melazimkan Jum'at dan Jemaah

Wahai murid yang budiman, Awas, jangan sekali-kali kamu meninggalkan sholat Jum'at dan mengabaikan sholat berjama'ah, kerana yang demikian itu merupakan adat dan kebiasaan orang yang cuai, dan tanda-tanda bahwa orang itu adalah bodoh dan jahil.

Sesudah itu, hendaklah kamu memelihara sunnat-sunnat rawatib yang disyara'kan sebelum dan sesudah sholat fardhu. Kemudian hendaklah kamu tunaikan pula sholat Witir dan Dhuha. Jangan lupa mengisi masa antara Maghrib dan Isya' dengan ibadat. Kemudian hendaklah kamu tidak sesiakan pula masa sesudah Subuh hingga terbit matahari dan masa sesudah Ashar sehingga matahari terbenam, kerana kedua-dua masa ini adalah masa-masa mulia, dimana berbagai-bagai kurnia akan dicurahkan keatas hamba-hamba Allah yang menunjukan permohonannya kepada Allah Taala.

Adapun mengisi masa sesudah Subuh dengan ibadat, khususnya akan membawa rezki untuk anggota zahir; iaitu makan-minum untuk badan. Manakala mengisi masa dengan ibadat selepas Ashar, khususnya akan membawa rezki untuk anggota batin; iaitu makanan rohani untuk hati. Perkara ini telah dicubakan oleh orang-orang yang memiliki pandangan batin dari para arif dan mereka yang mempunyai kedudukan yang tinggi disisi Allah Taala.

Didalam sebuah hadits ada tersebut, bahwa sesiapa yang terus duduk ditempat sholatnya berzikir kepada Allah selepas bersholat Subuh adalah lebih terjamin mendapat rezki daripada orang yang belayar diperantauan orang kerana mencari rezki.

Keterangan:

“Penegasan seterusnya yang disampaikan oleh Habib Abdullah Alwi AlHaddad kepada semua murid dan salik jangan sekali-kali meninggalkan sholat Jum'at dan mengabaikan sholat berjama'ah tanpa keizinan syara'a. Bagi setiap murid dan salik yang meninggalkan sholat Jum'at dan tidak mengabaikan sholat berjama'ah adalah pertanda orang itu cuai (tidak mengambil berat agamanya), tanda orang yang bodoh (tidak memahami agamanya).

Lihat akan kata-kata cuai diatas secara lebih mendalam. Cuai yang ditegaskan disini adalah mereka yang tidak mengambil berat atau tidak mengambil kesah agamanya. Tidak mengambil berat yang macam mana? Disinilah letaknya keshahihan dari setiap murid dan salik. Dimana syarat keshahihan terletak pada pengakuan, niat yang sebenar, tujuan hati yang hakiki. Ketiga syarat shahihan inilah yang membuktikan akan kebenaran pengakuan, niat dan tujuan setiap murid dan salik. Sekiranya salah satu dari syarat keshahihan ini pincang maka goyanglah keshahihan yang lain. Kecuaian ini tidak akan berlaku sekiranya syarat-syarat keshahihan dipegang dengan erat (kuat) kerana kekuatan pegangannya selari dengan pengakuan, niat dan tujuan yang hakiki yang dicarinya untuk mencapai kehampiran dengan Allah Taala.

Belakunya kecuai pada syarat keshahihan adalah kerana pincang salah satu atau ketiga-tiga syarat tersebut menunjukkan tidak ada kebenaran pada syarat keshahihan, pendek kata kebohongan terhadap Allah, tipu diri sendiri, bertopengkan iman, ada maksud, (maksud yang diinginkan) merasa berat didalam menuruti perintah dan larang agama dan lain-lain.

Kesemua ini adalah berpunca dari kebodohan dan kejahilan dirinya sendiri kerana tidak memahami agama yang dianuti secara mendalam dan tidak mempunyai keyakinan tetapi hanya mengikuti sistem ikut-ikutan, adat istiadat saja.

Yang paling bahaya adalah meletakkan kedudukan Tuhan dibawah dan meletakkan kedudukan manusia (makhluk ciptaan Allah) diatas. Mengapa begitu? Lihatlah pada perbuatan diri sendiri. Mengapakah perintah dari manusia boleh dituruti dengan mudah, senang dan dengan kerelaan hati walaupun badan merasa penat dan hati menolak? Tidak kira hari dan waktu dapat dilaksanakan perintah mereka . . . Tetapi kenapa perintah dan larangan Tuhan tidak dapat dituruti? Bukankah itu petanda yang kamu meletakkan Tuhan dikaki kamu dan meletakkan manusia (makhluk) diatas kepala . . . Renungkanlah baik baik . . .

Dilarang keras bagi murid dan salik supaya tidak meninggalkan dan mengabaikan sholat Jum'at kerana hari Jum'at terlalu banyak rahsia-rahsia dan kurnian limpahan dari Allah Taala bagi sesiapa yang dapat melaksanakan fardhu Jum'at dengan baik dan sempurna. Diantara kebesaran hari dan fardhu Jum'at yang telah digariskan oleh Syeikh Khalid Abu Shalih didalam kitabnya yang berjudul; Hukum Adab_Keutamaan & Peringatan Dari Sebahagian Kesalahan Hari Jum'at adalah seperti berikut;

Dari Abu Hurairah ra beliau berkata; Rasulullah saw bersabda:

“Allah simpangkan dari hari Jum'at umat sebelum kita, dahulu Yahudi memiliki (hari agung) pada hari Sabtu dan Nashrani pada hari Ahad. Kemudian Allah datangkan kita dan Allah anugerahi kita dengan hari Jum'at, lalu Allah jadikan hari Jum'at, Sabtu dan Ahad. Demikianlah, mereka adalah kaum yang akan mengikuri kita pada hari kiamat sedangkan kita adalah umat terakhir dari penduduk dunia, namun umat yang awal pada hari kiamat, yang diadili (pertama kali) sebelum makhluk-makhluk lainnya” (HR Muslim)

Allah Taala berfirman;

“Hai orang-orang beriman, apabila kamu diseru untuk menunaikan sholat Jum'at, maka bersegeralah kamu mengingati Allah” (QS Al-Jumu'ah: 9)

Lihatlah betapa besarnya kurnian pemberian Allah Taala yang telah menjadikan hari Jum'at sebagai garis permulaan bagi Umat Muhammad saw mengatasi hari Yahudi dan Nashrani dan mengangkat Umat ini sebagai umat yang pertama kali dihisab sedangkan umat ini adalah umat yang terakhir dari makhluk lain-lain seperti hadits dari Abu Hurairah ra. Dan juga lihatlah akan firman Allah Taala diatas yang memerintah orang-orang beriman untuk menunaikan sholat Jum'at (perintah ini tidak dikenakan pada orang-orang yang tidak beriman. Maka pada saat hari Jum'at tiba dan kamu meninggalkan atau mengabaikan sholat Jum'at berarti kamu tidak termasuk orang-orang beriman pada saat itu. Kenapa begitu? Senang aje. Tidak melaksanakan fardhu Jum'at. Fahamilah firman Allah Taala dan maksud ayat yang sangat jelas).

Diantara fadhilat hari Jum'at adalah;

- 1. Allah Taala menjadikan Adam as pada hari Jum'at dan mematikannya pada hari Jum'at.*
- 2. Sebaik-baik hari dalam seminggu.*
- 3. Hari yang mengandungi kewajipan sholat Jum'at.*
- 4. Waktu berdoa dikabulkan.*
- 5. Bersedekah pada didalamnya lebih baik berbanding hari lain.*

6. Allah Taala memuliakan para waliNya.
7. Hari Jum'at adalah Hari Raya yang diulang-ulang setiap minggu.
8. Hari yang dihapuskan dosa-dosa.
9. Setiap langkah menuju sholat Jum'at diibaratkan seperti puasa dan sholat setahun.
10. Jahanam dimatikan apinya pada hari Jum'at setiap minggu.
11. Sesiapa yang meninggal dunia pada hari Jum'at atau malamnya merupakan tanda husnul khatimah.
12. Para Malaikat yang ditugaskan pada hari Jum'at menulis nama para jemaah yang datang awal sebelum khatib khutbah. Dan banyak lagi kurnian limpahan Allah Taala pada hari tersebut.

Maka dengan itu jangan ada murid dan salik meninggalkan atau mengabaikan sholat Jum'at melainkan yang dibenarkan oleh syara'a.

Bila keyakinan semakin kuat pada syarat-syarat keshahihan maka beralihlah untuk memelihara sunnat-sunnat rawatib yang disyara'kan sebelum dan sesudah sembahyang fardhu. Para ulama mengatakan hikmah mengerjakan sembahyang sunnat rawatib adalah seperti menampal pada sembahyang fardhu dimana kekurangan-kekurangan didalamnya. Ini adalah diibaratkan oleh para alim ulama. Sholat sunnat rawatib bukan saja mengerjakan apa yang disyariatkan oleh agama malah mengikuti sunnah Nabi Muhammad saw kerana beliau mengerjakan. Begitu juga dengan sholat Witir dan Dhuha. Kesemua perkara sunnat-sunnat ini dapat dikerjakan bilamana memahami agama dan mengikuti syarat keshahihan yang telah diikrarkan pada Allah Taala. Jangan lupa bermohon padaNya untuk dipermudahkan dalam melaksanakannya.

Selain itu jangan lupa mengisikan masa antara sholat maghrib dan isyak dengan ibadah seperti sholat sunnat, membaca ratib, membaca tahlil, berzikir, berdoa dan lain-lain sehingga waktu isyak tiba.

Murid dan salik juga tidak dibenarkan mensia-siakan masa sesudah sholat subuh sampai matahari naik, begitu juga tidak mensia-siakan waktu ashar sehingga matahari terbenam. Kerana kedua masa itu mengandungi masa-masa mulia dimana berbagai kurnian akan diberikan keatas hambanya yang menunjukan permohonannya ikhlas kepadaNya.

Mengisikan masa sesudah subuh dengan ibadah akan mendatangkan rezki untuk anggota zahir seperti keperluan makan dan minum. Manakala mengisi masa sesudah ashar akan mendatangkan rezki untuk anggota batin seperti makanan rohani untuk hati. Perbuatan ini telah diamalkan oleh orang-orang yang memiliki pandangan batin dari para arif dan juga mereka yang mempunyai kedudukan disisi Allah Taala. Maka dengan itu iktulah mereka supaya dapat bersama-sama dengan mereka.

Berpeganglah kamu pada sebuah hadits yang mengatakan; "Sesiapa yang terus duduk ditempat sholatnya berzikir kepada Allah selepas sholat subuh adalah lebih afdal (utama) untuk mendapat rezki dibandingkan orang yang pergi diperantauan orang kerana mencari rezki. (fahamkan hadits ini)".

Peranan Zikír

Perkara yang utama bagi orang yang menuju ke jalan Allah, sesudah mengerjakan perintah dan meninggalkan larangan, ialah berzikir kepada Allah swt. Wahai murid yang budiman, berzikir

kepada Allah Taala dengan lisan dan dengan hati, pada setiap munasabah dan pada setiap waktu dan tempat.

Adapun zikir yang terkumpul didalamnya segala maksud zikir-zikir dan tujuan-tujuannya yang zahir mahupun batin, iaitu sebutan *La ilaaha illallaah* (Tiada Tuhan melainkan Allah). Zikir inilah yang wajib dilazimkan oleh orang-orang permulaan menuju ke jalan Allah dan yang wajib kembali kepadaNya oleh orang-orang yang telah sampai ke kemuncak makrifatullah.

Sesiapa yang ingin merasakan sesuatu rahasia dari rahasia-rahasia thariqat dan disingkap tabir baginya dengan sesuatu cahaya Nur Hakikat, maka hendaklah ia melazimkan diri dengan berzikir kepada Allah Taala dengan hati yang hadir, penuh adab dan tertib dengan tujuan yang benar serta tawajjuh (menghadapkan diri) yang penuh khusyu' dan tawaddhu.

Apabila semua sifat-sifat ini terkumpul pada diri seseorang ketika berzikir, maka mudah tersingkap baginya *al-Malakut al-A'la* (kerajaan Allah yang maha tinggi) dan rohnya akan mencapai ke kemuncak *Haqaaiq al-Alam al-Ashfa* (hakikat-hakikat alam yang suci) dan mata hatinya akan melihat dengan jelas *al-Jamal al-Aqdas al-Asmaa* (kecantikan suci yang maha tinggi).

Keterangan:

“Kepada para murid dan salik yang memiliki cita-cita yang sebenar. Sesudah mengerjakan perintah dan meninggalkan laranganNya hendaknya jangan sekali-kali meninggalkan zikir kepadaNya. Berzikirlah (Ingatlah padaNya) dengan lidah dan hati yang sedar tanpa lalai disetiap kali pada setiap waktu dan tempat. Zikir sangat mujarab dan amat berkesan dan akan menjadi sebagai pendinding bagi sesiapa yang dapat mengamalkan dengan baik sehingga menjadi darah daging. Zikir ini akan bertindak sebagai pelindung dan sebagai peringatan bagi pengamalnya didalam mengharungi kehidupan dunia dan diakhirat kelak. Sekali lagi jangan tinggalkan zikir. Sebagai tanda bagi sesiapa yang tidak meninggalkan zikir harian, adalah merupakan tanda ada perhubungan yang dijalinan dan atas izin Tuhannya.

Zikir yang paling utama bagi setiap murid dan salik yang berthariqat adalah La ilaaha illallaah. Inilah zikir yang teragung, yang tertinggi bagi segala zikir-zikir. Dengan kalimat inilah Nabi Muhammad saw diutuskan kedunia dengan tugas menyampaikan perintah TuhanNya bahwa Tiada Tuhan melainkan Allah. Zikir inilah yang harus dilazimkan oleh dimana terkumpul didalamnya segala maksud zikir-zikir dan tujuan yang zahir ataupun batin. Maka jangan tinggalkan atau abaikan dalam apa juga keadaan. Zikir Tahlil atau dinamakan juga Zikir Tauhid adalah pengamal-pengamal permulaan menuju kejalan Allah juga wajib dilazimkan bagi mereka yang berkeinginan untuk kembali kepadaNya dan juga bagi mereka yang telah sampai ke puncak makrifatullah.

Bagi sesiapa (murid dan salik) yang ingin mendapatkan dan merasakan sesuatu rahasia-rahasia thariqat dan tersingkapnya tabir yang menghalanginya dengan sesuatu maka hendaklah sentiasa berzikir dengan Zikir Tauhid dengan hati yang hadir (menyadari apa yang dibacanya), dengan beradab serta tertib juga bersandarkan tujuan yang benar (tidak ada apa-apa hajat yang melencong), menghadapkan dirinya dengan penuh khusyu' serta dengan kerendahan hati dan ikhlas. Insyallah atas izin Allah akan tercapailah hajat untuk mencapai rahasia-rahasia tersebut.

*Bila mana kesemua syarat dan sifat sudah terkumpul pada seseorang yang berzikir maka akan tersingkaplah baginya *al-Malakut al-A'la* iaitu dapat melihat kerajaan Allah yang Maha*

Tinggi) dan rohnya akan mendaki, naik ke puncak Haqaiq al-Alam al-Ashfa iaitu dapat melihat hakikat sebenarnya alam-alam yang suci yang dimiliki oleh Allah dan mata hatinya akan dapat melihat dengan jelas al-Jamal al-Aqdas al-Asmaa iaitu keindahan yang suci dan sifat-sifat nama ketuhanan yang Maha Tinggi”.

Lazimkan Diri Bertafakkur

Hendaklah kamu memperbanyak bertafakkur yang terbahagi kepada tiga:

- 1) Tafakkur dalam keajaipan kudrat Tuhan Maha Berkuasa dan keindahan Kerajaan langit dan bumi. Buah tafakkur ini ialah untuk mencapai makrifat (pengenalan) kepada Allah swt.
- 2) Tafakkur dalam anugerah Tuhan dan nikmat-nikmatNya yang begitu banyak diberikan kepada makhluk-makhlukNya. Buah tafakkur ini ialah untuk mencetuskan perasaan cinta terhadap Allah swt.
- 3) Tafakkur dalam urusan dunia dan urusan akhirat dan hal-ehwal semua makhluk-makhlukNya yang berkecimpung didalam kedua-dua kehidupan tersebut. Buah tafakkur ini ialah untuk timbul sifat membelakangkan dunia serta cenderung kepada akhirat.

Kami telah pun membincangkan secara terperinci ketiga-tiga bab tafakkur ini serta buah-buahannya didalam kitab ***Risalatul-Mu'awanah***, siapa yang ingin menambah ilmu, sila rujuk kepada kitab tersebut.

Keterangan:

“Dalam bab tafakkur ini disuruhnya membanyakkan bertafakkur. Apa itu tafakkur? Tafakkur adalah merenungi akan segala ciptaan Allah Taala dan mengambil segala ibarah (contoh) juga mengintai dan melihat apa yang terlindung dibelakang ciptaanNya itu. Adakah dengan merenung, mengintai dan melihat aje atas segala ciptaanNya akan dapat jawapan pada apa yang terlindung dibelakang ciptaanNya? Bukan semudah itu . . .

Tafakkur sebenarnya ialah pengambilan dari ilmu pengetahuan oleh akal zahir kepada akal yang bersuluhkan nur (cahaya Allah). Tahap ini terjadi sebagai perbincangan bila bertafakkur menjalankan tugasnya didalam merenungi segala ciptaan Allah Taala dengan penangkapan penglihatan yang zahir bersandarkan ilmu pengetahuan kepada akal yang bercahaya dari Allah Taala. Diri sendiri yang bertanya dan diri yang menjawab. Dengan bantuan dan pertolongan cahaya nur dapat membukan kefahaman terhadap perkara-perkara yang tidak difahami oleh akal zahir sebelumnya. Tugas diri yang bertanya mendapat jawapan yang memuaskan dari tugas diri yang menjawab. Perkara tersebut hanya boleh dilakukan bila perjalanan sudah teguh bermaksud diri dapat menjalankan perintah suruhan dan menjauhi laranganNya.

Memperbanyak bertafakkur dalam keajaipan kudrat Tuhan Maha Berkuasa dari ciptaanNya dan keelokkan (kecantikan) pada segala yang ada dilangit dan bumi. Dengan melihat akan keajaipan ciptaanNya akan membawa kepada kebesaran dan keagunganNya dan membuahkan keyakinan lebih yakin lagi akan sifat Tuhan Yang Maha Berkuasa. Hasilnya ialah akan tercapailah makrifat iaitu pengenalan kepada Tuhan.

Memperbanyak bertafakkur dalam pemberian nikmat-nikmatNya yang begitu banyak sekali pada diri sendiri dan kepada semua makhluk-makhluk ciptaanNya. Pertama sekali duduk

sejenak dan lihatlah diri yang diluar dan didalam dari hujung rambut sampai hujung kaki. Hitunglah (kiralah) berapa banyak pemberian nikmat yang diberikan olehNya. Kemudian beralihlah pada keluarga, keliling diri setelah itu kepada semua makhluk-makhlukNya. Pokoknya, tidak akan dapat menghitung (mengira) nikmatNya yang dicurahkanNya. Perkara ini akan mendatangkan perasaan cinta, kasih, sayang terhadap Allah swt kerana pada sifatNya Yang Maha Permurah dengan tidak kira bulu.

Memperbanyak bertafakkur dalam urusan dunia mahupun akhirat dan hal-ehwal urusan (pentadbiran) semua makhluk-makhlukNya yang menjalani kedua-dua kehidupan tersebut. Lihatlah urusan-urusan dunia, bila melangkah kaki. Nikmat apa yang telah disediakan olehNya? Kalau tidak dapat melihat nikmatNya maka itu petanda problem besar. Urusan dunia sebenarnya bermula dari dalam rumah sendiri. Lihatlah, selidikilah, jangan nak berkepit aje dengan isteri dan anak-anak, itu juga problem namanya. Nak sedap sedap aje. Konon-konon menjalankan tanggung-jawab. Itu semua tipu juga kerana tak dapat melihat pentadbiranNya urusanNya yang telah disusunkan cantik-cantik buat keperluan semua makhlukNya. Sekarang, beralih ke urusan dunia diluar, lihatlah betapa banyak nikmat pemberianNya yang ditaburkan buat keperluan untuk mencari rezki yang halal dan diredhai olehNya. Malangnya, oleh kerana manusia tidak pernah merasa puas dan selalu rasa tamak dan mengejar dunia sampai terlindung oleh mata zahir dan mata hati akan pentadbiranNya dimana Dialah Yang Maha Pengasih Penyayang dan sumber Segala Rezeki buat diri. Begitu juga dengan urusan akhirat, baik didalam rumah atau diluar rumah dimana Dia sudah menyediakan waktu untuk datang kepadaNya pada waktu yang telah ditetapkan untuk mensyukuri nikmat pemberianNya. Bila seseorang dapat melihatNya didalam segala urusan pentadbiran keperluan, maka akan bersyukurlah kepadaNya. Perkara ini akan mendatangkan sifat zuhud, tidak tamak dan tidak meletakkan dunia didepan mata, mahalan sentiasa bersedia kembali kepadaNya dengan membanyakkan INGAT kepada akhirat”.

Bagaimana Menolak Sifat Malas Untuk Bertaat

Wahai murid yang budiman! Jika kamu dapati didalam diri kamu sifat malas untuk mengerjakan ketaatan dan berat untuk melakukan kebajikan, maka hendaklah kamu pimpin diri kamu itu ke alam cita-cita dan harapan. Kamu harus mengingatkannya apa yang telah dijanjikan oleh Allah swt terhadap orang-orang yang beramal dalam ketaatan kepada Allah Taala bahwa mereka akan memperoleh kemenangan yang besar dengan mengecap kenikmatan yang kekal dan mendapat keridhaan Allah Taala sehingga dibenarkan tinggal kekal disurga-surgaNya yang amat luas itu. Disamping itu mereka akan diberi kemuliaan, penghormatan, pangkat dan darjat disisi Allah swt dan disisi sekalian hamba-hambaNya yang dimuliakan.

Keterangan:

“Alhamdulillah, atas kemurahan Allah Taala, maka telah sampai pada tajuk yang sangat-sangat mustahak bagi setiap murid dan salik untuk merenung dan meneliti sedalam-dalamnya supaya dapat meneruskan perjalanannya yang terhenti dan mengikuti segala saranan yang harus dipatuhi sekiranya masih dibebani oleh soalan ‘kenapakah aku sangat malas untuk melakukan ketaatan? Bagaimana harus aku memperolehi apa yang aku inginkan?’

Insyallah, atas inayah Allah Taala akan dijelaskan perkara-perkara yang harus dipegangi oleh setiap murid, salik dan pencari jalan lurus yang hakiki.

Secara ringkas, mengapakah kita semua dibebani dengan rasa malas, suka dan senang sekali memandang perkara-perkara ketaatan untuk taat pada perintahNya dan menjauhi

laranganNya dan juga melakukan kebajikan-kebajikan yang dapat membawa ke akhirat sebagai sesuatu yang tidak merugikan bagi diri. Mengapa???

Mengapakah mudah sekali melakukan pelanggaran terhadap segala perintah-perintahNya?

Sudah menjadi takdir bagi setiap manusia (setiap anak Adam as) yang ingin kembali kepada TuhanNya akan dihalang, diganggu, dipalingkan niatnya daripada mencari kebenaran yang hakiki oleh Iblis laknatullah kerana itu adalah perjanjian antara Allah swt dan iblis. Maka, iblis mendapat kebenaran oleh Allah untuk menggoda semua manusia yang mencari kebenaran dan memesonkan niat mereka dari menuju kepadaNya dan Allah Taala mengancam iblis, bahwa iblis tidak akan dapat menggoda dan memesonkan hati hambaNya yang ikhlas terhadap diriNya untuk kembali kepadaNya.

Dibawah ini adalah panduan yang ringkas dan padat dimana harus diikuti oleh setiap murid, salik juga kepada pencari kebenaran untuk mengenal pasti dimana kesilapan, dimana kelemahan diri dan juga samada kebenaran niat dan tujuan hatinya benar atau tidak, secara ringkas seperti berikut:

1. Hendaknya memperbanyakkan syukur kepada Allah Taala yang telah memilih diri untuk tampil kedepan, menyahut panggilanNya. Mengapakah harus begitu? Cuba fikir dengan tenang. Begitu banyak sekali manusia dibumi, kenapa ada rasa ingin tahu? Kenapa ada perasaan seolah-olah ada sesuatu yang mendorong untuk mencari kebenaran? Kenapa ada sesuatu menyuruh mendekati diri kepada agamaNya dan mendalami ajaran agamaNya? Kenapa ada perasaan bahwa diri kehilangan sesuatu dan memerlukanNya? Kenapa datang kesedaran bahwa mati adalah kepastian dan dihisab atas segala kelakuan perbuatan semasa hidup dibumiNya? Kenapa ada pengakuan qiyamat itu benar, surga itu benar dan neraka itu benar? Kenapakah ada perasaan Allah itu ada dan wujud??? Bukankah itu satu panggilan? Bukan itu satu 'jemputan'? Bukan itu satu kurnian? Bukan itu satu nikmat? Bukan itu sesuatu yang tidak ternilai?

*Sekiranya tidak juga terbuka mata hati, kembali pada soalan diatas tadi, mengapakah seruan itu datang, sedangkan berapa banyaknya manusia dibumi ini yang tidak mendapat seruan? Bukankah itu namanya 'MANUSIA YANG DIPILIH TUHAN?' Kalau masih tidak jelas lagi, maka banyakan berdoa, mohon akan petunjuk dariNya. Sekiranya masih tidak jelas lagi dan tidak yakin ianya satu 'jemputan dariNya', ayat apa yang harus kami contohkan??? Kami mohon kepadaNya, mudah-mudahan mata hati kamu dan kami dapat memahami keterangan ini. Kalau tidak, mustahil seruan itu datang dan Allah Maha Suci dari segala perbuatan kesilapan. Hanya terpulang pada diri untuk terima 'jemputan' itu ataupun tidak. Belum lagi hamba yang diUTAMAKAN! Sekira kamu terima 'jemputan' itu, maka akan datang 'HAMBA YANG DIUTAMAKANNYA'. **Kalau masih tidak nampak lagi, JANGAN BACA LANJUTAN KETERANGAN INI!. Mengapa? Kerana kamu pasti akan buang masa saja!!!***

2. Alhamdulillah, pada keterangan selanjutnya, setelah memahami dan menyakini bahwa kamu adalah 'manusia yang dipilihNya'. Dimana rasa keinginan menjaga nikmat kurniaNya. Sekiranya belum lagi faham dan yakin, bererti kamu adalah manusia yang tidak amanah! Kerana membaca keterangan selanjutnya! Bukankah perbuatan itu tidak amanah namanya! Bila sudah tidak amanah, bukankah itu 'MUNAFIQ' namanya?! Astagfirrullah!!! Ini baru, keterangan perihal kedua dimana amarah diatas kamu tidak patuhi. Perkara sekecil itu kamu tidak mengindahkan, apa lagi yang selebih-lebihnya. Itu yang kami maksudkan. 'kamu pasti akan buang masa saja';

Kami yakin pada Allah Taala bahwa Dia tidak akan membawa keterangan selanjutnya kalau mata hati masih belum terbuka dan kamu bukan 'manusia pilihan'.

3. Ni yang best! Mengapa ada sifat malas. Mengapa susah sangat untuk mengerjakan ketaatan? Mengapa berat sangat punggung diangkat untuk menjalankan amal kebajikan? Bila teringin membuat ketaatan ataupun amal kebajikan akhirat, berat mata rasanya? Datang mengantuk? Datang penat? Datang rintangan dan halangan? Datang apa ajelah, ceritanya ada 'SIFAT MALAS'. Kalau dah dipilih oleh Tuhan sebagai manusia pilihan, mengapa ada benda-benda ni? Itulah tugas dan peranan Iblis yang telah diterangkan diatas tadi. Iblis menjalankan tugas dan peranannya untuk menghalang kamu menuju kebenaran daripada menyahut seruanNya. Iblis pun menginginkan pengikut-pengikutnya. Iblis tidak mahu masuk Neraka seorang aje. Tak best! Mesti ada Member, baru best!

Iblis akan mengganggu kamu sampai kamu masuk liang lahat! Tidak ada tetapi, itulah takdirNya yang Maha Bijaksana. Maka disinilah datangnya dugaan Tuhan kepada 'manusia pilihanNya', adakah kamu benar-benar menginginkannya? Benar-benar menginginkan segala soalan-soalan yang datang dari hati kamu terjawab? Maha Suci Allah Taala, Dia Maha Mengetahui Segalanya. Tetapi, Dia dengan bijaksana dan kesempurnaan sifatNya meletakkan 'pilihan' kepada manusia, supaya manusia tidak menunjuk jari padaNya dihari pengadilan kelak.

4. Hendaklah membawa diri kepada cita-cita, niat dan tujuan yang sebenar, penuh dengan harapan didalam perjalanan dan pengorbanan. Ingatkan diri untuk kembali pada tujuan sebenar yang telah di ikrarkan. Ingatkan diri sentiasa bahwa kamu adalah salah seorang yang dipilihNya, bermaksud mendapat keizinan dariNya untuk menuju kepadaNya dan akan mendapat pertolonganNya dalam apa bentuk wajah kesukaran kerana kamu adalah manusia yang dipilihNya.

Alangkah indahnya sekiranya mata hati dapat melihat akan janji Tuhan. Bila kamu meneruskan perjalanan dan menahan segala sedih, sakit, perit untuk menuju kepadaNya dengan sanggup berkorban demi untuk Dia, dimana segala kesedihan, kesakitan, keperitan dan kesukaran akan dilindungiNya. Masyallah! Subhanallah! Mohonlah padaNya untuk dibuka mata hati supaya dapat melihat dan merasai kurnia-kurnianNya.

5. Sekiranya susah dan sukar untuk menerapkan tujuan seperti diatas. Cuba mencontohi RasulNya, NabiNya, Sahabat-sahabatnya, Imam Para Salaf, Para Salaf, Para AuliyaNya, Para Alim Ulama dan Para Guru-Guru. Mengapa demikian? Rasulullah saw bersabda: 'Barangsiapa yang ingin menuju (kenal) akan TuhanNya hendaklah mengikuti aku. Barangsiapa mengikuti aku, dia menuju (kenal) pada TuhanNya'. 'Barangsiapa taat pada Allah hendaklah taat pada Rasul. Barangsiapa taat pada Rasul, dia taat pada Allah'. Bagaimana pula dengan mereka yang sesudah Rasul? Rasulullah saw bersabda; 'Barangsiapa yang taat pada para ulama, dia taat padaku, barangsiapa taat padaku, dia taat pada Allah'. 'Para ulama adalah pewaris Nabi, barangsiapa duduk dengan mereka, dia duduk bersamaku'. 'Duduklah bersama orang-orang yang mulia, bertanyalah pada ulama dan bergaullah dengan orang yang bijak'.

Setiap murid, salik dan pencari kebenaran sudah pasti mengenali mereka. Samada dengan berjumpa langsung atau dari mereka yang sudah berjumpa mereka atau dari belajar ilmu (agama) atau dari membaca kitab-kitab. Maka dengan keberkahan dari perbuatan itu datang

keinginan untuk mendekati diri kepada Tuhan. Datanglah kesedaran yang didalam kesesatan, datanglah kesedaran didalam kelalaian, datanglah perasaan untuk bersama-sama dengan mereka, datanglah keinginan yang mendalam untuk dapat bersama-sama dengan mereka diakhirat kelak. Dengan itu berpeganglah pada niatan yang benar pada mereka kerana mereka yang berhubungan dengan mereka akan dihubungkan mereka kepada kamu. Insyallah.

6. Ingatkan pada diri apa yang dijanjikan oleh Allah Taala terhadap orang-orang yang beramal dan taat kepadaNya. Berpandukanlah AlQuran, Hadits dan Khabar dari Para Alim Ulama. Maka akan memperolehi kemenangan yang besar dan menikmati dapat bersama dengan mereka dan mendapat keridhaan Allah Taala dan melihat wajahNya yang mulia. Dibenarkan tinggal kelak didalam surga bersama dengan mereka yang dicintai. Mendapat kemuliaan, penghormatan, pangkat dan darjat disisi Allah Taala dan bersama hamba-hambaNya yang dimuliakan.

7. Sekiranya kamu merasakan diri minat atau terlintas dalam hati untuk melakukan perkara-perkara yang salah dari sisi syara' dan berkeinginan kuat untuk melakukan maksiat dan dosa, maka harus meluruskannya (membetulkan niat hati).

Disinilah peranan Iblis, Syaitan dan kunci-kuncunya memainkan peranan mereka untuk menghalang, memesongkan niat dengan apa juga cara, tak kira apa aje . . . asalkan tidak dapat meneruskan, mengerjakan ketaatan, mengerjakan ibadah, mengerjakan amalan-amalan yang mendekati diri kepada Tuhan. Iblis dan Syaitan akan memegang punggung supaya jangan berganjak dari tempat duduk. Sekiranya mereka (iblis dan syaitan) tidak dapat menahan kamu, maka dihembuskan ditelinga akan rasa penat, mengantuk, berat mengangkat punggung, penghabisannya kamu akan mengatakan pada diri; tak pe . . . kejap lagi . . . relax dulu . . . baring sekejap . . .

Sekiranya Iblis dan Syaitan tidak dapat menahan kamu dari mengerjakan ketaatan dan ibadah maka ditiupkan kedalam hati untuk kasihan pada isteri (nak tolong isteri buat kerja), kasihan dengan anak-anak (bermain dengan mereka), mengemas rumah luar dan dalam. Maka terkeluarlah perkataan; 'kejap aje . . . kesian . . . tolong isteri pun pahala . . . (benar tolong isteri pahala tetapi terkeluar waktu, pahala ape tu . . .) kesian dengan anak-anak (yang merindukan ayahnya) tetapi tidak dapat melihat ruhnya merindukan Tuhannya.

Tak dapat juga Iblis dan Syaitan menahan kamu dari mengerjakan ketaatan dan ibadah, maka masuklah mereka kedalam hati dan meludahi hati, maka datanglah kebisuan kamu kerana ludah mereka seperti patri (welding) dimulut. Maka didatangkan mereka-mereka yang sayang kepada kamu dan kamu sayang kepada mereka untuk melayani hajat-hajat mereka, duduk borak-borak dengan mereka. Walaupun terasa jauh didalam hati bahwa perbuatan itu salah kerana belum mengerjakan ketaatan dan ibadah. Hati memekik-mekik tetapi mulut kamu terkunci. Meronta-ronta untuk meninggalkan mereka yang sayang kepada kamu. Tak terangkat punggung, seperti gam dikerusi. Ikut ketawa dengan mereka walaupun kamu tidak mahu ketawa. Apa boleh buat, nak jaga hati mereka yang sayang kepada kamu. Kalau aku berkasar nanti apa kata dia. Tak pe . . . lah boleh qadak dan mohon ampun. Senangggg nya hati berkata begitu. Powernya! Habislah sudah . . .

8. Inilah saat yang dinantikan untuk menjalankan peranan dengan sepenuh tenaga, disini kecintaan kepada Allah dapat diketahui, sejauh mana?, disini kecintaan kepada RasulNya dapat diukur serapat mana?, disini kasihnya pada ibadah dan amalan-amalan lainnya dapat

dilihat samada ditujukan kepada Allah atau bukan? Disinilah 'PENGORBANAN' yang harus diterapkan, tinggikan, jalankan untuk menunjukkan kepada Allah bahwa kamu sanggup berkorban demi untukNya. Seperti mana Iblis dan Syaitan menjalankan peranan mereka untuk menghalang kamu dari mengerjakan ketaatan dan ibadah-ibadah lainnya. Mereka (Iblis dan Syaitan) dapat berbangga kepada Allah dengan pengorbanan mereka, dapat menahan hamba-hamba Allah dari bangun mengerjakan ketaatan. Kalau kamu baru nak berkorban, Iblis dan Syaitan sudah mendahului kamu dalam rangka 'pengorbanan'. Sesungguhnya kita sudah ketinggalan jauh terhadap Iblis dan Syaitan. Hanya JIHAD, JIHAD, JIHAD, saja yang dapat memihak kepada kita dan ini semua memakan masa. Inilah yang dikatakan hakikat cubaan dan dugaan sebenarnya. Supaya dapat melihat betapa teguh keimanan kita semua.

Saatnya sudah diketahui, maka pukullah diri kamu (hati) dengan cabuk yang menakutkan! Cabuk (cemeti) yang menakutkan. Bagaimana hendak dapat cabuk yang menakutkan! Sedangkan didunia kamu tidak takut dengan pukulan cabuk. Mengapa begitu? Sebab belum pernah dipukul oleh cabuk (cemeti)! Tu sebab kamu naik lemak, bukan lemak didalam badan aje tapi lemak pada akal fikiran! Tu yang problem. Lemak tebal sangat, zahir dan batin sampai kebenaran nak masuk pun tak boleh. Kenapa? Kebenaran tak dipakaikan tank oksigen dah! Kebenaran takut pada lemak sebab lemak boleh memutar-belitkan kebenaran!

9. Bagaimana harus kamu meninggikan syiar Islam? Bagaimana untuk sentiasa berada didalam keadaan sentiasa 'INGAT'? Bagaimana untuk berpegang pada niat dan tujuan supaya tidak tersasar dari jalan yang lurus? Kembalilah kepada hadits Rasul saw yang mengatakan; 'Duduklah bersama orang-orang yang mulia, bertanyalah pada ulama dan bergaullah dengan orang yang bijak'

Inilah jalan yang terbaik dan paling mudah. Duduk bersama orang-orang mulia dan bertanya pada ulama dan bergaullah (adakan perhubungan) dengan orang yang bijak (orang ariffin). Mengapa begitu? Bukankah kita boleh beramal tanpa mendekati diri bersama dengan mereka? Bukankah AlQuran, Hadits sudah jelas sebagai pedoman hidup didunia dan akhirat?

Disinilah kamu tidak dapat melihat apa yang tersirat. Disinilah kamu tidak dapat memahami apa yang sebenarnya diperintahkan oleh kamu. Lihatlah sejarah Nabi kita saw. Beliau sendiri mempunyai guru yang menunjukkan pada beliau saw. Lihatlah sejarah Nabi Musa as. Beliau pun berguru. Kalaulah Rasul dan Nabi berguru, bolehkah kamu dapat menghuraikan apa-apa yang tersirat hanya dengan membaca sendiri atau mendengar dari bukan ahlinya? Disinilah datangnya kesalahfahaman . . .

Dekatkan diri dengan mereka supaya terangkat hijab kamu. Dapat mengenali langkah-langkah musuh yang menghalangi diri untuk bertaat dan beramal.

10. Takutilah diri dengan ayat-ayat AlQuran yang jelas terhadap hamba-hambaNya yang mendurhaka kepadaNya. Sesiapa yang menderhaka kepadaNya akan diazab dengan siksa yang sangat berat dan pedih. Diri akan dihina dan dikeji dan akan dihalau serta dihalang daripada mendapat segala kenikmatan dunia dan akhirat.

11. Membanyakkan membaca AlQuran dan tumpukan pada makna-maknaNya. Bukan pada lagunya. Melainkan nak masuk pertandingan! Insyallah, bila ada istiqamah dalam membaca alQuran akan mendapat cahaya petunjuk dariNya. Membanyakkan berdoa mohon petunjuk dariNya. Banyakkan berzikir (ingat) kepadaNya;. Ini semua boleh membantu, insyallah atas izinNya.

12. *JANGAN* sekali-kali mencampakkan diri ke dalam golongan orang-orang yang memandang ringan terhadap suruhan dan larangan Allah Taala. *JANGAN* dekat dengan orang-orang yang tidak kesah dengan perintah Tuhan! Hendaklah sentiasa memandang berat apa yang dipandang berat oleh Allah dan RasulNya.

Mengapa larangan diatas sangat jelas dan keras sekali? Mengapa dilarang, jangan bercampur-gaul dengan mereka yang memandang berat segala perintah dan larangan Allah Taala? Mesti ada cerita, kalau tidak kenapa dilarang?

Inilah masalah yang paling berat sekali didalam kehidupan sebelum ajal datang. Lebih berat dibandingkan melakukan ketaatan, lebih berat melakukan amal dan lebih berat mengerjakan ibadah! Kamu dengan senang dan mudah, mampu menjauhkan diri dengan orang-orang yang mengambil berat terhadap perintah Allah, tetapi sayang, kamu tidak mampu, tidak boleh, tidak terdaya dan tidak mahu untuk menjauhkan diri dengan mereka yang tidak kesah dengan perintah Tuhan! Kamu lebih senang bercampur-gaul dengan orang yang tidak memandang berat, apa yang dipandang berat oleh Allah dan RasulNya.

Tidak takutkan kamu akan keterangan diatas itu? Tidakkah kamu faham akan keterangan itu? Masih tak nampakkah kamu akan perbuatan kamu yang meninggikan mereka yang tidak memandang berat, apa yang dipandang berat oleh Allah dan RasulNya?! Jadi, kamu meletakkan Allah dan RasulNya dimana???

Disinilah letaknya buta mata hati. Disinilah nampak dengan jelas samada kamu mempunyai agama atau tidak? Tak kiralah, samada baru belajar atau dah puluhan tahun belajar. Yang jelasnya, kamu masih bercampur-gaul dengan mereka yang memandang berat segala perintah dan larangan Allah Taala? Masih bersama dengan mereka yang tidak kesah dengan perintah Tuhan! Tidak boleh pisah dengan mereka yang tidak memandang berat, apa yang dipandang berat oleh Allah dan RasulNya.

Sekali lagi, kamu tidak boleh berpisah dengan mereka, maka Allah dan RasulNya pun tidak boleh bersama dengan kamu. Senang aje . . . pilihlah. Perhatikan tindak tanduk perbuatan kamu, dimana kamu letakkan Allah dan RasulNya?

Lagi-lagi bila ada seseorang yang kamu harapkan dapat memberi sesuatu. Dan juga pada seseorang yang telah kamu berikan jasa. Juga pada mereka yang pada pandangan mata kamu sebagai seorang yang ada ilmu tetapi tidak dapat melihat akan tidak ketaatan kepada Tuhannya dan lain-lain lagi. Inilah sebagian dari mereka yang tidak boleh pisahkan atau jauhkan dari kehidupan kamu! Kerana apa? Masih bersandarkan pada mereka dan tidak boleh dipisahkan. Buktinya? Senang aje. Bila yang tidak ada ketaatan, tidak akan ada amanah dalam sifat mereka dalam menghubungi kamu, maka dengan tersengeh-sengeh dalam hati ingin mendengar sesuatu dari mereka yang boleh memberi sesuatu. Bukankah senang namanya tu . . .

13. *Hendaklah setiap murid, salik dan pencari kebenaran beramal semata-mata kerana Allah Taala. Bukankah Dia itu Tuhan kamu dan kamu hambaNya. Kalau kamu terima Tuhan itu Tuhan kamu, maka hapuskan mereka yang bermuka-muka. Hapuskan sandaran pada mereka. Yakinkan pada diri bahwa kamu adalah hambaNya bukan hamba kepada manusia. Bila kamu dapat menghapuskan yang tersengeh-sengeh itu, insyallah kamu dapat bersama dengan Tuhan dan mengakui, kamu adalah hambaNya. Hilangkan segala sandaran selain pada Allah Taala.*

14. *Sentiasa bermohon kepadaNya supaya dapat bersama dengan RasulNya dan mereka yang mencontohi RasulNya dan melindungi kamu dari nerakaNya bagi tempat hambaNya yang durhaka kepadaNya dengan rahmat dan belas kasihNya.*

15. *Seperti yang telah dijelaskan diatas pada bagian no 3. Iblis dan Syaitan tidak akan melepaskan kamu sampai kamu masuk lobang kubur. Inilah semangat yang begitu tinggi sekali pada diri mereka, mereka tidak ada istilah putus asa, penat, relax dulu dan lain-lain. Jihad terus! Sekiranya kamu boleh mencapai kesungguhan seperti mereka, insyallah semuanya jalan dengan baik.*

Maka langkah syaitan seterusnya; tidak akan berhenti dari menghembuskan bisikan-bisikan kotor dan keji. Dengan mengatakan bahwa Allah Maha Mengetahui bahwa kamu penat, gi relax dulu . . . Dia Maha Pengasih. Dia tidak zalim. Maka termakan juga dibuatnya kamu. Jika syaitan terkutuk membisik kepada kamu; Sesungguhnya Allah Taala itu Maha Kaya, Dia tidak berhajat kepada amal dan segala ketaatan kamu tidak akan mendatangkan apa-apa manfaat bagiNya, sebagaimana segala kemaksiatan juga tidak akan menyebabkan sesuatu yang mudharatkanNya. Ketika itu hendaklah kamu menjawab kepadanya; Memang benar, kata engkau itu, wahai syaitan. Akan tetapi aku ini fakir, sangat berhajat kepada rahmat Tuhanku, dan berhajat kepada amal saleh dan ketaatanku kerana kedua-duanya akan menyebabkan akan memperolehi manfaat yang banyak, sedang maksiat pula akan membahayakan diriku. Perkara ini telah diberitahukan oleh Tuhanku didalam KitabNya yang mulia menerusi lidah RasulNya.

Jika syaitan berkata lagi; Sekiranya engkau tercatat sebagai seorang yang bahagia disisi Allah, maka bukankah engkau tidak syak lagi akan masuk syurga, tidak kira engkau seorang yang banyak membuat taat atau banyak membuat maksiat. Tetapi jika engkau tercatat sebagai seorang yang celaka disisiNya, maka engkau akan dimasukkanNya kedalam neraka, meskipun engkau seorang yang taat; bukankah semua itu sudah tercatat didalam azali?

Masa itu hendaklah kamu tidak terpengaruh dengan kata-katanya, sebab perkara yang akan datang itu adalah perkara ghaib; tidak ada seorangpun yang mengetahuinya, melainkan Allah Taala semata, dan tidak ada seorang pun yang boleh campur tangan dalam urusan ini. Akan tetapi ketaatan itu adalah bukti dan dalil yang menunjukkan masa depan yang bahagia, dan antara syurga bagi orang yang taat hanya harus mati dalam ketaatannya. Sama juga dengan maksiat yang merupakan bukti dan dalil yang menunjukkan masa depan yang celaka dan antara neraka bagi orang yang mendurhaka itu hanya harus mati dalam kemaksiatannya”.

Jalan Menuju Allah

Ketahuilah wahai murid bahwasanya permulaan jalan menuju kepada Allah itu sabar dan kesudahannya syukur, ataupun permulaannya siksa dan kesudahannya gembira, ataupun permulaannya susah dan sukar dan kesudahannya terbuka semua pintu, tersingkap segala rahasia dan tiba ke kemuncak cita-cita dan harapan; iaitu makrifatullah sampai ke hadhrat Allah, bermesra-mesra dengan berada di sisiNya bersama para MalaikatNya. Sesiapa yang mengiringkan semua urusannya dengan sabar yang elok, niscaya ia akan memperoleh segala kebaikan, akan sampai kepada semua cita-cita dan tujuan serta berjaya mendapat segala maksud yang dicari.

Keterangan:

“Tajuk diatas ‘jalan menuju allah’ sangat menarik sekali untuk difahami. Pembahasan ini akan membawa kita memperolehi jawapan yang hakiki, seperti; Adakah aku diatas jalan yang benar? Adakah jalanku menuju kepada Allah? Dimanakah kedudukanku sebagai murid? Pembahasan ini akan membawa kita semua, tidak kira thariqah apa yang dianuti? Kerana kita akan membicarakan sumber kebenaran dari akar umbi sampai memperolehi buahnya, insyallah. Mari kita sembang-sembang untuk mengetahui jawapan yang tersirat didalam tajuk ini.

Bagi murid-murid yang mempelajari kitab ‘Risalatul Murid’ berbahagialah kerana dengan izinNya kamu dapat mempelajari salah satu kitab dari Imam Habib Abdullah b Alwi AlHaddad yang sangat bermanfaat, mudah dan sangat jelas petunjuk yang diberikan beliau kepada semua salik dan murid. Dan bagi pencari kebenaran berbahagialah dengan kitab-kitab pengajian yang seiring dengan tajuk diatas.

Insyallah, dengan kurnia taufiq dan hidayahNya mudah-mudahan diberikan kami kelonggaran untuk menghuraikan kebenaran yang hakiki bagi kita semua. Amin.

Alhamdulillah, semua mendapat seruan dariNya. Apakan tidak, kerana kamu saat ini sedang didalam kurniaNya. Sedang membaca, mengkaji, sedang meneliti, sedang bertanya dan sebagainya. Kamu sedang berhadapan denganNya kerana ingin mengetahui kedudukan dan perhubungan antara kamu denganNya.

Dibawah ini kami sertakan soalan-soalan mudah yang dapat memberi petanda atau isyarat samada kamu berada pada ‘jalan menuju allah’ ataupun tidak. Jawablah dengan benar dan ikhlas. Sekiranya terdapat pada soalan-soalan dimana sedang mengamalkan, alhamdulillah. Sekiranya tidak, ambil lah langkah-langkah untuk memperbaiki mana-mana yang tersasar dan kembalilah kejalanNya. Kami mendoakan, mudah-mudahan kamu dan kami mendapat taufiq dan petunjuk dariNya. Amin.

‘Jalan Menuju Allah’ terletak pada pada tiga bahagian; Niat, Tujuan, & Ikhlas.

- 1. Apakah makna ‘jalan’?*
- 2. Apakah makna ‘menuju’?*
- 3. Apakah mana ‘allah’?*
- 4. Adakah kamu mengabaikan ‘haq waktu’?*
- 5. Adakah kamu mengabaikan ibadah sunnah?*
- 6. Adakah kamu mengabaikan zikir-zikir?*
- 7. Dapatkah kamu membaca AlQuran?*
- 8. Sentiasakah kamu bermunajat kepadaNya?*
- 9. Adakah kamu mengutamakan perintahNya?*
- 10. Adakah kamu menjauhkan diri daripada melakukan maksiat?*
- 11. Adakah kamu menjauhkan diri daripada melakukan perkara-perkara syubhat?*
- 12. Adakah kamu faham akan makna ‘keutamaan’ dari segi manfaat dengan manfaat? Atau wajib dengan wajib? Bagaimana kamu menilaikannya?*
- 13. Adakah kamu sanggup menjalani latihan-latihan yang diberikan oleh guru-guru kamu, terutamanya apa yang digariskan oleh Imam Habib Abdullah b Alwi AlHaddad?*
- 14. Adakah kamu dapat mengamalkan nasihat-nasihat yang diberikan oleh guru-guru kamu?*
- 15. Dapatkah kamu sentiasa mendekatkan diri kamu kepada para Ulama?*
- 16. Sanggupkah kamu berkorban seperti yang dinyatakan oleh Rasulullah saw; “Ada tiga hal (perkara) yang barangsiapa memilikinya, maka ia akan merasakan manisnya iman, (pertama)*

yaitu Allah dan RasulNya lebih ia cintai dari segala sesuatu yang lain”, “(kedua) ia mencintai seseorang semata-mata kerana Allah”, “(ketiga) ia benci untuk kembali kafir setelah Allah menyelamatkannya dari kekafiran sebagaimana kebenciannya apabila ia dilemparkan ke dalam api” (HR Bukhari, Muslim, Turmudzi, Nasai, Ibnu Majah)

17. Sanggupkah kamu bersabar didalam menjalani ketaatan kepada perintahNya?

18. Sanggupkah kamu bersusah payah (berkorban) demi untukNya?

19. Adakah kamu memandang manusia lain ‘kecil’?

20. Adakah kamu mempunyai perasaan lebih memahami ilmu agama daripada orang lain?

21. Adakah kamu seorang yang mengutamakan belajar agama?

22. Adakah kamu merasa bosan dalam mengamalkan ajaran-ajaran agama?

Ini adalah sebagian soalan-soalan asas yang membawa petanda atau isyarat kepada ‘jalan menuju Allah’. Bertanyalah, selidikilah pada diri sendiri. Sekiranya ada diantara soalan itu tidak dapat diamalkan maka kembalilah pada ‘Niat dan Tujuan’ kamu. Sekiranya tidak dapat kembali ke ‘Niat dan Tujuan’ kamu, maka itu petanda, tidak berada pada ‘jalan menuju Allah’. Apa juga jawapan yang diberikan hendaknya dengan ikhlas dan terima apa juga jawapan yang tidak menyenangkan hati. Kerana sesungguhnya itulah hakikat sebenarnya yang ada pada niat, tujuan dan keikhlasan kamu. Maka terpulanglah pada diri masing-masing.

Ketahuilah, setiap murid, salik dan pencari kebenaran, bahwasanya permulaan jalan menuju kepada Allah samada terima atau tidak harus bersabar dengan segala dugaan dan cubaan didalam menjalankan perintah dan menjauhi segala laranganNya. Permulaan langkah kamu adalah kesiksaan, apakan tidak, kerana kamu wajib membuang segala sifat-sifat yang buruk, hina dan keji yang selama ini melekat didalam hati. Dengan pengorbanan yang diberikan demi untukNya maka akan terbukalah semua pintu dan terangkatlah segala rahsia bilamana akan sampai pada puncak cita-cita dan harapan iaitu pengenalan kepadaNya dan sampai ke hadiratNya, berada di sisiNya bersama MalaikatNya.

Sesiapa yang menjalankan / mengerjakan semua urusannya baik ibadah yang bersangkutan pada dunia mahupun akhirat dengan sabar yang sempurna dan ditujukan padaNya, insyallah akan mendapat segala kebaikan dan sampai kepada cita-cita dan tujuan serta berjaya mendapat segala maksud yang dicari”.

Kategori Nafsu (Tingkatan Nafsu)

Ketahuilah wahai murid dan salik, bahwasanya nafsu itu pada mulanya ammarah *bis-su*, yakni berbuat yang jahat dan melarang yang baik. Jika seseorang itu menentanginya dengan sabar dan melawan semua ajakan hawa nafsunya, maka bertukarlah ia menjadi *lawwamah*, yakni mencela kejahatan, dengan satu muka ke darjat *mutma’innah* dan muka ke darjat *ammarah*, sekali ia menyuruh membuat jahat, dan sekali lagi menyuruh membuat baik. Jika orang itu seterusnya mendapat taufiq dari Allah swt lalu memimpin nafsunya ke jalan Allah Taala dengan pimpinan yang penuh kerelaan kepada apa yang ada disisi Tuhannya, maka ia bertukarlah lagi ketika itu menjadi *mutma’innah*, yakni membuat baik dengan merasakan penuh kemesraan dan kelazatan, dan melarang membuat jahat serta merasakan kebosanan dan kebencian.

Keterangan:

*“Tajuk kali ini bersangkutan paut dengan nafsu seseorang. Kedudukan dan perbuatan nafsu yang akan dijelaskan. Ketahuilah wahai para murid dan salik, sejahat-jahat nafsu adalah nafsu **ammarah bis-su**’ yang bermaksud nafsu (keinginan) suka dan senang serta mudah*

sekali untuk buat jahat dari segi apa juga larangan daripada hukum Allah Taala yang memerintah supaya taat kepada perintahNya tanpa memikirkannya sebelum bertindak.

*Sesiapa yang dapat menentang, menghalang dan tidak mengikut keinginan nafsu ammarah diiringi dengan kesabaran, maka itu adalah isyarat orang itu telah menaiki satu tingkat ke atas kepada nafsu **lawwamah**. Isyarat atau tanda seorang telah menduduki pada tingkatan nafsu lawwamah seperti; tidak suka mengerjakan kejahatan, tidak mahu mengerjakan apa-apa yang dilarang oleh agama.*

*Nafsu **mutma'innah** pula, adalah tempat saling tarik menarik, tempat memilih atau tempat untuk mendapatkan jawapan yang disandarkan pada kehendak TuhanNya. Kedudukan nafsu ini berada diatas tingkatan nafsu lawwamah. Yang dikatakan mutma'innah mempunyai satu muka ke darjat ammarah dan satu muka ke darjat lawwamah kerana kedua-kedua nafsu ini saling tarik menarik untuk merebut siapa yang dapat menguasai keinginan nafsu-nafsu itu. Mutma'innah-lah tempat memberi arahan kepada kedua nafsu tersebut dimana arahan itu dapat ditaati.*

Nafsu mutma'innah-lah yang mendapat kurnia dari Allah swt dan memimpin nafsu tersebut ke jalan Allah Taala dengan pimpinan yang penuh kerelaan atas apa juga keputusan yang diperintahkan oleh mutma'innah. Nafsu mutma'innah akan membuat baik dengan penuh kemesraan dan kelazatan dan melarang membuat jahat serta menghilangkan rasa kebosanan dan kebencian”.

Orang yang memiliki nafsu *mutma'innah* ini akan merasa ta'jub apabila melihat setengah manusia mengabaikan ketaatan kepada Allah Ta'ala, padahal dalam ketaatan itu terisi perasaan mesra, kelapangan-dada dan kelazatan. Sedang mereka rela melakukan maksiat dan menurutkan kehendak syahwat, padahal di dalam kemaksiatan itu terisi perasaan duka-nestapa, pahit-getir dan ketidak-tenteraman. Orang yang sudah mencapai tingkat nafsu *mutma'innah* itu menjangka bahwa mereka itu tentu telah mencapai dan merasakan kedua-dua keadaan tadi, sebagaimana ia sendiri pernah mencapai dan merasakannya. Kemudian, ia mula kembali menyelidiki dirinya sekali lagi dengan mengingatkan dirinya segala yang pernah ia rasakan sebelum itu, iaitu ketika ia mengecap kelazatan dalam menurutkan kehendak hawa nafsunya, dan ketika ia merasakan pahit-getirnya dalam menjalankan ketaatan, maka barulah ia sedar bahwa ia tidak sampai ke tingkat yang ia berada di dalamnya kini, melainkan sesudah melalui perjuangan yang panjang dan percubaan yang berat dari Allah swt.

Keterangan:

“Sifat orang-orang yang memiliki nafsu mutma'innah selalunya merasa hairan apabila melihat pada manusia yang mengabaikan ketaatan kepada Allah Taala iaitu kepada mereka yang suka meninggalkan atau meremehkan perintah Allah. Mereka merasa hairan bukanlah untuk memperkecil atau berkeinginan untuk menjatuhkan maruah mereka, tetapi hairan mereka didatangkan dengan rasa kasih sayang kepada orang-orang yang mengabaikan perintah Tuhan. Sifat mutma'innah merasa hairan kepada mereka yang mencari kelazatan (nikmat) dengan tidak puas-puas mencari nikmat dunia. Padahal bagi mutma'innah sudah merasakan bawa didalam ketaatan pada Allah Taala, mengandungi perasaan mesra (merasa cukup dengan apa yang didapati), merasa tenteram / dada yang lapang dan dapat merasai pemberian-pemberian dari Tuhannya.

Hairannya mutma'innah kepada mereka yang rela (suka/senang/mudah) melakukan maksiat dan mengikuti kehendak syahwat pada hal didalam kemaksiatan itu mengandung perasaan duka-nestapa, pahit-getir dan ketidak-tenteram.

Nafsu mutma'innah menjangka bahwa mereka itu tentu telah mendapat dan merasakan kedua-dua keadaan nafsu tersebut iaitu ammarah dan lawwamah sebagaimana dia sendiri pernah mendapat dan merasakannya.

Sifat mutma'innah ini tidak merendahkan mereka yang berada di tingkatan ammarah dan lawwamah sebaliknya akan menyiasat dirinya sekali lagi untuk mengingatkan dirinya pada segala yang pernah dia rasakan sebelum itu, iaitu ketika dia menikmati kelazatan dalam mengikuti kehendak hawa nafsunya dan ketika merasakan susah-payah dalam menjalankan ketaatan, maka barulah dia sedar bahwa dia tidak akan sampai ke tingkat yang dia berada sekarang melainkan melalui perjuangan, pengorbanan yang panjang, cubaan dan dugaan yang berat dari Allah swt”.

Lantaran itu wahai murid yang budiman, ketahuilah bahwasanya sabar dalam menjauhi maksiat dan meninggalkan semua kehendak syahwat dan sabar dalam melazimkan diri untuk mengerjakan ketaatan itulah yang akan menyampaikan kamu kepada segala rupa kebaikan, dan yang akan menjamin bagi diri kamu memperoleh kedudukan yang mulia dan keadaan yang istimewa di sisi Allah Taala. Betapa tidak, bukankah Allah swt telah berfirman;

“Wahai orang-orang yang beriman! Bersabarlah kamu dan sempurnakanlah kesabaran itu dan perteguhkan kekuatan kamu serta patuhlah kepada Allah, moga-moga kamu beruntung”
(ali imran: 200)

Telah sempurna perkataan yang baik dari Tuhan untuk anak-anak Israel disebabkan kesabaran mereka (al-a'raf: 137)

“Dan Kami jadikan diantara mereka itu beberapa pemimpin yang akan memberikan pimpinan dengan perintah Kami, apabila mereka bersabar dan mereka yakin kepada keterangan-keterangan Kami” (as-sajdah: 24)

Sabda Rasulullah saw; “Diantara kurnia-kurnia yang sangat sedikit diberikan kepada kamu ialah sifat yakin dan keteguhan dalam sabar”

Keterangan:

“Cara yang sangat-sangat mujarab bagi salik dan murid didalam melalui tingkatan-tingkatan nafsu tersebut adalah melaluinya dengan penuh kesabaran dan menjauhi segala maksiat dan meninggalkan (lari sekuat hati) kepada semua kehendak syahwat dan harus melatih diri dengan cara berusaha keras didalam mengerjakan ketaatan. Itulah yang akan menyampaikan kepada segala rupa-rupa kebaikan dan akan menjamin diri untuk memperolehi kedudukan yang mulia (baik) dan keadaan yang istimewa disisi Allah Taala.

Lihatlah diri kepada Alim-Ulama dan Guru-guru, mereka semua memiliki sifat mutma'innah. Untuk memperkuat nash ini lihat sifat mereka yang penuh kerelaan dan kasih sayang menyampaikan risalah dari Nabi Muhammad saw.

Renungkan firman Allah Taala diatas; sangatlah jelas petunjuk Allah Taala didalam memberitahu kepada hamba-hambanya dengan berfirman, ‘wahai orang-orang yang

beriman'. Ini jelas menunjukkan pada hanya orang yang beriman saja yang memiliki nafsu mutma'innah.

Apabila seorang Mukmin telah memperolehi nasib yang cukup dari kedua-dua sifat tersebut itu, yakni keyakinan dan kesabaran, niscaya ia tidak akan peduli (merasa kesal) sekiranya ada yang terlepas dari bangun ditengahmalam ataupun berpuasa disiang hari.

Keterangan:

“Orang Mukmin yang mempunyai keyakinan dan kesabaran yang teguh akan merasa kesal bilamana tertinggal apa yang selalu diamalkan pada sisi mereka . . . Oleh kerana keyakinan yang kuat yang ada disisi TuhanNya dan apa yang diamalkan oleh NabiNya, maka mereka sudah tentu merasa akan kehilangan apa yang tidak dapat dikerjakan. Bukan seperti kita yang tidak kisah langsung apa yang kita tinggalkan ibadah-ibadah kita. Itulah yang dimaksudkan oleh Hadits Rasulullah saw”.

Ujian Hidup Fakir

Adakalanya seorang murid itu diuji dengan kemiskinan, kepapaan dan kesempitan dalam kehidupan, maka sebaiknya hendaklah ia bersyukur kepada Allah Taala kerana yang demikian itu, malah hendaklah ia mengira bahwa takdir Allah Taala menjadikannya miskin, papa dan sempit itu sebagai sebesar-besar nikmat. Sebab dunia itu seteru (musuh) Allah, Dia mengembirakan seteru-seteruNya dengan keindahan dunia dan melindungi para auliyaNya daripadanya. Kamu harus mensyukuri Tuhan yang telah menyamakan kamu dengan para anbiya, para auliya dan para hambaNya yang salihin.

Keterangan:

“Setiap murid, setiap salik, setiap pencari kebenaran dan setiap manusia tidak terlepas dari ujian dan cubaan oleh Tuhan Yang Maha Berkuasa. Khususnya para murid dan salik, diuji dan dicuba dengan kemiskinan, kepapaan dan kesempitan kehidupan mereka. Salik dan murid hendaknya menerima segala ujian dan cubaan dengan hati yang rela (merasa senang dengan ujian) dan bersyukur kepadaNya kerana mentakdirkan kehendakNya menjadikan diri kamu miskin, papa dan sempit sebagai nikmat yang besar dariNya. Sekiranya kamu dapat merelakan hati dengan menerima pemberiannya maka itu petanda, kamu diatas jalan yang benar dan mendapat keridhaan dariNya.

Bukan satu perkara mudah bagi sesiapa untuk menerimanya terutama murid-murid dengan senang hati menerima kemiskinan, kepapaan dan kesempitan hidup dimuka bumi ini. Siapa yang menginginkan perkara-perkara ini? Setiap manusia menginginkan kekayaan, kesenangan dan keluasan rezki didalam penghidupan . . . Maka dengan itu mesti ada hikmah disebalik pemberian tersebut! Apakah hikmah itu??? Kami rasa kamu sudah pun mengetahuinya . . . Senang hati bermaksud menyedari ketentuan Allah belaku keatas dirinya.

Hendaklah kamu menyakini (terima) bahwa dunia adalah musuh Allah Taala. Sekiranya kamu tidak dapat menyakini bahwa dunia adalah musuh Allah, bagaimana kamu boleh dibenarkan melihat atau memahami hikmah dariNya? Menyakini dunia sebagai musuh Allah terkandung pada firmanNya didalam alQuran dan Hadits sebagaimana akan dijelaskan. Sekiranya kamu tidak menyakini bahwa dunia musuh bagiNya, bagaimana Dia akan menerima kamu? Kerana Allah Taala telah berfirman; untuk membahagiakan dan mengembirakan musuh-musuhNya dengan keindahan dan kenikmatan dunia. Adakah kamu ingin menjadi musuh-musuh Allah? Sudah tentunya tidak, bukan! Sekiranya kamu tidak mahu menjadi musuh Allah tetapi

menginginkan keindahan dan kenikmatan dunia, bagaimana keduanya boleh bersatu? Kalau keduanya boleh bersatu, itu menunjukkan sifatNya yang bersalahan! Maha Suci Allah dari perbuatan itu! Fikirkan dan Renungkanlah . . .

Mahu ataupun tidak, harus memilih satu saja, iaitu dunia atau akhirat! Sebab ada hikmahnya dan bersabarlah, wahai murid-murid.

Allah Taala mengembirakan musuh-musuhNya dengan keindahan dunia dan melindungi para auliyaNya daripada bersandar pada dunia. Maka bersyukurah, wahai murid-murid yang budiman, murid-murid yang dengan rela (senang hati) menerima ujian dan cubaan dimana Allah Taala telah menyamakan kamu dengan para anbiya, para auliya dan para hambaNya yang salihin.

Fahamkan makna ayat diatas dengan baik-baik! Siapakah yang dapat memberikan penghormatan sebegitu besar kepada kamu? Dari manakah kamu boleh mendapatkan anugerah sebegitu?

Bukankah dengan menerima kemiskinan, kepapaan dan kesempitan hidup lebih bernilai dari segala isi dunia ini? Tidak mahukah kamu, wahai murid, Allah menyamakan kamu dengan para nabiNya, para waliNya dan para salihinNya? Sudah tentunya kamu mahu! Tetapi masalahnya kamu juga mahukan kesenangan, kekayaan dan keluasan rekzi! Buatlah pilihan dengan sebaik-baiknya supaya perjalanan tidak dikotori oleh apa-apa yang melindungi diri daripadaNya”.

Bukankah Nabi Muhammad saw yang merupakan penghulu dari sekalian Rasul dan sebaik-baik makhluk Allah diatas muka bumi ini pernah mengikat batu diperutnya disebabkan terlalu lapar. Ada kalanya berlalu dua bulan berturut-turut atau lebih, sedang dapur dirumah Nabi saw tidak pernah berasap untuk memasak makanan dan sebagainya. Nabi dan keluarganya memadai dengan memakan sedikit kurma dan meminum air sejuk saja.

Keterangan:

“Allah telah memilih Nabi Muhammad saw sebagai penutup segala nabi dan rasul dan Dia juga memilih sekalian hambaNya atas Muhammad saw sebagai hambaNya yang terbaik diatas muka bumi ini. Sebagai penutup dan sebaik hamba, Muhammad saw tidak lepas dari kelaparan dan dikhabarkan bahwa beliau tidak makan selama dua atau tiga bulan berturut-turut kerana beliau tidak dapat mengadakan sesuatu untuk sebagai makanan. Nabi saw dan keluarganya menerima makanan yang sedikit seperti beberapa biji kurma dengan minum ayer sejuk saja. Lalu bagaimana dengan kita wahai murid dan salik? Nabi saw mengetepikan kedudukannya disisi Allah dan berpegang erat pada kedudukannya sebagai seorang hamba. Pernah beliau bersabda; “aku sebagai seorang hamba, makan seperti seorang hamba dan duduk seperti seorang hamba”. Adakah kita berakhlak seperti beliau saw yang tidak mengutamakan makanan? Adakah kita marah-marah sekiranya isteri tidak menyediakan makanan? Bolehkah kita menahan kelaparan? Sekiranya kamu diberi izin olehNya untuk dapat berbuat sesekali dengan memakan sedikit kurma dan minum air sejuk, alangkah besar nikmatnya kerana kamu telah mendapat nikmat, merasa apa yang beliau rasakan!

Sekali peristiwa, seorang tetamu datang ke rumah baginda, maka baginda pun mengirim orang bertanyakan makanan ke rumah-rumah isteri-isterinya yang sembilan, malangnya tidak ada sebuah rumah pun yang ada menyimpan makanan untuk tetamu baginda. Demikian pula pada hari baginda wafat, baju besinya masih tergadai pada seorang Yahudi kerana membeli

beberapa gantang sya'ir (gandum) sebab di rumahnya tidak ada apa-apa yang boleh dijadikan makanan kecuali segenggam sya'ir (gandum) saja.

Lantaran itu, wahai murid yang budiman, ambillah dari dunia itu sekadar sekeping kain lusuh yang akan menutup auratmu dan tidak lebih dari beberapa suap makanan untuk menutup laparmu dengan syarat makanan itu mestilah dari yang halal semata. Awaslah kamu dari racun yang akan membinasakan diri kamu; iaitu jangan sampai terpengaruh dengan kenikmatan dunia sehingga kamu pun dipermain-mainkan oleh penarikan syahwatnya dan seterusnya kamu merasa dengki pula terhadap orang-orang yang dikurniakan Allah kenikmatan dan kelazatan dunia itu. Ingatlah, bahwa mereka itu akan disoal tentang kenikmatan itu dan akan diperhitungkan terhadap semua yang mereka peroleh dan mereka bersenang-lenang dengan syahwatnya. Andaikata kamu dapat bayangkan betapa besarnya tanggungjawab yang akan mereka hadapi, disamping menanggung duka-nestapa dihati dan ketidak tenteraman didada dalam mengejar dunia dan berlumba-lumba untuk menambah harta dan kekayaan serta amat sayang untuk membelanjakannya; semua itu akan menyebabkan mereka hidup lebih susah dan berat dari apa yang mereka rasakan daripada menikmati kelazatan dunia, kiranya boleh dikatakan yang demikian itu kelazatan.

Memadailah firman Allah Taala yang berikut mencegah kamu dari mencintai dunia dan menganjurkan kamu supaya hidup berzuhud terhadapnya, iaitu;

“Dan kalaulah tidak manusia itu semua menjadi umat yang satu (semuanya gila kekayaan), niscaya Kami buatkan untuk orang-orang yang tidak percaya kepada Tuhan Pemurah atap rumah dan tangga tempat naik mereka, semuanya dari perak. Dan pintu-pintu rumahnya dan ranjang tempat mereka bersandar (dari perak juga). Dan dibuatkan juga perhiasan keemasan. Bahwa semua itu hanyalah keindahan hidup didunia, sedang akhirat itu disediakan oleh Tuhanmu bagi orang-orang yang bertaqwa” (Az-Zukhruf: 33-35)

Sabda Rasulullah saw;

“Dunia itu adalah penjara orang Mukmin dan Surga orang Kafir. Sekiranya dunia itu dipandang berharga disisi Allah senilai sayap seekor lalat saja, niscaya Dia tidak akan memberi minum kepada orang Kafir itu seteguk air sekalipun”

Ketahuiilah, bahwa Allah swt tidak pernah pandang kepada dunia itu sejak hari diciptanya.

Keterangan:

“Fahami wahai murid-murid dan salik, kamu diizinkan mengambil rezki dari dunia pada alakadar saja seperti memiliki kain yang buruk untuk menutup aurat dan tidak lebih daripada beberapa suap makanan untuk menghilangkan kelaparan dengan syarat makanan itu mestilah bersumber dari yang halal. Suruhan ini adalah semata-mata untuk mengajarkan diri dari bersikap, bersandar dan tamakkan harta dunia seperti mereka yang tidak beriman pada Allah dan RasulNya.

Sentiasa kamu harus beringat, sekiranya kamu terpengaruh dengan kenikmatan dunia sehingga dunia menjadikan kamu sebagai budaknya, maka itu petanda kamu jauh dari pandangan Allah Taala. Kerana kamu lebih rela menjadi hamba kepada dunia daripada hamba kepada Allah Taala!

Jangan sampai kamu meminum racun yang akan membinasakan diri. Dengan meminumnya maka kamu akan mati. Apakah itu racun? Apakah yang dimaksudkan mati? Racun dikaitkan pada Dunia dan Mati itu dikaitkan pada Berpalingnya Allah Taala daripada kamu.

Jadikan buku catitan kamu seringkas-ringkasnya kerana sesiapa yang mengambil dunia dan menikmati kelazatannya akan diperhitungkan terhadap semua yang mereka dapat dan bersenang-lenang dengan keinginannya dimana proses soal jawab akan menanggungkan perjalanannya ke surga. Dengan meringkaskan buku catitan kamu maka kamu akan dipercepatkan soal jawab sekaligus dapat meneruskan perjalanan kamu ke surgaNya.

Bukalah mata hati, insyallah dapat membayangkan betapa besarnya tanggungjawab yang akan mereka hadapi hanya mengambil dunia dan menikmati kelazatan dunia, mengejar dunia, berlumba-lumba untuk menambah harta dan kekayaan kerana ditakuti kalau dia mati keluarganya tidak perlu bersusah payah lagi kerana dia sudah mengumpul harta dunia, amat sayang untuk membelanjakan hartanya buat sedekah, apatah lagi mengeluarkan zakat. Kesemua itu menyebabkan mereka hidup lebih susah dan berat”.

Berpeganglah pada firman Allah Taala diatas, dimana Dia mencegah / menghalang kamu dari mencintai dunia dan menyuruh kamu supaya hidup berzuhud terhadapnya. Begitu juga dengan Nabi Muhammad saw yang telah bersabda; sekiranya kamu sebagai seorang mukmin, anggaplah dunia sebagai penjara.

Keterangan:

Ketahuilah wahai murid-murid bahwa Allah Taala tidak pernah memandang kepada dunia sejak diciptakanNya. Kerana apa?

Pembahagian Rezeki

Ketahuilah, wahai murid yang budiman, bahwasanya rezeki itu adalah seperkara yang telah ditentukan dan telah dibahagikan oleh Allah Taala. Di antara hamba-hambaNya, ada yang diluaskan rezekinya dan dilapangkan kehidupannya, dan yang lain pula dikurangkan rezekinya dan disempitkan kehidupannya menurut kebijaksanaanNya. Jika kamu, di antara orang-orang yang disempitkan rezekinya, maka hendaklah kamu bersabar, redha terhadap keputusan Allah Taala itu serta bersifat qanaah (cukup) dengan bahagian yang ditentukan Allah untuk kamu. Dan sekiranya kamu di antara orang-orang yang diluaskan rezekinya, maka hendaklah kamu mengambil secukupnya saja dan sekedar hajat dan keperluan kamu dari rezeki itu. Yang lain selebihnya, hendaklah kamu belanjakan pada jalan-jalan kebajikan dengan berderma dan berbakti.

Keterangan:

“Sebagai manusia yang sentiasa lemah, sentiasa bodoh, sentiasa lupa, sentiasa lalai, sentiasa mengabaikan, yang hidup diatas bumiNya setelah dewasa dan sudah mengenal dunia akan segala kenikmatan, segala kelazatan, segala yang ada diatasnya atau didalamnya, maka tujuan hidup dan keperluan hidup adalah mencari rezeki yang berada diatasnya atau didalamnya dengan apa cara sekalipun. Oleh kerana sifat-sifat lemah, bodoh, lupa, lalai dan abai, maka kita lupa kepada Tuhan iaini Allah Taala yang menjadikan kita, yang telah membesarkan kita, yang menjaga kita, yang memberi bantuan, yang melindungi, yang memberi pertolongan, yang memberi rezeki, yang memberi jodoh pertemuan, yang menentukan ajal maut untuk kembali kepadaNya dan banyak lagi pemberianNya keatas diri.

Apa yang nampak oleh mata kepala setelah tumbuh baligh, maka tujuan hanya satu! Untuk mendapatkan rezeki sebanyak-banyaknya, supaya tidak ada rasa takut kepada sesiapa, tidak ada rasa takut jatuh miskin (sebab dah kaya), tidak berharap kepada orang lain dan dll. Dimana dengan rezeki itu masyarakat akan tunduk, masyarakat akan malu, masyarakat akan hormat. Itulah harapan daripada semua manusia yang dilupakan oleh Allah Taala.

Terjadinya begitu, adalah atas tunjuk ajar daripada kedua ibu-bapa, tunjuk ajar daripada kaca tv, tunjuk ajar dari rakan-rakan sepejalanan. Kerana apa yang diajarkan adalah pemandangan yang nampak iaitu 'Dunia dan Isinya'.

Itulah misi hidup yang pertama dan misi kedua bagi bekalan keakhirat, pandai-pandailah. Kerana misi kedua ini tidak perlu dan penting, sebab tidak mendatangkan manfaat (kebaikan) kepada kedua ibu-bapa. Sekira anaknya mendapat didikan dunia yang cemerlang, maka jauh didalam hati kedua ibu-bapa, akan merasa bangga, sudah tertanam niat 'tidak sia-sia kita membesarkan anak hingga mencapai kejayaan yang cemerlang'. Agama tidak ada, tak ape! Nanti, boleh belajar. Nanti dia pandai cari. Maka cerahlah kehidupannya dan kehidupan kita. Kerana kita sudah banyak menabuhkan wang ringgit dan keringat, maka inilah sa'atnya untuk kita dapat setimpal dari apa yang kita korbankan!

Apakah maksud ayat diatas itu? Siapa yang memberi didikan awal? Apa yang dihajatkan kedua ibu-bapa? Adakah mereka, ibu-bapa dan anak, mempunyai Tuhan?

Ketahuiilah wahai murid-murid yang budiman, semoga Allah memberikan taufiq dan hidayahNya. Rezeki, Jodoh dan Ajal Maut sudah ditentukan oleh Tuhan sebelum kamu dizahirkan oleh kedua ibu-bapa! Sesudah ditentukan rezeki, jodoh dan ajal maut barulah dikirinkan kamu kedunia ini sebagai tempat ujian dan cubaan terhadap keimanan kamu kepadaNya, sebagaimana yang sudah ikrarkan dihadapanNya. AlQuran sudah menjelaskan dan Hadits sudah dijelaskan, tetapi kenapa kita masih lagi berpantang maut untuk mencari rezeki?

Sebelum kita meneruskan pembahasan ini, harus kita ketahui makna bentuk rupa sebenar, apa itu rezeki? Apa yang dikatakan rezeki?

Kebanyakan manusia tidak faham dan mengerti istilah rezeki yang sebenarnya! Mereka mengatakan segala apa yang kamu miliki adalah rezeki dari Tuhan. Betulkah begitu? Dari sudut yang satu, benar apa yang dikatakan 'segala apa yang kamu miliki adalah rezeki dari Tuhan', dari satu sudut yang satu lagi, tidaklah benar, 'segala apa yang kamu miliki adalah anugerah dari Tuhan'. Kalau dibedah siasat, erti, 'rezeki dari Tuhan' menunjukkan bukan kamu yang punya! Rezeki itu Tuhan yang punya! Sebab Dia yang menganugerahiNya. Jadi apa saja yang kamu miliki, bukan kamu yang punya! Kamu tidak berhaq diatasnya! Bukankah begitu!

Jadi, apakah pengertian 'rezeki' bagi diri?

Apa saja yang digunakan, apa saja yang dimasukkan kedalam mulut, itulah dikatakan rezeki kamu!

Bukan wang ringgit yang ada didalam kocek, bukan wang ringgit yang disimpan didalam bank, bukan makanan yang penuh diatas meja atau makanan yang sedikit diatas meja, bukan makanan yang penuh kat restoran-restoran, bukan pakaian yang disimpan dalam almari,

bukan kasut dan sepatu yang disimpan kemas, bukan perhiasan yang sekeliling, bukan rumah yang besar atau kecil, bukan pada kenderaan yang kamu sayangi, bukan pangkat yang kamu 'takut' diambil orang. Bukan, bukan, bukan . . .

Hanya apa yang dimasukkan kedalam perut kamu sahaja yang dikatakan rezeki yang hakiki. Itulah sebabnya dilarang kamu memiliki (memasukkan) benda yang haram! Kerana yang lain bukan kamu yang punya, sudah tentulah dikatakan haram, mengambil dan mengaku sebagai tuan punya.

Bagaimana yang lain-lain pulak? Seperti yang dikatakan diatas, 'melainkan yang dimasukkan kedalam perut'!

Selain daripada apa yang dimasukkan kedalam perut, merupakan pemberian dariNya sebagai keperluan-keperluan buat kamu semasa dihidup didunia ini, hakikatnya bukan kamu yang punya. Pemberian itu merupakan perlindungan, bantuan, pertolongan buat kamu sebagai bekalan-bekalan keperluan yang disediakan. Kerana Allah Maha Pengasih dan Maha Penyayang kepada semua MakhlukNya. Itu sebagai bukti sifat kebesaranNya, bagi sesiapa yang dapat melihatnya. Bermakna selain yang dimasuki perut, adalah keperluan-keperluan buat diri yang menunjukkan betapa Besarnya kasih sayang Allah buat diri! Janganlah kamu risaukan rezeki yang ada pada orang lain, kerana itu bukan rezeki kamu, rezeki kamu apa yang dapat masukkan kedalam perut . . . Jadi apakah bezanya? Tak ada bukan! Tidak kira berapa tinggi pangkatnya didunia ini, kerana betapa kuatnya dia, betapa kayanya dia, tetap makan sepinggan juga. Lepas itu apa? Masuk jambanlah jawapnya.

Janganlah kamu bersedih ataupun takut terhadap rezeki, kerana sudah ditentukan dan dibahagi-bahagikan secara bijaksana oleh Maha Bijaksana! Senyumlah sikit, macam tak konfiden aje . . . masih ada keinginan nak jadi orang kaya ke?

Dengan bijaksana Allah Taala telah mengaturkan rezeki bagi hamba-hambaNya, ada yang diluaskan rezekinya dan dilapangkan kehidupannya dan pula yang dikurangkan rezekinya dan disempitkan kehidupannya. Ini menurut atas kebijaksanaanNya. Tetapi jauh didalam hati kamu akan berkata; kenapa kamu tidak ditentukan (dipilih) olehNya sebagai hambaNya yang diluaskan dan dilapangkan rezekiNya? Seperti yang berlaku pada orang-orang kaya raya!

Sekiranya ada soalan sebegini, hendaklah diketahui siapa kamu, siapa Tuhan? Sekiranya kamu tahu akan kedudukan kamu dan kedudukan Tuhan, insyallah soalan sebegini tidak akan wujud. Selagi kamu belum faham dan kenal siapa diri kamu dan siapa Tuhan, itu adalah sebagai petanda bahwa kamu bukan hambaNya yang tau bersyukur (berterima kasih) dan juga sebagai petanda kamu tidak memahami agama islam, tidak memahami kerana apa islam diturunkan dan tanda hakikinya sebagai petanda, kamu tidak mengenali Tuhan!

Sekiranya kamu termasuk diantara orang-orang yang disempitkan rezekinya, maka hendaklah kamu bersabar, rela terhadap keputusanNya dan hendaklah kamu bersifat qanaah (iaitu merasa cukup dengan apa yang ada, bukan apa yang ada ditangan orang lain) kerana Dia lebih mengetahui kenapakah kamu tidak dimasukkan kedalam golongan orang-orang yang diluaskan dan dilapangkan rezeki.

Sekiranya kamu termasuk didalam golongan orang-orang yang diluaskan rezekinya, hendaklah kamu ambik secukupnya sahaja dan sekadar hajat keperluan dari rezeki itu. Bagaimana pula dengan selebihnya? Hendaklah kamu belanjakan pada jalan kebajikan

dengan menderma dan berbuat bakti. Bunyi macam tak betul aje! Mana boleh rezeki selebihnya tidak disimpan dan disuruh menderma dan membelanjakan didalam kebajikan! Buat penat aje aku bekerja, aleh, aleh nak bagi orang lain! Adakah kamu mempunyai niat sebegini? Kalau ada, masih belum faham, belum sampai kepada kemuncak makrifat”.

Ketahuilah, bahwasanya jika seorang itu ingin memasuki jalan Allah, maka tiadalah wajib atas dirinya membelanjakan semua kekayaannya, kiranya ia dari golongan orang yang berharta. Tidak perlu juga baginya meninggalkan pekerjaannya atau perniagaannya, kiranya ia seorang pekerja ataupun seorang peniaga. Akan tetapi yang wajib dan perlu ialah ia bertakwa kepada Allah dalam segala urusan pekerjaan dan perniagaannya, supaya ia tidak sampai meninggalkan yang fardhu atas dirinya, dan juga yang sunnat, dan ia tidak terjerumus ke dalam yang haram, ataupun ia campurtangan dalam perkara-perkara yang tidak kena mengena dengan urusannya. Semua perkara-perkara yang tersebut tidak baik bagi orang yang ingin menuju ke jalan Allah Taala.

Keterangan:

“Sebagai murid yang memasuki jalan Allah, tidaklah wajib atas diri kamu untuk membelanjakan kesemua kekayaan pada jalan Allah, sekiranya kamu dari golongan orang yang berharta. Tidak perlu meninggalkan pekerjaan atau perniagaan, sekiranya kamu seorang pekerja ataupun seorang peniaga. Yang paling mustahak dan penting dalam kehidupan kamu ialah takwa kepada Allah dalam segala urusan pekerjaan dan perniagaan.

Ayat tersebut sangat jelas, dimana dilarangnya kamu yang sedang didalam perjalanan menuju jalan Allah hendaklah tidak melakukan pembaziran keatas barang-barang keperluan yang sudah sedia ada. Misalnya, dah ada kerusi, nak tukar yang baru kerana yang lama dah nampak buruk, hari raya pun dah sampai, nanti apa kata orang. Ini cuma satu saja perbuatan pembaziran yang dilarang bagi kamu kerana perbuatan itu akan menghilangkan syukur dan rakus pada yang baru. Dengan tujuan nak menunjuk-nunjuk. Contoh-contoh terlalu banyak dan memakan ruang yang sangat luas.

Yang dituntut adalah sikap takwa, yang lain Allah akan dibereskan! Kalau begitu apa itu takwa? Bagaimana cara untuk mendapatkannya?

Takwa adalah perasaan takut kepada Allah, malah bukan perasaan, tetapi memiliki rasa takut yang hakiki terhadap Allah diatas segala gerak perbuatan kamu. Untuk mendapatkan Takwa, adalah dengan memelihara diri supaya tidak terdorong untuk keluar dari sempadan tersebut. Sempadan yang dimaksudkan adalah memelihara segala perintah Allah dan menjauhi segala larangan Allah juga tidak melibatkan diri dengan perkara dan perbuatan syubhat. Dalam berbuat demikian hati dikuasai oleh rasa taat, merendah diri, takut, harap dan sebagainya kepada Tuhan. Gabungan sifat-sifat kehambaan tersebut merupakan sifat takwa.

Bila seseorang yang memiliki takwa pada keseluruhan dirinya, maka dimana saja, dalam perkara apapun, takwa akan membimbing! Walaupun kamu dalam urusan pekerjaan ataupun perniagaan.

Selain dari Takwa, ada lagi 4 perkara yang harus dijaga dengan baik iaitu, kebajikan yang difardhukan, kebajikan yang bersangkutan paut dengan sunnah, tidak melakukan perbuatan haram, jangan sekali-kali campur tangan dalam perkara yang tidak ada kena mengena dengan urusan kamu.

4 perkara tersebut seperti berikut yang harus dipatuhi;

1. Jangan sekali-kali meninggalkan segala yang difardhukan keatas diri kamu, jangan sekali-kali mengabaikan apa yang difardhukan atas kamu, jangan melalaikan apa apa yang difardhukan kepada kamu. Ini membawa kepada tanda sebagai hambaNya yang taat.

2. Jangan meninggalkan, mengabaikan, melalaikan perkara dan perbuatan-perbuatan sunnah. Ini membawa kepada tanda kasih dan sayang kepada NabiNya saw.

3. Jangan melakukan perbuatan yang haram. Tempat jatuhnya perbuatan haram adalah seperti berikut; fikiran, telinga, mata, hidung, mulut, tangan, kaki, dan kemaluan.

- a) Jangan berfikiran kotor dan buruk, dengan membayang dan menghayal membuat perkara yang haram.
- b) Jangan mendengar perkara-perkara yang buruk dan haram, seperti mendengar cerita maruah orang lain, mendengar cerita bohong, mendengar cerita fitnah, mendengar cerita tidak mendatangkan kebaikan yang boleh membawa kepada manfaat.
- c) Jangan memandang perkara dan perbuatan yang haram, samada didepan mata, dikaca tv, computer, dvd dan sebagainya. Peliharalah mata kamu dengan memandang AlQuran, Buku-buku Agama, Catitan pelajaran. Jangan sekali-kali mengalihkan pandangan ketempat lain.
- d) Jagalah hidung dari ingin mengambil tahu perihal orang lain.
- e) Jagalah mulut daripada mengeluarkan perkataan yang buruk, yang keji, seperti, mencerita hal orang lain, mencerita maruah orang lain, suka berbohong, suka berdalih, suka mengumpat, suka maki hamun, suka menjawab yang tidak boleh henti-henti, tidak mengambil berat halal atau haram yang dimasukkan kedalam mulut. Peliharalah mulut dengan mengingati kepada Allah seperti yang telah dijelaskan pada bab-bab yang lalu.
- f) Jagalah tangan daripada mengambil haq orang lain tanpa memohon izin walaupun hanya mengambil sebatang jarum atau mengalirkan sehelai rambut. Gunakan tangan untuk membuat kebajikan, seperti mengambil AlQuran, mengambil buku agama, mengambil buku catitan pelajaran, mengambil tasbih dll. Semua perbuatan ini membawa kepada manfaat kepada manfaat.
- g) Tahanlah kaki kamu daripada mengunjungi tempat yang keji, yang hina dan tempat yang akan melalaikan akan tanggung jawab terhadap Allah Taala. Latih diri dengan mengerakkan kaki kemajlis yang diredhai, seperti kelas agama, menziarahi alim-ulama, menziarahi kubur, melangkahkan kaki ke masjid dan dll.
- h) Jagalah kemaluan dari bangun bukan pada yang halal, jauhkan fikiran dan mata daripada benda yang haram kerana boleh membangunkan kemaluan yang sedang tidur.

Kesemua perkara tersebut tidak layak dilakukan oleh seorang murid yang ingin menuju ke jalan Allah. Jangan jadikan perjalanan dihentikan oleh perkara-perkara yang disebutkan diatas itu.

Sekiranya si murid itu mengetahui, bahwasanya hatinya tidak boleh lurus dalam agamanya tidak akan terselamat dari bencana-bencana yang mengancam itu, melainkan dengan menghindarkan dirinya dari segala harta dan kekayaan, dan dari sebab-sebab yang menariknya kepada yang demikian, maka wajib atas dirinya menghindarkan segala harta dan kekayaannya itu. Sekiranya ia seorang yang mempunyai anak-isteri, yang wajib diberi nafkah dan pakaian,

maka wajiblah atasnya menyediakan semua itu dan wajiblah ia berusaha mencari wang untuk menutup nafkah dan pakaian anak-isterinya itu.

Keterangan:

“Sekiranya kamu dapati bahwa hati kamu tidak boleh lurus dalam agama, tidak boleh terselamat dari bencana-bencana yang sungguh mengancamkan itu, maka hendaklah menjauhkan diri dari segala harta dan kekayaan dan apa-apa yang boleh menarik kepadanya. Wajiblah atas diri menjauhkan segala harta dan kekayaan itu. Kerana itulah yang terbaik buat kamu.

Sekiranya kamu sudah mempunyai keluarga sendiri, mempunyai isteri dan anak-anak. Wajib keatas diri memberi nafkah dari segi pakaian, makanan, tempat tinggal, perlindungan buat mereka. Wajiblah berusaha dan berikhtiar mencari wang ringgit untuk memberi nafkah, pakaian anak-isteri, tempat tinggal dan lain-lain keperluan yang tidak membawa kepada keburukan. Jangan sekali-kali meletakkan alasan. Kerana alasan bukan jalan kepada tawakkal”.

Tetapi kalau sesudah ia berusaha, ia tidak berjaya juga, sehingga ke peringkat syara' menguzurkannya, barulah boleh ia bebas dan terselamat dari dosa.

Keterangan:

“Sekiranya sudah berusaha dan berikhtiar dan tidak berjaya juga, sehingga dibenarkan pada hukum syara' menguzurkannya, barulah kamu bebas dan terselamat dari perbuatan dosa”.

Jangan Panjang Harapan

Ketahuilah wahai murid yang budiman, bahwasanya kamu tidak berkuasa untuk melazimkan diri dalam ketaatan, dan menjauhkan diri dari tuntutan syahwat serta membelakangi dunia dan keindahannya, melainkan jika kamu mengingatkan diri kamu, bahwa hidup kamu di dunia ini hanya tinggal beberapa hari saja lagi, dan bahwasanya kamu tidak berapa lama lagi akan mati. Ketika itu kamu akan melihat ajal kamu di hadapan mata kamu, dan kamu akan bersedia untuk menemui maut, dan kamu menjangka tibanya pada bila-bila masa saja.

Keterangan:

“Daftarkanlah didalam benak, bahwa kamu tidak ada kuasa sedikit pun untuk membiasakan diri dalam membuat ketaatan, tidak ada kuasa sedikit pun, tidak dapat menjauhkan diri dari mengikuti keinginan nafsu syahwat, tidak ada kuasa untuk menolak dunia dan memalingkan segala kenikmatan dan keindahannya. Kerana apa? Kamu hanyalah patung (boneka). Sebuah patung (boneka) tidak dapat melakukan sebesar zarah pun, hanya pasrah . . .

Jangan sekali-kali berani mengaku kamu ada kuasa untuk mengangkat sesuatu atau membiasakan diri membuat ketaatan.

Hanya satu jalan sahaja yang dapat menyelamatkan diri iaitu dengan mengingatkan diri bahwa hidup didunia ini hanya tinggal beberapa hari saja. Boleh tak kamu buat begitu? Tentu boleh! Kalau mahu . . . Kuncinya adalah tepat memilih perbuatan yang hendak dilakukan mengikuti AlQuran dan Sunnah Rasul.

Katakan selalu pada diri bahwa kamu sudah tua, walaupun masih muda, katakan selalu, ‘aku dah tua, aku tidak perlu apa apa lagi’. Buatlah cara ini selalu, insyallah akan berkesan.

Kerana pengakuan ini akan menghilangkan segala keinginan dunia dan mengharap kembali kepada Allah Taala.

Bila pengakuan ini dilafazkan dengan benar dan ikhlas kerana Allah Taala, maka kamu akan dapat melihat ajal (roh) dihadapan kamu, dan sudah bersedia untuk menemui maut kerana segala keinginan sudah tidak ada, yang ada tinggal hanya kembali kepadaNya. Kamu akan siap sedia menunggu dan menjangka akan kedatangannya pada bila-bila masa”.

Awas, supaya kamu tidak di tipu oleh panjang harapan untuk hidup lebih lama di dunia, kelak kamu akan ditariknya untuk mencintai dunia, dan kamu akan menjadi susah hati dengannya, sehingga sukar untuk melazimkan diri dalam ketaatan, dan merelakannya kepada membuat ibadah serta mengasingkan diri untuk menuju ke jalan akhirat. Kalau begitu dalam mengira-gira bahwa maut akan hampir tiba, dan masanya sudah dekat adalah lebih baik, bukan?! Oleh kerana itu patutlah kamu menurutkan anjuran ini, moga-moga Allah memberi kita sekalian taufiqNya, Amin.

Keterangan:

“Jangan kamu sekali-kali ditipu oleh panjang harapan untuk hidup lama didunia dan menikmati segala keindahannya yang tidak kekal. Selagi perkataan ‘MATI’ tidak ada dalam benak fikiran, maka selagi itulah kamu akan tetap mencari kenikmatan dan keindahan dunia hingga membuat kamu lupa bahwa maut pasti akan datang. Bila datangnya maut, ohh . . . lambat lagi . . . Itu yang ada dalam fikiran . . .

Selagi maut tidak melingkar difikiran, kelak kamu akan ditariknya untuk mencintai dunia dan akan merasa susah hati bila segala hajat tidak tercapai. Oleh kerana segala hajat belum tercapai kamu sanggup meninggalkan apa yang telah terbiasa didalam ketaatan, sanggup merelakan diri meninggalkan ibadah serta kebiasaan dalam mengasingkan diri untuk menuju ke jalan akhirat. Perbuatan ini akan berlaku pada semua kerana kerelaan diri belum tercapai apa yang dihajati.

Untuk menghindarinya diri kamu dari ditarik kepada keinginan nafsu syahwat hendaklah menyakinkan diri bahwa maut akan tiba dan masanya sudah dekat. Bukankah itu yang terbaik?

Mudah-mudahan kamu dapat mengikut anjuran ini dan Allah akan memberi sekalian taufiqNya. Amin, Ya Rabbal Alamin”.

Bersabar Terhadap Penganiayaan Orang

Ada setengah manusia memang tabiatnya suka menganiaya para murid dengan memandang rendah terhadapnya, atau mencelanya, atau sebagainya. Jika kamu tergolong murid-murid yang ditimpa penganiayaan serupa itu, maka hendaklah kamu bersabar dan jangan sekali-kali kamu cuba membalas. Disamping itu hati kamu harus bersih dari dengki dan dendam, atau menyimpan perasaan jahat terhadap orang itu. Awas, jangan juga mendoakan yang tak baik terhadap orang itu. Jika orang itu ditimpa sesuatu musibah, atau terkena celaka, maka jangan kamu mendakwa yang demikian itu adalah balasan Allah kerana penganiayaannya terhadap dirimu.

Keterangan:

“Didalam mengharungi perjalanan sebagai murid, berbagai cubaan dan ujian dilimpahkan sebagai nikmat daripadaNya. Cubaan dan ujian ini pada hakikatnya adalah kenikmatan yang diberikan kepada murid-murid yang berhasrat untuk menuju kepadaNya. Dengan sifat kebijaksanaanNya, mengandungi hikmah disebalik limpahan nikmat cubaan dan ujian itu sebagai pencuci bagi sifat-sifat amarah dan sifat-sifat tercela yang ada pada diri murid-murid.

Manusia mana yang tidak akan marah sekira dirinya di aniaya dan dipandang rendah oleh orang lain? Kerana manusia sebegini tidak ada pegangan agama dan tidak beriman pada Allah dan RasulNya. Disebabkan oleh ketidakfahaman mereka pada agama dan iman, mudah bagi mereka terjerumus kedalam sifat buruk dan tercela ini. Inilah sifat yang ada pada diri kamu yang harus dijauhi dan dihapuskan oleh setiap murid-murid.

Ketahuilah, ada setengah manusia sememang tabiatnya suka menganiaya dan memandang rendah, menghina atau sebagainya terhadap kamu, khususnya para murid-murid. Ini kerana mereka yang suka menganiaya, memandang rendah, menghina dan sebagainya sudah menjadi ketentuan bagi diri mereka dimana Allah Taala dengan kehendakNya mengadakan manusia sebegini. Sekiranya Allah Taala tidak mengadakan (mencipta) orang-orang yang suka menganiaya atau memandang rendah, bagaimana cubaan dan ujian akan diterima oleh murid-murid? “Maha Suci Allah, Yang Maha Mengetahui Segala Kenikmatan Yang Diberikan OlehNya Mengandungi Berbagai Rahasia Yang Tersembunyi”. Hanya diri sahaja yang tidak dapat melihat akan segala yang diberikanNya sebagai nikmat dan mengandungi hikmah! Sebaliknya memandang cubaan dan ujian tersebut sebagai tidak menyenangkan hati, dipandang sebagai sesuatu kesusahan yang amat berat!

Terimalah segala penganiayaan, kehinaan dan pandangan manusia yang merendahkan kamu itu sebagai nikmat Allah Taala. Kalau tidak dengan Kasih SayangNya, maka kamu tidak akan mendapat penganiayaan, kehinaan dan pandangan rendah daripada mereka.

Hendaklah kamu paham akan tindakan mereka itu disebabkan oleh pertukaran watak (akhlak) yang terjadi pada diri kamu sebagai contoh;

- 1. Tidak pernah sembahyang, sudah mulai sembahyang.*
- 2. Tidak pernah mengamal berbagai wirid dan amalan, sudah mulai mengamalkan wirid dan berbagai amalan-amalan.*
- 3. Tidak pernah pakai songkok dengan ikhlas, sudah sentiasa memakai songkok dengan rela dan senang hati. (bukan pada masa tertentu sahaja, seperti dalam majlis dan keramaian)*
- 4. Tidak pernah memakai jubah dan sarban, sudah suka memakai jubah dan sarban.*
- 5. Suka berbual kosong, Tidak suka berbual kosong yang tidak mendatangkan faedah.*
- 6. Suka berkumpul-kumpul. Tidak suka pada berkumpul-kumpul.*
- 7. Suka berjumpa dengan kaum kerabat dan kawan-kawan. Tidak suka berjumpa pada kaum kerabat dan kawan-kawan.*
- 8. Suka membuang waktu dengan sia-sia. Tidak suka menghabiskan waktu tanpa diisikan dengan amalan yang bermanfaat yang membawa kepada manfaat.*
- 9. Tidak suka menyendiri (seorang diri). Suka mengasingkan diri daripada masyarakat.*
- 10. Tidak suka dan tidak mahu menuntut ilmu agama. Sangat suka menghadiri majlis yang bersangkutan dengan agama.*
- 11. Tidak pernah mengasap rumah, pada malam jum'at atau setiap malam. Suka pada sunnah Rasul mengasap rumah.*

Inilah sebagian pertukaran watak tabiat yang kamu zahirkan yang membuat mereka tidak senang hati.

Perbanyak sabar diatas segala penganiayaan yang serupa itu dan jangan sekali-kali ada niat untuk membalas penganiayaan mereka. Inilah rahasia yang tersembunyi dimana Allah Taala mengada cubaan dan ujian semata-mata untuk membersihkan diri kamu dari sifat dengki, dendam atau menyimpan perasaan jahat terhadap orang yang menganiaya diri kamu. Sekali lagi lihatlah pada nikmat dan rahasia Allah Taala itu!

Kelemahan yang sering terjadi pada murid-murid adalah suka mendoakan perkara-perkara yang tidak baik terhadap orang yang menganiaya dirinya. Ini adalah satu sifat yang rendah, dimana sifat ini tidak harus ada pada murid-murid, sekiranya murid itu faham dan mengerti keseluruhan agama yang dianutinya. Maka tidaklah wajar bagi diri untuk mendoakan mereka atas perbuatan mereka. Sebaliknya lihatlah akan keberadaan diri kamu, bagaimana sekiranya guru kamu, alim ulama dan wali-wali Allah yang mendoakan kamu yang tidak sepatutnya, adakah perkara itu kamu inginkan? Sudah tentu tidak, bukan! Contohilah mereka.

Hindarilah sifat ingin mendoakan mereka yang tidak baik terhadap diri kamu! Sekiranya orang tersebut ditimpa sesuatu musihab atau terkena kecelakaan, maka jangan sekali-kali kamu mendakwa yang demikian itu adalah balasan Allah kerana penganiayaannya terhadap diri kamu. Anggaplah, perkara itu adalah urusan Allah Taala dimana kamu tidak ada kuasa sedikitpun untuk campur tangan. Ini sikap yang harus ada dan wajib ada pada diri kamu!”

Jika kamu boleh buat lebih dari bersabar atas penganiayaan orang, maka adalah lebih utama lagi kamu maafkan orang yang menganiayai kamu itu dan kamu doakannya supaya menjadi baik, sebab demikian itu adalah dari akhlak dan kelakuan yang Siddiqin. Anggaplah segala penganiayaan orang terhadap diri kamu itu sebagai nikmat dari Tuhan kamu, sebab jika mereka sekalian menyanjung kamu, mungkin perkara itu akan mendatangkan rasa kurang senang dari mengerjakan ketaatan kepada Allah Taala.

Keterangan:

“Hendaknya kamu mencontohi akhlak kelakuan kaum Siddiqin dengan mengutamakan kemaafan bagi orang yang menganiayai kamu dan mendoakannya supaya menjadi baik, mendoakan mereka keampunan dan juga memohon keampunan bagi diri kamu kepada Allah Taala, kerana tidak ada jaminan, bahwa diri kamu boleh terlepas dari membuat kesilapan. Inilah sikap Siddiq, yang dilakukan oleh para Salaf.

Sebaliknya, sekiranya mereka menyangungi diri atas segala perubahan yang berlaku pada diri kamu, mungkin perkara itu akan mendatangkan bahaya yang amat sangat kerana perkara itu akan mendatangkan rasa kurang senang didalam mengerjakan ketaatan kepada Allah Taala kerana kamu akan memandang dan menghadapkan kebanggaan amalan kamu kepadaNya! Perhatikan perkara ini, tidak kamu bawa bersama bila menghadap kepada Allah Taala”!

Begitu juga, jika kamu sedang diuji dengan penyanjungan, penghormatan, kepujian dan berulang-aliknya orang ramai mengunjungimu, maka hendaklah kamu mengawasi diri kamu supaya tidak terfitnah oleh mereka. Hendaklah sentiasa mensyukuri Tuhan yang telah menutup segala kekurangan dan kecacatan kamu kepada mereka. Seterusnya, jika kamu merasa bimbang mungkin kamu akan terdorong kepada sikap berpura-pura, atau menunjuk-nunjuk ketika berada di dalam majlis mereka, ataupun pergaulan kamu itu akan menghalang kamu dari mengerjakan ketaatan kepada Allah swt., maka hendaklah kamu segera mengasingkan diri dari

mereka. Jika perlu, tutup pintu rumah kamu supaya mereka tidak datang lagi, ataupun kamu tinggalkan tempat yang selalu kamu bertemu dengan mereka ke tempat lain yang mereka tidak tahu. Hendaklah kamu sentiasa memilih sikap suka mengasingkan diri, jauhkan diri dari mencari nama atau kedudukan, kerana padanya tersimpul fitnah dan bencana. Telah berkata setengah para salaf; “Demi Allah! Tiada seorang hamba yang berlaku benar kepada Tuhan, melainkan ia suka tidak ada seorangpun yang mengetahui tentang kedudukannya”. Seorang salaf lain berkata; “Sepanjang yang aku tahu, bahwasanya tidak ada seorang yang ingin supaya dirinya dikenal orang, melainkan akan binasa agamanya dan akan pecah tembelangnya.

Keterangan:

“Sekiranya, kamu dapati diri sentiasa mendapat penyanjungan (selalu disanjung), dihormati dan sentiasa manusia (kaum kerabat dan kawan-kawan) datang ulang-alik mengunjungi, maka hendaklah kamu mengawasi diri supaya tidak timbul fitnah oleh mereka (termasuk sahabat seperguruan!) kerana secara hakikatnya, kamu sedang diuji oleh Allah Taala. Yang dimaksudkan fitnah, adalah sesuatu yang diucapkan oleh mereka, tidak kira samada, sanjungan atau berulang-aliknya mereka dengan bersandarkan niat ingin mengambil nasihat ataupun mendengar nasihat akan bertukar menjadi perkara yang dilarang dalam agama seperti, membanggakan diri kerana mereka menginginkan nasihat ataupun menerima pendapat yang dianjurkan oleh mereka yang tidak kesefahaman dan paling merbahaya mengajak kamu kepada kelalaian kerana sudah bertukar niat dari nasihat menasihati kepada cerita keduniaan. Mungkin kamu ditidak sedar! Kerana ketidaksedaran itulah menunjukkan diri kamu mudah dibawa kepada kelalaian! Kenapa boleh jadi begini? Tidak lain ingin membanggakan diri pada situasi dan keadaan yang tidak sepatutnya!”.

Hendak kamu sentiasa mensyukuri pada Tuhan yang telah menutup segala kekurangan-kekurangan dan kecacatan amal ketaatan dan kebajikan kepada mereka yang menghormati dan berulang-alik! Sekiranya tanpa penutupan dariNya, segala kekurangan dan kecacatan yang ada pada diri kamu akan terlihat oleh mereka.

Hendaklah sentiasa tanam perasaan bimbang, takut dan malu, mungkin kamu akan dibawa kepada sikap berpura-pura (bertopeng) atau menunjuk-nunjuk ketika mereka bersama dengan kamu iaitu mereka yang menghormati dan berulang-alik. Khususnya sahabat seperguruan, kaum kerabat dan kawan-kawan.

Sekiranya sikap perbuatan ini ditakuti oleh kamu dan kamu sukar untuk melingunginya dari kepura-puraan (bertopeng seperti orang yang bijak pandai) dari mereka yang berulang-alik, yang akan menghalangi diri kamu dari mengerjakan ketaatan kepada Allah swt dari kehadiran mereka yang akan membawa kepada KELALAIAN, hendaklah kamu dengan segera menghindari (menjauhkan) diri dan jika perlu, tutup pintu rumah supaya mereka tidak datang lagi ataupun tinggalkan tempat yang selalu kamu bertemu dengan mereka ketempat lain yang mereka tidak tahu. Hendaklah sentiasa memilih sikap suka mengasingkan diri, menjauhkan diri dari mencari nama atau kedudukan kerana padanya akan tersimpul fitnah dan bencana.

Begitu juga, sikap sebegini mungkin akan timbul ketika berada didalam majlis para salaf, majlis ulama dan pada setiap majlis-majlis yang diberkati, dimana kamu takuti pergaulan kamu akan menimbulkan kebanggaan ilmu dan amalan didalam mengerjakan ketaatan kepada Allah swt, maka mengasingkan diri dari mereka lebih utama. Jangan asyik nak berdamping dengan mereka, sekiranya tidak ada niat langsung hendak memperbetulkan diri! Bila sudah ada niat, lihatlah langkah-langkah itu sudah dibuat ataupun tidak mahu tahu! Jagalah diri

kamu, jangan membawa diri kamu pada cahaya yang ada pada mereka kerana ditakuti dengan cahaya itu kamu akan terbakar kamu! Habislah sudah . . .”.

Para Salaf pernah mengatakan; “Atas nama Allah! Tidak ada seorang hamba yang bersifat benar kepada Tuhanya melainkan dia tidak suka seorangpun mengetahui tentang kedudukannya!”. Kedudukan apa yang ada pada diri kamu disisi Allah yang hendak kamu tunjuk-tunjukkan?

Ada juga para Salaf mengatakan; “Sepanjang pengetahuan mereka, tidak ada seorang pun yang ingin dirinya dikenal orang, melainkan akan binasa (hilang, gugur) agamanya dan akan pecah tembelangnya (diketahui sikap kepura-puraan)”. Sekiranya para salaf sangat takut akan kelakuan sebegini, bagaimana dengan kamu, wahai murid-murid?

Jangan Takutkan Manusia

Wahai murid yang budiman! Berusahalah dalam menghindarkan dirimu dari takutkan manusia dan tamakkan hak yang ada di dalam tangan mereka. Sebab yang demikian itu akan menahan kamu untuk membantah perbuatan bathil dan menyebabkan kamu berdiam diri terhadap orang-orang yang meringan-ringankan agama dan meninggalkan amar ma’ruf dan nahi mungkar. Maka oleh kerana itu kamu akan terpancang seorang yang hina di sisi Allah Taala.

Keterangan:

*“Alhamdulillah, atas izin Allah maka kita telah sampai kepada satu tajuk yang sangat penting dan sangat utama dimana tanpa kesedaran telah melakukan dan mengamalkan perbuatan yang hina dan keji iaitu ‘**Takutkan Manusia**’. Oleh kerana perbuatan itulah yang meletakkan diri dipandang sebagai seorang yang hina disisi Allah kerana memandang Manusia dengan penuh kerelaan mengakui bahwa mereka (manusia) mempunyai kuasa yang setara (iaitu sama) malah lebih dari Allah Taala.*

Mari sama-sama menyucikan (menghilangkan) sifat yang hina dan kotor ini yang selamanya kita melakukan perbuatan itu. Mudah-mudahan atas Kemurahan Allah, PertolonganNya dan KehendakNya mengangkat kita dari sifat yang hina dan kotor dan meletakkan kita semua pada sifat yang mulia disisiNya. Amin.

Sedarkah kamu semua, seringkali dalam pelajaran, Imam Habib Abdullah bin Alwi AlHaddad akan memulakan dengan kata-kata “Wahai murid-murid yang budiman”, Mengapakah beliau sering mengatakan begitu? Secara kasar kita dapat mentafsirkannya sebagai salah satu sifat beliau yang tidak memandang rendah kepada semua makhluk Allah Taala yang hidup dibumiNya. Beliau tidak melihat kedudukannya kerana beliau mengetahui bahawa beliau tidak mempunyai kedudukan kerana keyakinan (tauhid) beliau sangat mendalam dan dengan kefahaman yang hakiki bahwa segala-segalanya kepunyaan Allah dan Dialah yang berhaq menduduki kedudukan itu. Kamu tidak akan memahami sikap ini sehingga kamu mendalami ilmu tauhid.

Bagaimana dengan kita wahai murid, wahai salik? Adakah ilmu kita melebihi Imam Habib Abdullah bin Alwi AlHaddad? Sudah tentu kamu akan mengatakan “Tidak”! Tetapi hakikatnya perbuatan kamu menyalahi apa yang kamu katakan! Kamu sentiasa akan mengatakan “Tidak” tetapi kamu tidak dapat berselindung dari perbuatan hati kamu yang dengan sendirinya menzahirkan (menunjukkan) pergerakan kamu yang hina itu. Kerana orang

Mu'min adalah cermin bagi orang Mu'min. Maka sadarlah kamu wahai murid dan salik, selidikilah tingkah laku kamu, bertanya dan duduk bersama orang-orang yang ahli.

*Dari pengamalan, kebanyakan murid dan salik mampu menyelidiki diri masing-masing, berjumpa dan bertanya (belajar) dan duduk bersama orang-orang yang ahli tetapi malangnya teguran dan nasihat dari yang ahli tidak dapat diamalkan. Mengapakah begitu? Tidak lain adalah kerana sifat '**suka menunggu**'. Kerana kamu teriman teguran dan nasihat dari yang ahli sebagai sesuatu yang berat untuk dilakukan. Tetapi sebenarnya, kamu sendiri yang tidak mahu mencubanya selangkah demi selangkah kerana kamu sendiri yang tidak mahu menukar dan membuang tabiat '**MENUNGGU**' itu.*

*Itulah hakikat sebenarnya dalam diri kamu. Allah Maha Mengetahui apa yang didalam hati kamu, oleh kerana 'sifat menunggu' masih melekat dihati bagaimana mungkin Allah memberikan dorongan (bantuan dan pertolonganNya)? Kalau dihati pandangannya sebagai sesuatu yang berat bagaimana boleh diringkankan dan dipermudahkan oleh Allah? **Allah yang memberi dan menyampaikan apa yang HambaNya inginkan, tidak lebih dari itu!***

Fikir-fikirkanlah!

*Dalam tajuk diatas Habib Abdullah menasihati supaya menjauhkan diri daripada takutkan manusia dan jangan tamakkan apa yang ada didalam tangan manusia itu. Seperti yang telah diterangkan diatas. **Jangan Takutkan Manusia!***

Maka berkatalah hati 'bila masa saya takutkan manusia' atau 'siapa yang takutkan manusia' atau 'manusia bukan tuhan, kenapa harus aku takutkan dia'. Inilah kata-kata yang mungkin datang dari dalam hati kamu. Mungkin aje. Allah Yang Lebih Mengetahui.

Mari kita bongkar sama-sama sifat 'takutkan manusia' yang selama ini kita lakukan dengan kesedaran atau mungkin tidak. Semuga mendapat satu pelajaran dan semuga Dia mengizinkan untuk mengubahnya. Insyallah. Itupun kalau kita inginkan . . . Kalau tak, sama aje . . .

*Jauhkan diri dari takutkan Manusia! Disini ada dua perintah dari Allah Taala iaitu sifat jauh dan takut. Dua kata kerja ini adalah berbentuk ancaman dari Allah Taala kerana ianya berlawanan dengan perintah Allah Taala, '**Bertakwalah (TAKUTLAH) kamu kepada Allah dan Rasul dan (JAUHKAN DIRI KAMU) JANGAN menduakanNya**'. Maka yang diperintahkan oleh Allah Taala adalah bertakwa kepadaNya dan bertakwa kepada RasulNya sebagai sebuah ancaman, Jangan sekali-kali menduakanNya.*

*Sebelum meneruskan pembahasan tajuk ini. Lihat akan Tujuan (maksud) Allah Taala menCiptakan manusia dari tidak ada kepada ada. Maka kamu akan dapati ada dua garis besar tujuan pengCiptaan. Pertama; Kalimah Tauhid; '**La ilaha illallah**' (tidak ada sesembahan melainkan Allah). Kedua; '**Aku (Allah) jadikan Manusia dan Jin hanya untuk beribadah kepadaKu**'. Selagi maksud tujuan ini tidak dapat di FAHAM dan YAKIN, apa yang diperintahkanNya dan mengapa, maka kamu sekali-kali tidak akan dapat membuang sifat 'takutkan manusia'.*

*Tugas yang diberikan oleh Allah Taala kepada Rasulullah saw adalah menyampaikan amanat dari Allah Taala iaitu; '**La ilaha illah**' dan beliau saw mengajarkan cara-cara mengenal Pencipta dimana tidak ada sesembahan selain dari Allah dan Beliau saw mengajarkan dan*

menunjukkan jalan yang terang supaya jangan sekali-kali menundakan Allah samada cara terangan atau tersembunyi.

Setelah difahami dan yakini kemudian taat kepadaNya barulah kamu akan sedar akan segala gerak-geri yang kamu lakukan. Setiap pergerakan dan perbuatan akan diselangi dengan KESEDARAN sebelum lakunan pergerakan dan perbuatan dibuat. Ini semua adalah datang dari KESEDARAN dari Faham, Yakin dan Taat akan maksud tujuan penciptaan manusia dan Faham, Yakin pada Tugas yang dibawa dan disampaikan oleh Rasulullah saw pada Hamba-hambaNya (umat Muhammad saw). KESEDARAN inilah akan bertindak sebagai perlindungan dari perbuatan yang menyesatkan. Selagi KESEDARAN tidak ada, segala perbuatannya yang baik tidak berguna, kerana tidak memahami 'kenapakah diriku berada disini'.

Saya percaya kamu (murid dan salik) sudah tentunya mempunyai kesedaran pada FAHAM, YAKIN dan TAAT.

Apa yang dimaksudkan oleh Habib Abdullah AlHaddad, adalah jangan merasa takut pada manusia dan bersandar (memandang/mengharap) kepada mereka. Perbuatan ini adalah sangat hina disisi Allah Taala dan menjerumuskan diri ke dalam API NERAKA, kerana melanggar perintahNya supaya hanya bertakwa (takut) kepadaNya sahaja tidak ada takwa (takut) selain daripadanya.

Apa yang membuat diri terjebak didalam perbuatan yang hina ini? Tidak lain adalah seperti yang telah diterangkan diatas. Sebagai tambahan supaya mendapat kefahaman yang lebih luas lihatlah keterangan-keterangan perbuatan yang dilakukan hingga terjebak pada perbuatan 'takutkan manusia' seperti berikut:

1. Tidak mengetahui maksud tujuan Allah Menciptakan dirinya?
2. Tidak mengetahui mengapa dan untuk apa dia berada di bumi ini?
3. Tidak mengetahui Tugas Amanat yang berikan oleh Allah Taala kepada Rasulullah saw;
4. Tidak ada kefahaman, keyakinan dan ketaatan kepada Allah Taala dan RasulNya.
5. Tidak mengenal siapa yang Maha Berkuasa, Yang Menciptakan Segalanya, Yang Maha Pengasih dan Penyayang, Yang Maha Mendengar Keluhan HambaNya, Yang Memberi Rezeki, Yang Menghidupkan dan Mematikan. Hanya mengaku-gaku saja dan dll.
6. Tidak ada Tauhid. Tidak belajar ilmu Tauhid. Tidak faham ilmu Tauhid. Bila tidak faham ilmu Tauhid bagaimana hendak mengenal Allah Taala?
7. Tidak menyakini bahwa Allah Taala yang memberikan rezki dan melindungi hambaNya.
8. Tidak meletakkan keutamaan Allah dan Rasul melebihi daripada isi dunia.

Inilah garis besar yang mesti diketahui sebelum mengetahui perkara-perkara yang bersangkutan dengan Agama Islam dan mengerjakan segala SyariatNya. Selagi perkara besar ini tidak dapat difahami, maka kamu tidak akan dapat 'yakin' (tidak ada iman) maka akan terdorong untuk tidak mahu mengerjakan ketaatan kepadaNya. Bilamana kefahaman tidak ada maka keyakinan pun tidak aka nada! (tak yakin pada Allah Yang Maha Berkuasa) atau keyakinan yang sangat tipis terhadap mengenai Kekuasaan Allah Taala.

Perbuatan keji ini adalah kerana desakkan untuk mencari rezki @ mencari wang ringgit untuk menampung keperluan hidup didunia ini. Kerana pada zaman sekarang ini wang ringgit

adalah sebuah alat keperluan yang harus ada untuk menyediakan keperluan seseorang ataupun keluarga. Kerana apa saja keperluan yang diperlukan memerlukan wang ringgit untuk mendapatkannya.

Hukum syariat sudah menjelaskan bahwa mencari rezki (bekerja ataupun berniaga) adalah tuntutan Agama Islam. Islam mewajibkan untuk bekerja sebagai tempat untuk mencari rezki buat penampungan keperluan diri dan keluarga. Maka keluarlah kamu ketempat pekerjaan atau perniagaan untuk mendapatkan rezki yang berbentuk kertas (wang ringgit/duit).

Sekiranya mencari rezki dari sumber bekerja ataupun berniaga dituntut dalam Islam, mengapa diberi amaran dengan kata-kata; 'jangan takutkan manusia'?

Sekiranya soalan ini tercetus dari hati bererti kamu tidak memahami keterangan perbuatan yang dilakukan hingga terjebak pada perbuatan 'takutkan manusia' seperti diatas.

Keterangan Garisan dan Panduan diatas adalah sebagai pelindung bagi kamu; maka hendaklah memahami garis dan panduan itu secepat-cepatnya dan jangan 'menunggu'.

Bila seseorang yang bekerja atau berniaga kenalah taat kepada etika syarikat pekerjaan atau syarikat perniagaan. Tidak ada salahnya didalam mentaati etika syarikat atau syarikat perniagaan didalam Islam. Malah ianya satu penghormatan bagi kamu sekira dapat menjalankan etika syarikat dan perniagaan kerana kamu melambangkan sifat seorang Muslim yang sebenar. Jadi dimana salahnya?

Kesalahan yang besar adalah kamu melihat majikan ataupun pekerjaan mempunyai KUASA. Seperti memberi gaji (yang berbentuk wang ringgit) atau menamatkan perkhidmatan kamu didalam syarikat. Apa yang ada didepan mata kamu adalah '**wang ringgit**' dan perasaan '**takut**' yang mencelakakan diri dari dibuang kerja. Ketaatan sebegini sangat-sangat dihargai oleh Islam tetapi malangnya Maruah Islam diketepikan. Kesedaran pada maruah islam sangat tipis hingga sanggup mengetepikan dan menanggukkan ketaatan kepada Allah dan RasulNya. Kerana 'takut' kepada Allah tidak dapat dikerjakan kerana tidak dapat dilihat oleh mata kepala dan tidak ada hukuman atasnya bila mengecilkan dan menanggukkan ketaatan pada Allah dan RasulNya. Tidak seperti bekerja atau berniaga.

Sekarang, kamu sudah mengetahui unsur pertama, terjebaknya diri adalah dari pukulan '**wang ringgit**'.

Keterangan dibawah ini sebagai petunjuk kepada kesalahan pertama yang dikerjakan;

1. Yakin akan adanya sifat BERKUASA terletak pada Majikan atau Pekerja. Bila sudah ada keyakinan dalam diri, barulah kamu dapat melakukan KETAATAN pada MAJIKAN@BOS. Kerana tujuan pertama adalah untuk mencari rezki 'wang ringgit'. Maka kamu sudah beriman dan yakin pada MAJIKAN @ BOS dalam memberikan rezki yang berbentuk 'wang ringgit'.
2. Bila sudah timbul KETAATAN pada MAJIKAN @ BOS, maka segala etika dalam syarikat dapat dijalankan dengan sempurna. Maka gembiranya hati MAJIKAN @ BOS.
3. Maka hilanglah KETAATAN pada Allah dan Rasul kerana KETAATAN sudah diberikan pada tempat lain. Sebagai contoh; Hak Waktu tidak dapat dikerjakan sama sekali kerana etika syarikat tidak mengizinkan untuk TAAT selain dari etika syarikat.

Apa itu Sholat Jumaat dah? . . . Kerana sholat jumaat tidak dapat digantikan oleh masa atau hari lain.

- 4. Oleh kerana etika syarikat melarang (mungkin tidak secara terang) tetapi masa yang diberikan tidak mencukupi untuk seseorang mengerjakan Sholat Jumaat dan kamu tidak mahu mengambil langkah-langkah untuk menyelamatkan Agama kerana 'takut diberhentikan oleh majikan' sekiranya kamu melanggar etika syarikat. Maka ditakuti rezki kamu terhalang dan menyakini rezki itu dalam genggaman Bos . . .*
- 5. Kamu tidak rela untuk diberhentikan oleh Bos kerana tidak yakin akan mendapat peluang pekerjaan ditempat lain dengan 'wang ringgit' yang setimpal seperti ditempat Bos. Maka ketaatan kepada Bos @ etika syarikat diturutkan walaupun mengadai maruah agama dan maruah diri sendiri.*
- 6. Bila ada kelas agama pada hari yang telah ditetapkan, kamu tidak dapat membuat permohonan untuk menghadiri kelas agama kerana BOS menghendaki kamu bekerja Overtime kerana ada kerja yang penting yang harus disiapkan. Disinilah letaknya ketaatan kamu pada arahan Bos. Berdetiklah hati kamu mengatakan 'tak apalah kali ini saja'. Bila 'kali ini saja' mudah dan senang diutarakan maka akan menjadi 'tak apalah' yang melekat selalu. Camkan! Tidakkah kamu dapat melihat KETAATAN yang diberikan pada BOS! Dimana letaknya KETAATAN pada Agama kamu? Jawapannya terletak pada; keterangan-keterangan perbuatan yang dilakukan hingga terjebak pada perbuatan 'takutkan manusia' seperti diatas. Maka tuntutan agama diketepikan kerana tidak penting. Kalau kamu bangkang, sudah tentunya kamu akan mengutamakan tuntutan agama, bukan? Perbuatan ini adalah semata-mata takutkan manusia yang terletak pada takutkan bos dan takutkan kehilangan pekerjaan (wang ringgit). Keistimewaan menghadiri kelas agama sudah pun kamu mengetahuinya. Dimana majlis seperti kelas agama atau majlis zikir sangat disukai oleh Allah dan RasulNya, disukai Para Malaikat, dan Orang-orang Sahilin. Perbuatan menghadiri kelas agama atau majlis zikir akan membuat Allah dan Rasul tersenyum tetapi kamu lebih rela buat Bos yang senyum. Kamu sudah mengetahui majlis zikir ini disukai oleh para malaikat di mana para malaikat akan memohonkan keampunan atas dosa-dosa kamu dari langkah pertama keluar dari pintu rumah sampai balik kerumah. Sekiranya kamu berada 1 jam dalam majlis zikir dimana para malaikat memohon keampunan untuk kamu sebanyak 10,000 kali (mungkin lebih tapi tak kurang) kepada Allah Taala, bagaimana kalau kamu duduk dimajlis zikir selama 3 jam atau 4 jam? Diri sendiri pun tidak dapat mengucapkan istighfar sebanyak itu. Disinilah kesalahan yang kamu tidak tahu atau tidak mahu tahu akan kelebihan mengutamakan apa yang disukai oleh Allah dan RasulNya.*
- 7. Tidak dapat melihat bahwa yang memberi pekerjaan atau perniagaan adalah Allah. Datangnya dari Allah. Mana mungkin datang dari selain Allah!*
- 8. Tidak dapat melihat bahwa gaji 'wang ringgit' diberikan oleh Allah. Datang dari Allah. Mana mungkin dari selain Allah?*
- 9. Tidak dapat melihat bahwa dengan Kasih Sayangnya Allah membawa kamu ketempat kerja atau perniagaan dimana rezki itu diletakkan. Siapa yang meletakkan? Bukankah Allah? Mana mungkin selain Allah.*
- 10. Siapa yang memelihara kamu semasa didalam kandungan ibu. Bukankah Allah? Mana mungkin selain Allah.*
- 11. Siapa yang memberikan kamu makan semasa didalam perut ibu kamu. Bukankah Allah? Mana mungkin selain Allah.*
- 12. Sesudah kamu dilahirkan, siapakah yang memberikan kamu makan, pakaian, perlindungan. Bukankah datang dari Allah yang mewakilkan kedua ibu bapa kamu.*

- Siapakah yang mengerakkan kedua ibu bapa kamu supaya menyampaikan makan, pakaian dan perlindungan. Bukankah Allah? Mana mungkin selain Allah.*
13. *Sampai saat dan waktu ini, siapakah yang memelihara diri kamu? Bukankah Allah? Mana mungkin selain Allah.*
 14. *Sekiranya kamu mengetahui akan kebenaran hakiki kesemuanya datang dari Allah, mengapakah kamu sanggup menjual agama Allah? Hanya untuk sesuap nasi, patut ke perbuatan kamu itu?*
 15. *Pernahkah kamu berterima-kasih kepada Allah setiap hari yang mengerakkan kamu ketempat kerja dan menyelamatkan diri, balik kerumah! Pernahkah? Ada! Bohong itu? Setiap hari ke???*
 16. *Kalau kamu yakin kepada segala-segalanya Allah-lah yang memberi makan, pakaian dan perlindungan kenapa kamu, masihkah takut pada Manusia?*
 17. *Tidakkah kamu ketahui bahwa Allah yang menguruskan APA SAJA KEPERLUAN kamu didunia ini selagi KETAATAN diberikan kepadaNya sampai kamu kelobang kubur! Ada? Tapi masih goyang-goyang. Bila goyang bukan ketaatan namanya.*
 18. *Selagi kamu menyakini bahwa manusia boleh memberikan kebaikan dan boleh mencederakan, maka kamu tidak ada IMAN (KEYAKINAN) pada Allah dan RasulNya. Maka kamu sudah menduakan Allah dengan mengambil selain daripadaNya iaitu BOS @ MANUSIA . . . Sememangnya kamu harus dihinakan oleh Allah Taala dan dimasukkan kedalam Api Neraka. Nauzubillah Min Zalik . . .*
 19. *Maka hendaknya kamu menjauhkan diri dari takutkan manusia, dimana akibatnya sangat-sangat dahsyat.*
 20. *Dan banyak lagi contoh-contoh;*

Perihal yang kedua iaitu jauhkan diri kamu dari tamakkan hak yang ada di dalam tangan manusia.

Kesalahan yang kedua yang sering (malah senantiasanya) dilakukan adalah bersandar, memandang dan mengharap kepada rezki yang berbentuk kekuasaan, wang ringgit, kebendaan, kedudukan dan pujian yang ada di dalam tangan manusia.

Kesalahan yang kedua ini (tamak) datangnya pertama sekali sebelum datang perasaan 'takut'. Bila niat tujuan untuk mendapatkan 'wang ringgit / gaji atau upah' begitu besar hingga tidak dapat melihat halal dan haram, pahala atau dosa, sunnah atau harus, kerana sudah dikaburkan oleh keinginan hawa nafsu untuk mendapatkan rezki (wang ringgit) supaya tercapai apa yang dihajatkan dalam keperluan-keperluan hidup didunia sementara ini. Sebagai contoh;

1. **Memenuhi keinginan hawa nafsu** pada keperluan **kebendaan** yang tidak ada kepentingan didalam keperluan kehidupan kerana sudah dimiliki apa yang dihajati. Seperti sudah ada rumah, sudah ada perabot rumah, sudah ada kenderaan, ada makanan, ada pakaian dan lain-lain. Oleh kerana keinginan hawa nafsu menebal, kerana ingin up-grade pada apa yang telah dimiliki supaya mendapat penghargaan dan penghormatan daripada jiran-tetangga dan manusia sekelilingnya sebagai orang yang dihormati dan supaya menjauhkan diri daripada dipandang rendah oleh jiran-tetangga dan manusia sekelilingnya.
2. **Mencari rezki 'wang ringgit'** dengan apa cara walaupun harus mengorbankan perintah dan larangan dari Allah Taala. Asal dapat 'wang ringgit'. Dapat duit . . .
3. **Memberikan sepenuh tenaga** kepada majikan didalam pekerjaan supaya mendapat **kepujian** dari majikannya sebagai pekerja yang 'baik'. Bila sepenuh tenaga sudah

diberikan pada majikan maka tenaga sudah tidak ada lagi untuk berkhidmat kepada Allah Taala maka Allah melabelkannya 'Hamba yang tidak baik'. Dalam hati mengatakan aku nak rehat dulu, Allah mengetahui. Memang benar apa yang dikatakan, Allah Maha Mengetahui . . .

4. Memberikan perkhidmatan yang cemerlang supaya dinaikkan gaji bulanan dengan harapan mendapat **kedudukan pangkat** yang lebih tinggi. Perkhidmatan cemerlang sudah diberikan pada majikan, maka perkhidmatan cemerlang tidak dapat diberikan untuk Allah Taala. Dah penat . . .
5. Merasa perkhidmatannya sangat-sangat diperlukan majikan (syarikat) kerana tanpa dirinya, orang bawahan tidak dapat menjalankan tugas. Merasa dirinya bersalah bila tidak dapat hadir ketempat kerja. Nak tunjuk dirinya seorang yang amanah! Tidak merasa bersalah bila tidak dapat menghadiri majlis zikir dan majlis belajar . . . Tidak merasa dirinya diamanahkan oleh Allah Taala untuk mengabdikan diri kepada Tuhan.
6. Berhajat pada sesuatu yang ada ditangan Bos atau majikan.
7. Sayang dan patuh pada perintah dan arahan Bos tidak kira apa juga waktu. Pasti dilaksanakan.
8. Berhajat pada sesuatu yang dibawa oleh sahabat handai yang sering datang tanpa tangan kosong. Perangai sama dengan syaitan pun tak apa, asal ada membawa sesuatu untuk dirinya atau keluarganya.

Keterangan kesalahan demi kesalahan, pertama dan kedua yang telah diterangkan diatas berpuncanya dari diri tidak mahu membantah dalam segala perbuatan bathil (berbuatan yang menyalahi disisi agama) dan sanggup mendiamkan diri terhadap orang-orang yang meringan-ringankan agama. Kamu sanggup meninggalkan amar ma'ruf dan nahi mungkar adalah semata-mata kerana 'wang ringgit / duit' dan penghargaan dan pujian dari manusia".

Kerana sesungguhnya orang Mu'min itu adalah mulia di sisi Tuhannya. Sekiranya seseorang saudara dari kaum Muslimin menghulurkan sesuatu bantuan atau berbudi kepada kamu dengan niat yang baik, maka bolehlah kamu menerimanya jika kamu memang memerlukan bantuan itu. Kemudian hendaklah mensyukuri Allah Taala terhadap pemberian itu kerana Dialah Pemberi yang sebenarnya, serta jangan pula lupa berterimakasih kepada orang yang menyampaikan pemberian ke tangan kamu. Sekiranya kamu tiada berhajat kepada pemberian itu, maka hendaklah tanya diri kamu terlebih dahulu. Jika hati kamu menentukan lebih baik kamu menerimanya, maka bolehlah kamu menerimanya. Tetapi jika hati kamu mengatakan pemberian itu tidak harus diterima, maka hendaklah kamu menolaknya dengan lemah lembut serta menjaga perasaan orang yang memberi supaya ia tidak kecil hati, kerana menjaga hati seorang Muslim dan penghormatannya adalah perkara yang dipandang berat oleh Allah swt.

Keterangan:

"Bab ini seperti apa yang sudah dijelaskan pada pelajaran yang lalu. Sekiranya ada seseorang saudara dari kaum Muslim menghulurkan sesuatu bantuan atau berbudi (berkhidmat) dengan niat yang baik, hendaklah terima sekiranya kamu memerlukan bantuan itu dan mensyukuri pada Allah Taala terhadap pemberian itu dan mendoakan orang yang menyampaikan pemberian ke tangan kamu. Sekiranya kamu tidak berhajat pada pemberiannya itu maka tanyalah diri terlebih dahulu. Jika hati mengatakan baik, maka terimalah bantuan itu, sekiranya hati kecil menolaknya maka bersifat lemah lembutlah padanya dan menjaga perasaan orang yang memberi supaya ia tidak berkecil hati. Kerana menjaga hati seorang Muslim dan penghormatannya adalah perkara yang dipandang berat oleh Allah swt. Sekiranya kamu dapat menjaga hati seorang Muslim dan menjaga penghormatannya, itu menunjukkan adanya perhubungan kamu dengan Tuhan mu".

Awas, jangan sekali-kali kamu tolak pemberian orang itu kerana menyombong diri, ataupun kamu menerimanya dengan menurutkan kehendak hawa nafsu adalah lebih utama bagi kamu daripada kamu menolaknya kerana menyombong diri ataupun kerana menunjukkan kezuhudan atau kerana konon-konon kamu sebagai seorang yang membelakangkan dunia dan tidak mencintainya.

Keterangan:

“Jangan sekali-kali bersikap menyombong diri menolak pemberian seorang muslim dengan bersandarkan pada sifat kezuhudan yang baru aje kamu belajar. Kamu belum lagi capai makam kezuhudan yang mulia itu dah nak cuba-cuba konon . . . Kononnya kamu tidak berhajat pada pemberian yang datang dari dunia, kerana hati kosong dari dunia. Banyak punya bohong . . . Sekiranya kamu bersikap sebegini yang baru aje belajar bab zuhud, maka lidah kamu harus dipotong supaya mendapat rahmat dan keampunan dari Allah Taala. Itu yang lebih baik, bukan?”

Seorang yang benar tidak akan terkeliru dalam perkara-perkara yang tersebut diatas tadi, sebab Allah Taala tetap akan memberi petunjuk dihatinya, sehingga mudah baginya untuk menentukan mana satu yang harus diputuskan.

Keterangan:

“Ingatlah semua, selagi kamu benar dilandaskanNya maka perkara-perkara yang telah dihuraikan diatas tidak akan dikelirukan kerana kamu sentiasa mendapat petunjuk dari hati yang datang dari Allah Taala disebabkan kamu sendiri yang MENJAGANYA”.

Mukasyafah (penyingkapan rahasia)

Diantara perkara-perkara yang boleh membahayakan seorang murid ialah mencita-citakan (menginginkan) *Mukasyafah (penyingkapan rahasia-rahasia Tuhan)* dan berharap keramat serta perkara-perkara diluar kebiasaan adat berlaku atas dirinya. Ingatlah wahai murid, bahwa perkara-perkara serupa ini tidak akan muncul selagi kamu dituntut atau diminta-minta dengan berdasarkan hawa dan nafsu kerana pada kebiasaanya ia tidak akan muncul melainkan pada orang-orang yang membencinya dan tidak menduganya sama sekali.

Keterangan:

“Kebanyakan murid dan salik bercita-cita untuk memperolehi ‘mukasyafah’ iaitu terbukanya rahasia-rahasia Tuhan dan bila terbukanya rahasia ketuhanan maka beralihlah ia untuk mencapai kedudukan keramat yang mempunyai perkara-perkara diluar kebiasaan adat resam sebagai manusia biasa kerana tercapainya kedudukan keramat akan membawanya kepada kedudukan luar biasa, macam ‘superman’. Ingatlah wahai murid dan salik, perkara ini tidak akan datang selagi kamu mencarinya atau meminta-minta dengan berlandaskan hawa nafsu. Kerana pada kebiasaanya keramat ini tidak akan datang melainkan pada orang-orang yang sangat membencinya dan tidak sangka sama sekali bila ia datang. Orang yang benci pada kedudukan keramat ini adalah semata-mata tidak mahu diganggu oleh manusia lain kerana tumpuan yang selama ini diberikan untuk Allah akan beralih kepada manusia dengan terpaksa melayani fi’il tabiat manusia yang hanya ingin kesenangan dan menolak kesusuhan kerana kebanyakan manusia sebegini adalah manusia yang buta mata hatinya”.

Adakalanya perkara-perkara seumpama keramat dan sebagainya itu berlaku juga pada golongan orang yang tertipu dengan cita-cita untuk mencelakakan dirinya dan sebagai suatu

pengujian terhadap kamu Mu'minin yang lemah I'tikadnya. Semua itu tidak boleh dikira sebagai keramat yang benar, malah ia merupakan sebagai suatu penghinaan kepada orang-orang yang mendakwa keramat itu. Sebab keramat hanya lahir (ada) pada orang-orang ahli *istiqamah*, yakni orang-orang yang sudah terkenal lurus dalam perjalanannya.

Keterangan:

“Kadang-kadang perkara seperti keramat berlaku juga pada orang yang tertipu dengan angan-angannya. Ini adalah sebagai hukuman dari Allah untuk mencelakakan dirinya dan sebagai pelajaran bagi kaum mu'minin yang lemah keyakinannya terhadap Allah Taala. Sekiranya berlaku juga sesuatu diluar dugaan manusia itu adalah ‘ketetapan hukum yang berlaku pada masa itu’ bukan pada keramat seperti yang didakwa oleh orang yang tertipu dan orang yang ditipu. Keramat hanya akan datang pada orang-orang yang ahli didalam istiqamah sahaja. Lain cara jangan haraplah! Istiqamah didalam menjalankan ketaatan perintah Allah Taala dan RasulNya. Sangatlah mudah untuk mengetahui seseorang itu menerima anugerah keramat ataupun tidak, lihatlah akan ketaatannya pada perintah Allah dan RasulNya. Mudah bukan! Maka dengan itu janganlah lekas terperdaya dengan dakwaan seseorang itu keramat atau tidak, lihatlah pada istiqamahnya”.

Wahai kamu murid! Sekiranya Allah Taala telah memberikan penghormatan keramat kepada kamu, maka hendaklah kamu mensyukuriNya. Awas, janganlah pula kamu berhenti dari meneruskan amalan kamu lantaran keramat itu telah muncul atas diri kamu. Juga hendaklah kamu tidak bermegah sangat dengan keramat itu, lalu kamu mengantungkan semua harapan ke atasnya. Hendaklah kamu merahsiakan keramat itu dari orang ramai dan jangan membicarakannya dengan mereka.

Keterangan:

“Sekiranya ditakdirkan oleh Allah Taala memberikan penghormatan keramat kepada kamu, maka hendaklah kamu mensyukuriNya atas pemberianNya. Tapi ingat! Selagi kamu tidak tahu mensyukuriNya bagaimana mungkin penghormatan keramat akan diberikan? Dan janganlah pula kamu ‘pencen’ pulak dari meneruskan amalan ketaatan kerana keramat sudah dapat dan kerana telah sebok melayani manusia . . . Janganlah kamu bertepuk dada lantaran keramat itu dan mengantungkan semua harapan kamu keatasnya. Kalau perbuatan itu tidak dibuat macam mana orang nak tahu kamu keramat? Rugilah . . . Duit tak masuk . . .”

Rahasiakan keramat itu dari orang ramai dan jangan membicarakannya kalau kamu tidak mahu disebokkan oleh mereka . . .”.

Akan tetapi, jika semua itu tidak pernah muncul atau lahir atas diri kamu, meskipun kamu telah banyak beramal dan beribadat, maka janganlah sampai kamu mencita-citakannya dan jangan juga merasa kesal dan dukacita, apabila dengan tiba-tiba ia hilang tidak menjelma lagi.

Keterangan:

“Sekiranya keramat itu tidak muncul atau datang atas diri kamu walaupun kamu telah banyak beramal dan beribadat, janganlah kamu berangan-angan kepadanya dan jangan merasa kesal atau dukacita apabila hilang dengan tiba-tiba, tidak datang lagi. Kembalikan fikiran kamu kepada ‘kenapa aku berada disini’”.

Hakikat Keramat

Ketahuiilah, wahai murid yang budiman, bahwasanya keramat yang merangkum semua jenis keramat, samada keramat yang hakiki (betul), mahupun keramat yang bukan hakiki, yakni rupanya saja kelihatan seperti keramat, tapi yang betulnya bukan keramat; semua itu berasal dari *istiqamah (berlaku lurus dalam jalan Allah)*; iaitu menurut perintah dan menjauhi larangan, lahir dan batin.

Keterangan:

“Hakikat keramat semuanya berasal dari istiqamah kepada Allah Taala dan sentiasa berada pada jalan yang lurus berpandukan AlQuran dan Sunnah RasulNya menjunjung tinggi segala perintah dan menjauhi segala laranganNya, zahir dan batin. Itulah keramat hakiki (yang benar).

Lantaran itu, hendaklah kamu membetulkan istiqamah kamu itu serta memeliharanya dengan baik, kelak semua *kaun (alam)* langit dan bumi akan terdorong untuk memberikan khidmat kepada kamu, sehingga kamu tidak akan terlindung lagi dari Tuhan kamu dan kamu tidak *masyghul (sebok)* lagi dengan selain dari melaksanakan kehendak-kehendakNya.

Keterangan:

“Oleh kerana itu hendaklah kamu sentiasa menyelidiki dan membetulkan istiqamah dan memeliharanya dengan baik, semata-mata kerana Allah, BUKAN MENGINGINKAN KERAMAT! Pasti Langit dan Bumi akan memberi khidmat mereka kepada kamu sehingga kamu tidak akan terlindung lagi dari Tuhan, ini adalah perjanjian Allah Taala kepada hambaNya yang menjaga istiqamah mereka. Kamu tidak sebok lagi dengan selain dari melaksanakan kehendak-kehendakNya”.

Sentiasa Menyangka Baik Terhadap Tuhan

Wahai murid yang budiman! Hendaklah engkau sentiasa menyangka baik terhadap Tuhan dan menyakini bahwa Dia sentiasa membantumu, mencukupimu, memeliharamu, melindungimu dan tidak membiarkan engkau terumbang-ambing sendirian atau menggantungkan harapanmu kepada manusia. Bukankah Tuhan telah memberitahu kita tentang ZatNya yang Maha Besar itu, bahwasanya Dia sentiasa berada ditentang sangkaan hambaNya terhadap ZatNya?! Lantaran itu hendaklah engkau membersihkan hati engkau dari perasaan takutkan kemiskinan atau menggantungkan harapan kepada orang lain.

Keterangan:

“Alhamdulillah, tajuk diatas termasuk salah satu tajuk yang amat penting sebagai cabang-cabang Tauhid. Tauhid adalah mengEsakan ZatNya, SifatNya, Asma'Nya dan Afa'alNya yang termaktub didalam Asma' Al Husna. Seseorang yang beriman (menyakini dan mengakui dengan lidah dan melaksanakan dengan anggota badan) terhadap Allah swt sebagai Tuhan seru sekalian alam dimana tidak ada sekutu bagiNya yang bersifat dengan segala sifat kesempurnaan, kesucian, kebesaran dan keadilan. Bila cabang-cabang tauhid yang bersangkutan dengan KeTauhidanNya dinodai (dikotori/dirosakkan) maka batallah Tauhidnya. Bila batal Tauhidnya, maka batallah Imannya. Bila batal Imannya, maka tidak termasuk dalam golongan orang-orang yang beriman pada Allah swt. Bila tidak termasuk dalam golongan orang yang beriman pada Allah swt, maka termasuk dalam golongan orang-orang yang sesat. Bila termasuk dalam golongan orang-orang yang sesat, maka kufurlah. Bila sudah kufur, maka neraka tempat kediamannya yang kekal. Itulah tempat bagi orang-orang

yang rugi. Seperti mana yang telah dijanjikan oleh Allah Taala. Mengapa dikatakan tempat bagi orang-orang yang rugi? Adalah kerana mereka sentiasa menyangka buruk terhadap Allah Taala . . .

Maka dengan itu wahai murid yang dihormati! Janganlah engkau sesekali menyangka tidak baik terhadap Tuhan engkau dengan tidak merasa YAKIN bahwa Allah Taala, sentiasa membantu engkau, mencukupkan engkau, memelihara engkau, melindungi engkau dan tidak akan membiarkan engkau terumbang-ambing seorang diri atau menggantungkan harapan engkau terhadap manusia. Bukankah Tuhan kita telah memberitahu kita semua tentang ZatNya, Yang Maha Besar, bahwa Dia sentiasa ada, pada sangkaan hambaNya terhadap ZatNya?! Maka dengan itu hendaklah engkau membuang segala sangkaan yang tidak patut padaNya (sangkaan yang buruk dan tidak patut) dan membersihkan hati engkau daripada perasaan Takutkan keMiskinan ataupun mengGantungkan Harapan kepada Manusia (makhlukNya).

Inilah perasaan-perasaan yang sentiasa menghantui seseorang bilamana keinginannya tidak diqabulkan oleh Tuhan. Bilamana hajatnya tidak kesampaian maka melantunlah, keluarlah dari hatinya sangkaan-sangkaan buruk terhadap Allah Taala dengan memajukan segala macam soalan-soalan yang dilemparkan kepada Allah diatas ZatNya, SifatNya, Asma'Nya dan Afa'alNya hanya disebabkan tidak dimakbulnya hajat dan keinginan!

Mengapakah seseorang yang sudah mengetahui akan Sifat-Sifat Allah Taala tergamak melantunkan soalan-soalan dan melemparkan berbagai sangkaan-sangkaan buruk terhadap Allah swt? Semuga Allah menjauhkan dan melindungi kita semua daripada perbuatan sedemikian. Hanya padaNya kita menggantungkan segala harapan dan memohon kepadaNya supaya sudi menerima Taubat semua. Amin Ya Rabbal Alamin.

Dengan itu mari bersama-sama mencari punca-punca dan bagaimana ianya boleh timbul yang mengakibatkan perbuatan yang sangat biadab, yang mendatangkan keMurkaanNya dan membawa seseorang itu terkeluar dari Agama Islam. Na'uzubillahminzalik!

Hendaknya diketahui bahwa yang pertama sekali dalam Islam, seseorang itu wajib mengetahui dengan cara belajar Ilmu Tauhid iaitu ilmu pengetahuan bagaimana cara untuk mengEsakanNya, dan mengEsakan segala sifat-sifat, asma' dan afa'al yang ada pada Tuhan, yang wajib, yang mustahil dan yang harus. Sebelum seseorang itu menjerumuskan diri didalam segala ibadah yang diperintahkanNya. Bagaimana mungkin seseorang melaksanakan ibadah yang difardukan olehNya, padahal ia tidak mengetahui akan sifat-sifat Tuhan yang wajib, mustahil dan harus?

Nah! Itulah dia jawapan yang dicari, **TAUHID!**

Punca segala sangkaan buruk terhadap Allah Taala adalah **tidak ada Tauhid, tidak belajar ilmu TAUHID! tidak faham ilmu TAUHID!** Bilamana tidak ada ilmu tauhid dan tidak faham ilmu tauhid bagaimana hendak mengamalkan **ILMU TAUHID!** Bila seseorang berlakuan **BIADAB** terhadap Allah Taala dengan sadar ataupun tidak sadar disebabkan tidak memahami, tidak mendalami dan tidak mengamalkan **KETAUHIDAN**nya maka tingkah laku perbuatan yang biadab dan kurang ajar itu tidak dipedulikannya hanya gara-gara permohonan, permintaan dan hajatnya tidak dimakbulkan oleh Tuhan kerana Allah Maha Mengetahui didalam permohonan, permintaan dan hajatnya itu adalah semata-mata Takutkan Kemiskinan dan menggantungkan harapan yang besar terhadap manusia

(makhluk Allah) supaya Tuhan menyampaikan permohonan dan hajatnya dimana pada pandangan mereka ada sesuatu yang berkuasa dan dapat memberi manfaat pada tangan manusia dan makhlukNya tetapi BUKAN DIMOHON KEPADA ALLAH SEMATA-MATA! Diibaratkan Allah Taala sebagai alat, bila mana mahu digunakan, barulah digunakan alat itu, kalau tidak ada apa-apa, maka alat itu disimpan didalam stor! Mungkin kat belakang rumah!

'Ya Allah, kami adalah milikMu, kami adalah makhlukMu, kami tidak ada daya dan upaya untuk menghindarkan diri dari perbuatan sangkaan buruk terhadapMu. Kami sangat lemah dan kami tidak mempunyai kekuatan. Maka dengan itu wahai Tuhan kami, kami bersandar pada Engkau yang Maha Kuasa dan kami bersandar kepadaMu yang Maha Gagah. Lindungilah diri-diri kami daripada segala perbuatan keji dan hina samada sedar atau tidak kerana Engkaulah tempat sebaik-baiknya untuk kami berlindung didalam pelukkanMu yang Maha Pengasih dan Lai MahaPenyayang. Ya Allah berilah selawat, salam dan kesejahteraan kepada Nabi dan RasulMu, Muhammad saw, kepada Ahlul Baitnya juga kepada para Sahabatnya. Amin Ya Rabbal Alamin'.

Begitulah yang terjadi dan akan terjadi pada diri seseorang seperti yang telah dijelaskan diatas tadi. Untuk berada didalam lingkungan orang-orang yang selamat didunia dan diakhirat hendaklah sentiasa bergantung dan bersandar hanya padaNya dengan tidak meminta sesuatupun yang ada ditangan manusia (makhlukNya) kerana Allahlah Yang Maha Pemberi dan sepatutnya dan selayaknya bermohon kepadaNya, bukan selain daripadaNya. Itulah Tauhid!

Untuk sentiasa bersangka baik terhadap Tuhan, marilah sama-sama kita menyelam pada lautan KeTauhidan (ingat, bila menyelam, jangan dalam sangat, ditakuti mati lemas atau kehabisan oksigen didalam tangki kerana asyik melihat PERBENDARAHANNYA YANG SANGAT LUAS) untuk mengambil Permata-Permata sebagai lampu suluh sebagai penyuluh jalan pada diri supaya tidak tersesat atau termasuk dalam longkang yang busuk lagi dalam dan dalam keadaan gelap pekat, untuk menuju kepadaNya.

Mari kita ambil permata-permata yang berada didalam lautan KeTauhidanNya seperti berikut:

- 1. Membantu – Al Latif;**
- 2. Mencukupkan – Al Wahhab; Al Karim; Al Wakil; Al Bassith;**
- 3. Memelihara – Al Waliy;**
- 4. Melindungi – Al Mukmin; Al Hafiz;**
- 5. Tidak Membiarkan Sendirian – Al Muhaimin;**

Inilah permata-permata yang sempat dikutip dalam lautan keTauhidanNya yang Luas dengan keizinanNya. Oleh kerana terbatasnya oksigen dan terlalu dalam lautanNya, dek kelemahan yang ada pada diri, Alhamdulillah cukuplah kiranya lima (5) permata itu sebagai pedoman buat diri dan yang terbesar pemberianNya adalah anak kunci bagi membuka peti-peti yang berisi permata tersebut. Tanpa anak kunci tersebut bagaimana cara untuk peroleh permata tersebut? Alhamdulillah.

Anak kunci bagi peti-peti permata tersebut ialah:

- 6. Keyakinan – Zahir dan Batin!**

Mari sama-sama membuka dan melihat peti yang berisi permata yang pertama; Bismillahirrahmannirrahim! Senyumlah sikit, jangan cemas!

1. **Peti Pertama (1):** NamaNya, **Al Latif** dan Sifat Al Latif adalah perbuatanNya, Yang mengetahui segala perkara walaupun yang sehalus-halusnya dan sangat kasihan terhadap segala makhlukNya. Maka dengan itu hendaknya kamu jangan sekali-kali khawatir, cemas dan bersangka buruk terhadap Allah Taala kerana Dia sentiasa membantu urusan kamu (makhlukNya) didunia ini dan sentiasa Berlaku Maha Lembut pada sekalian.
2. **Peti Kedua (2):** Peti ini mempunyai beberapa NamaNya yang Agung seperti **Al Baasith** dan Sifat Al Baasith adalah perbuatanNya, Yang melapangkan kehidupan atau menambahkan rezeki seseorang yang Dia kehendaki. **Al Karim** dan Sifat Al Karim adalah perbuatanNya, Yang amat pemurah, sehingga Dia memberikan segala keperluan kepada makhluk-makhlukNya tanpa diminta dan diberikan tanpa wasilah, tanpa perantara. Ingat: kaki, tangan dan semua alat jasmani dan lain-lain keperluan hidup yang didapati tanpa meminta dan berikhtiar untuk mendapatkannya. **Al Wahhaab** dan Sifat Al Wahhaab adalah perbuatanNya, Yang amat banyak dan tidak terhingga pemberianNya, mudah memberi apabila diminta. **Al Wakiil** dan Sifat Al Wakiil adalah perbuatanNya, Yang melaksanakan segala urusan makhlukNya. Maka dengan itu hendaknya kamu jangan sekali-kali khawatir, cemas dan bersangka buruk terhadap Allah Taala kerana Dia sentiasa mencukupkan urusan kamu (makhlukNya) didunia ini.
3. **Peti Ketiga (3):** **Al Waliy** dan Sifat Al Waliy adalah perbuatanNya, Yang menolong atau Yang mengendalikan seluruh urusan makhlukNya. Maka dengan itu hendaknya kamu jangan sekali-kali khawatir, cemas dan bersangka buruk terhadap Allah Taala kerana Dia sentiasa memelihara kamu (makhlukNya) didunia ini.
4. **Peti Keempat (4):** **Al Hafiz** dan Sifat Al Hafiz adalah perbuatanNya, Yang memelihara atau melindungi segala makhlukNya dari segala bahaya atau kecelakaan. Maka dengan itu hendaknya kamu jangan sekali-kali khawatir, cemas dan bersangka buruk terhadap Allah Taala kerana Dia sentiasa melindungi kamu (makhlukNya) didunia ini.
5. **Peti Kelima (5):** **Al Muhaimin** dan Sifat Al Muhaimin adalah perbuatanNya, Yang memerhatikan semua makhlukNya dengan pengamatan yang teliti. Tanpa pemerhatianNya mustahil makhluk dan alam ini akan selamat. Maka dengan itu hendaknya kamu jangan sekali-kali khawatir, cemas dan bersangka buruk terhadap Allah Taala kerana Dia tidak akan membiarkan kamu (makhlukNya) sendirian didunia ini.

Itulah dia kelima peti-peti yang berisi permata dariNya. Seperti yang disebutkan diatas, terlalu amat banyak peti-peti permata yang tidak dapat diambil oleh kerana terbatasnya kekuatan kita sebagai hamba dan makhlukNya.

Kunci bagi pengamatan dan pengamalan adalah 'KEYAKINAN' atau 'BERIMAN'. Tanpa keyakinan kepada sifat-sifat Allah Taala yang telah dijelaskan maka itu menandakan seseorang itu tidak berkeyakinan atas Sifat-Sifat Allah.

Lupakah kamu, bahwa Allah telah memberitahu kita tentang ZatNya yang Maha Besar itu, melalui RasulNya saw dan AlQuran? Adakah kamu lupa atau tidak menyakini akan sifat-sifatNya oleh kerana tidak dapat apa yang dihajati? Adakah itu 'BERIMAN' namanya? Kami serahkan jawapan pada diri masing-masing!

Allah Taala berkata bahwa Dia sentiasa berada (selalu ada/tetap ada/walaupun tidak dipanggil) pada sangkaan hambaNya terhadap kebesaran ZatNya! Oleh kerana itu hendaknya engkau sentiasa membersihkan dan membuang segala perasaan takutkan kemiskinan, takutkan manusia dan menggantungkan harapan kepada manusia. INGAT, ALLAH SENTIASA BERADA PADA SANGKAAN HAMBANYA!!! ALLAH MAHA MELIHAT DAN MENDENGAR!!!”

Ingat! Sesungguh ingat! Jangan sekali-kali engkau terlampau bimbang dengan urusan rezeki tetapi hendaklah engkau puashati dengan janji Tuhanmu dan jaminanNya terhadap rezekimu. Bukankah Allah Taala telah berfirman;

“Tiada suatu yang melata di atas bumi ini, melainkan Allah menjamin rezekiNya”

Keterangan:

“Ayat diatas menandakan amaran yang besar dimana larangan itu sangat jelas sekali untuk membimbing kamu supaya jangan terlampau bimbang (resah dan gelisah) pada urusan rezeki. Sebaliknya hendaklah engkau menaikkan rasa puashati dan berpegang erat-erat pada janji Tuhanmu dan jaminanNya terhadap rezeki kamu. Seperti yang terdapat dalam peti peti permata itu. Ini dapat dilakukan dengan cara menghadirkan Allah Taala sentiasa dan yakinlah bahwa Allah Maha Melihat dan Maha Mendengar didalam segala gerak-geri. Lihatlah pada firmanNya yang menjamin rezeki sekalian hamba dan makhlukNya”. Dengan cara begini, insyallah, kamu tidak tergamak untuk bersangka buruk terhadap KebesaranNya!”

Ingatlah bahwa engkau tergolong haiwan yang melata diatas muka bumi ini. Oleh itu hendaklah engkau memperbanyakkan amalan yang diperintahkan oleh Allah supaya engkau mengamalkannya sebagai balasan rezeki yang dijaminNya untuk engkau kerana Tuhanmu tidak pernah melupakan engkau. Dia telah memberitahu engkau bahwa rezeki engkau itu ditanggung olehNya lalu Dia menyuruh engkau memintanya dengan engkau melakukan ibadat dan taat kepadaNya.

Allah telah berfirman;

“Maka mintalah rezeki itu dari Tuhan dan sembahlah Dia dan syukurilah Dia”
(al ankaabut: 17)

Keterangan:

*“Engkau termasuk dalam golongan haiwan (binatang) yang merayap diatas muka bumi ini. Tidak ada perbezaannya antara engkau dengan haiwan (binatang) yang lain dikeranakan engkau TIDAK MALU, MACAM HAIWAN. MAKAN, BERAK, JIMAK DAN TIDOR DIBUMINYA, tapi masih bersangka buruk keatasNya. Maka hendaknya jangan merasa sombong diri terhadap makhlukNya kerana mereka lebih baik dari engkau. Hendaklah engkau memperbanyakkan amalan yang diwajibkan oleh Allah Taala supaya engkau mengamalkannya (melaksanakannya) sebagai balasan terima kasih diatas rezeki yang sudah dijaminNya untuk engkau. Tanyalah pada diri sejauh ini, adakah engkau pernah mati disebabkan tidak mendapat rezki (akibat tidak makan)? Sudah pasti tidak, bukan? Kerana Tuhan engkau TIDAK PERNAH MELUPAKAN ENGKAU! Sebaliknya ENGKAU YANG MELUPAKANNYA! Tetapi Dia tidak marah, malah memberi peluang dan senantiasa **BERSANGKA BAIK terhadap hambaNya** dan tetap dengan Sifat dan Perbuatan keatas makhlukNya sebab ‘ALLAH, MAHA PENGASIH LAGI PENYAYANG’.*

Allah Taala telah memberitahu engkau bahwa rezki engkau itu ditanggung olehNya oleh kerana itu hendaklah engkau sentiasa meminta kepadaNya kerana dia adalah Al Baasith dengan melaksanakan ibadat dan taat hanya kepadaNya. Seperti firmanNya diatas”.

Tidakkah engkau dapati bahwa Dia telah memberi rezeki kepada orang-orang yang tidak percayaiNya dan yang menyembah selain dariNya? Patutkah engkau mengira bahwa Dia tidak akan memberi rezeki kepada orang-orang yang mempercayaiNya dan yang tidak menyembah selainNya?! Tidakkah engkau lihat bahwa Dia telah memberi rezeki kepada orang-orang yang mendurhakaiNya dan orang-orang menyalahi perintahNya? Takkan sampai hati Dia tidak pula memberi rezeki kepada orang-orang yang taat kepada perintahNya dan orang-orang yang sentiasa mengingatiNya dan mensyukuriNya?!

Keterangan:

“Oleh kerana terlalu kemaruk untuk menjadi kaya dan menggantungkan harapan yang besar pada manusia hingga lupa diri, lupa daratan dan tergamak hati, bersangka buruk terhadap Tuhan seru sekalian alam. Hendaklah diketahui dan berjaga-jaga bahwa lupa diri ini berpunca dari tidak percaya kepada Allah Taala, Yang Memilik Segala Kuasaan dan Kebesaran dan sanggup menjilat-jilat kaki manusia (mahluk) asalkan hajatnya tercapai! Sebuah jilatan seperti anjing. Jangan sampai kamu mengadaikan Keimanan hanya untuk sesuap nasi!

Bukalah mata kepala dan mata hati engkau bahwa Allah Taala telah memberi rezki kepada orang-orang yang tidak percaya kepadaNya (tidak beriman) dan memberi rezki pada penyembah selain daripadanya? Tergamakkah engkau mengira bahwa Dia tidak akan memberi rezki kepada orang-orang yang mempercayaiNya (beriman) dan tidak menyembah selain daripadanya.

Takkan engkau tidak nampak bahwa Allah telah memberi dan sentiasa memberi rezki kepada orang-orang yang durhaka dan melanggar perintahNya? Kalau mata hati engkau buta takkan mata kepala engkau pun buta?

Takkan Dia sampai hati, dengan tidak memberi rezki kepada orang-orang yang taat kepada perintahNya dan orang-orang yang senantias mengingatiNya dan sentiasa bersyukur kepadaNya diatas segala pemberian yang diberi samada dengan kesedaran ataupun tidak. Begitulah sifatNya yang Maha Pengasih dan Penyayang kepada setiap mahlukNya bukan khusus untuk manusia sahaja. Fahamilah ini!”

Hukum Mencari Rezeki

Ketahuiilah wahai murid yang budiman, bahwasanya tiada berdosa jika engkau keluar berusaha untuk mencari rezeki dengan menggunakan tenaga empat kerat menurut cara-cara yang dibenarkan oleh syara'. Yang tidak boleh ataupun berdosa ialah apabila hati engkau tidak tenang dan tenteram, malah sentiasa cemas memikirkan tentang rezeki serta menurutkan berbagai waham yang timbul didalam fikiran.

Keterangan:

“Tidakkah berdosa jika engkau keluar berusaha/ikhtiar untuk mencari rezeki dengan menggunakan tenaga empat kerat mengikut apa yang dibenarkan oleh syara'. Yang tidak boleh dan berdosa apabila hati (tumpuan fikiran engkau) tidak tenang dan tenteram, disebabkan

terlalu sangat memikirkan tentang rezeki serta mengikutkan sangat bermacam khayalan dan keinginan yang timbul didalam fikiran yang dibangkitkan oleh syaitan. Janganlah engkau mempunyai pengertian yang salah didalam melihat perbuatan Allah Taala dengan SifatNya hingga tidak mahu keluar mencari rezeki! Ini adalah satu keyakinan yang salah dari sisi hukum syara'. Waspadalah, jangan cuba-cuba nak meniru kedudukan para alim ulama yang mendapat rezki dari Tuhan mereka! Awas! Jangan cuba-cuba nak duduk kat atas tikar sembahyang menunggu rezki jatuh dari langit, sedangkan engkau ditakdirkanNya untuk mencari asbab! Bukan duduk aje!

Diantara tanda-tanda yang menunjukkan bahwa hati seseorang itu telah rosak; iaitu apabila ia terlampau memikirkan tentang hajat dan keperluannya untuk masa-masa yang belum wujud lagi, seperti keperluannya pada hari esok dan bulan hadapan. Umpamanya, ia berkata pada dirinya: Jika rezeki ini habis dari mana akan datang yang lain? Atau pun ia berkata: Kalau rezeki tidak datang dari sumber ini, maka dari sumber yang mana pula ia akan datang?

Keterangan:

“Ambillah langkah berhati-hati dengan mengambil sedikit masa untuk melihat samada engkau memiliki tanda-tanda hati yang rosak, dengan cara melihat pada perbuatan diri seharian! Sekiranya terlalu asyik, terlalu sangat memikirkan tentang hajat dan keperluan iaitu ‘DUIT’ untuk masa-masa (hari) yang belum datang lagi, seperti keperluan pada hari esok dan keperluan untuk bulan hadapan maka engkau termasuk dalam golongan orang-orang yang memiliki hati yang rosak!

Bila seseorang itu terlampau memikirkan sesuatu yang menakutkan pada mata fikirannya dengan soalan-soalan yang tidak ada habisnya seperti:

- 1. Kalau rezki ini habis dari mana akan datang rezki yang lain?*
- 2. Kalau rezki ini tidak datang, dari mana pula rezki lain akan datang;*

Inilah kejutan-kejutan yang mendatangkan ‘ketakutan’ pada seseorang. Takut rezkinya tidak ada, sedangkan dia masih hidup dan perlu menghadapi segala kekurangan atau kekosongan rezki itu!

Mengapakah boleh terjadi sampai begitu sekali? Tidak lain, kerana dalam diri sudah tertanam bahwa engkau tidak akan mati pada hari esoknya. Sedangkan engkau asyik melihat hari esok yang mungkin datang ataupun tidak! Dan Tauhid terhadap Allah Taala, tersangat lemah hinggakan dengan sedikit aje tiupan angin sudah mengelabah! Mana Tauhid engkau! Mana Keimanan engkau! Adakah Tuhan engkau tersangat zalim atas diri engkau! Atau engkau, yang menzalimi diri engkau sendiri! Zalimi diri yang macam mana???”

Samada seseorang itu menggantungkan nasibnya kepada sebab-sebab yang tertentu ataupun tidak menggantungkannya, maka kedua-keduanya itu adalah dua aliran yang telah ditentukan oleh Allah Taala kepada sesiapa yang disukaiNya dari hamba-hambaNya. Sesiapa yang tidak punya tempat untuk bergantung, maka hendaklah ia mempunyai keyakinan yang kuat tentang ketentuan Allah itu, sentiasa berlapang dada dan melazimkan ibadat sepanjang masa. Dan sesiapa yang ditentukan baginya sebab-sebab, maka hendaklah ia bertakwa kepada Allah dan menggantung nasibnya kepada Allah, dan bukan kepada usahanya sendiri, dengan sentiasa ingat supaya ia tidak melalaikan dirinya dari membuat ketaatan kepada Tuhan.

Keterangan:

“Setiap makhlukNya yang menggantungkan nasibnya kepada sebab-sebab yang tertentu ataupun tidak menggantungkannya, maka mahamilah, kedua-keduanya telah ditentukan oleh Allah Taala kepada semua hamba-hambaNya. Kerana Dialah Yang Maha Pemberi. Segala nasib berpunca dariNya.

Bagi sesiapa yang tidak mempunyai tempat untuk bergantung, maka hendaklah mempunyai keyakinan yang kuat tentang ketentuan (takdir) Allah Taala. Sentiasa didalam keadaan berlapang dada (siap menerima) dan mengistiqamahkan ibadah sepanjang masa untukNya.

Sesiapa yang sudah ditentukan bagi dirinya dengan sebab musabab, maka hendaklah selalu berada didalam keadaan bertakwa kepada Allah and menggantungkan nasibnya kepada Allah, BUKAN kepada usahanya sendiri!!! Hendaklah sentiasa didalam keadaan ingat supaya tidak dilalaikan dirinya oleh kesibukkan pada sebab musabab dari membuat ketaatan kepada Allah Taala”.

Adakalanya muncul dihati para murid berbagai lintasan fikiran mengenai urusan rezki, ataupun mengenai perkara-perkara yang terpendang dalam masyarakat, umpama pangkat dan kedudukan, maka tiadalah yang demikian itu tercela dan berdosa, selagi mereka merasa benci terhadapnya serta menolak lintasan fikiran itu dari lubuk hatinya.

Keterangan:

“Akan muncul berbagai-bagai lintasan fikiran pada murid-murid mengenai soal urusan rezekinya ataupun perkara-perkara yang menjadi idaman dan dipandang baik dalam masyarakat seperti; kenaikan pangkat dan kedudukan. Maka hendaklah diketahui, perkara itu tidak tercela dan tidak berdosa, selagi kamu ada perasaan benci terhadap perkara-perkara yang menjadi idaman masyarakat. Hendaklah engkau menolak lintasan, khayalan, angan-angan itu dari fikiran dari lubuk hati. Sekiranya engkau dapat berbuat demikian, maka engkau termasuk dalam golongan hamba-hambaNya yang bersyukur”.

Teman Yang Baik

Wahai murid yang budiman! Hendaklah kamu mengambil berat tentang persahabatan dengan orang-orang yang baik, dan selalu datang menghadiri majlis orang-orang sholeh yang terkenal patuh kepada Allah Taala. Carilah seorang Syeikh yang sholeh ataupun seorang guru yang sentiasa bersedia untuk menasihatkan kamu dalam urusan agama, tekun menjejak tarikat (jalan Allah), kenal benar akan hakikat, sempurna akal fikirannya, sentiasa berlapang dada, bijak mengatur hal-ehwalnya, pandai mengecam tabiat-tabiati manusia, fitrahnya, hal-ehwalnya. Jika kamu mendapati seorang Syeikh seperti yang diterangkan sifat-sifatnya, maka hendaklah dappingkan diri kamu kepadanya dan serahkan segala urusan kamu, turutlah ia dalam segala perbuatan dan perkataan, kecuali dalam perkara-perkara khusus yang berkaitan dengan martabat dan kepangkatannya sebagai Syeikh; umpamanya dalam percampur-gaulannya dengan orang ramai, dalam menguruskan kerja-kerja sehari-hari dan dalam menyeru orang-orang yang dekat dan yang jauh ke jalan Allah dan sebagainya. Dalam perkara-perkara tersebut, hendaklah kamu akur dengan Syeikh itu dan jangan sekali-kali membantah dalam apa sekalipun dari hal-ehwalnya, samada yang zahir mahupun yang batin. Andaikata terlintas dihati kamu sesuatu dari sangkaan buruk terhadap dirinya, maka hendaklah kamu segera menolak sangkaan buruk itu. Jika kamu masih belum puas hati lagi, maka hendaklah kamu menerangkan perkara itu kepada Syeikh itu supaya ia boleh menjelaskan kepada kamu keadaan yang sebenarnya sehingga kamu terlepas dari sangkaan buruk itu. Hendaklah kamu

memberitahu kepada Syeikh segala apa yang berlaku ke atas diri kamu, terutama sekali dalam perkara-perkara yang berkaitan dengan penujuan diri kamu ke jalan Allah Taala.

Keterangan:

“Tajuk ini bersangkutan dengan ‘Mencari Teman Baik’ dimana kedudukannya (tingkatannya), sesudah beriman pada Allah dan Rasul, (Ilmu Tauhid). Teman Baik yang dimaksudkan adalah Teman Yang Bermanfaat Disisi Allah Taala dimana tingkatan mereka sungguh-sungguh dekat sekali iaitu, sesudah beriman pada Allah dan RasulNya. Siapakah mereka yang digelar Teman Yang Baik disisi Allah dan RasulNya? dan Bagaimana mendapatkannya? Maka seterusnya, insyallah akan kami berikan sedikit panduan bagi mereka yang benar-benar (jujur dan ikhlas) yang ingin memperolehinya.

Pada zaman sekarang, tidak banyak manusia yang hendak mengambil berat tentang menjalinkan persahabatan dengan orang-orang yang baik. Oleh kerana manusia zaman kini sudah terlalu sibuk mengejar keperluan hidup kebendaan di dunia ini hingga tidak ada masa dan tidak mahu mengorbankan sedikit masa untuk mengadakan persahabatan dengan orang-orang yang baik.

Mereka telah dilalaikan oleh Hawa Nafsu hingga lupa kepada kehidupan di akhirat. Walaupun mereka mengakui adanya kehidupan di akhirat kelak tetapi hanya di lidah sahaja. Kalau tidak, mengapakah mereka tidak mempersiapkan bekalan untuk kehidupan di akhirat? Adakah mereka tidak akan MATI?

Tidakkah mereka dapat melihat, bahwa sekiranya kehidupan di dunia memerlukan pengorbanan untuk mencapai keperluan hidup, tidak kira apa tujuannya, samada baik atau tidak, mesti ada pengorbanan. Baru dapat apa yang di idam-idamkan pada kehidupan di dunia yang tidak kekal ini.

Begitu juga dengan kehidupan di akhirat, memerlukan pengorbanan buat kehidupan di akhirat kelak yang kekal abadi. Hanya di akhirat tidak ada lagi pengorbanan untuk dibuat kerana negeri akhirat bukanlah tempat untuk bekerja keras buat mendapatkan keperluan hidup kekal. Negeri akhirat adalah tempat untuk mengecapi kenikmatan sesudah membuat persiapan untuk akhirat di dunia!

Bagi sesiapa yang ingin mengambil berat tentang kehidupan di negeri akhirat hendak mengikuti panduan-panduan yang sederhana ini;

- 1. Carilah masa. Korbankan masa walau sesibuk bagaimana pun sekali. Pengorbanan harus dibuat kerana masa sentiasa ada selagi kamu bernafas. Dan jalan sekali-sekali memberikan alasan pada masa!*
- 2. Untuk mencari orang-orang yang baik, kenalah berada bersama dengan orang-orang yang baik.*
- 3. Untuk menjalin persahabatan dengan orang-orang yang baik hendaklah selalu datang menghadiri majlis mereka yang terkenal patuh kepada Allah Taala atau yang tidak terkenal.*
- 4. Untuk mencari Syeikh yang sholeh ataupun seorang Guru lihatlah pada cirri-ciri yang harus ada pada mereka seperti:
 - a) Sentiasa bersedia untuk menasihatkan tidak kira siapa dalam urusan agama;*
 - b) Tekun mengikuti jejak tarikat (jalan Allah);*
 - c) Mengetahui yang benar akan Hakikat kebenaran;**

- d) Sempurna akal fikirannya;
- e) Sentiasa berlapang dada;
- f) Bijak mengatur penghidupannya didunia untuk akhirat;
- g) Mengetahui dan dapat mengesan tabiat-tabiati manusia;
- h) Mempunyai bakat semula jadi (fitriah);
- i) Hal-ehwalnya (berbagai-bagai keadaan, perkara atau peristiwa);

Sekiranya atas izin Allah kamu mendapati seorang Syeikh (Guru) seperti diterangkan sifat-sifatnya, maka ikutilah panduan berikutnya;

1. Hendaknya mendampingi diri (sentiada bersamanya);
2. Serahkan segala urusan kamu;
3. Ikutilah ia dalam segala perbuatan dan perkataan;
4. Hendaklah kamu akur (taat) dengan Syeikh (Guru) itu;
5. Jangan membantah Syeikh (Guru) dalam apa sekalipun hal-ehwalnya, samada zahir atau batin.
6. Jangan sesekali ada sangkaan buruk ke atasnya;
7. Menolak segera segala sangkaan buruk;
8. Memberitahu kepada Syeikh (Guru) apa yang berlaku keatas diri terutama yang bersangkutan dengan perjalanan menuju Allah.
9. Jangan bersikap biadab dengan perkara-perkara khusus yang berkaitan dengan martabat (kedudukan maqam) dan kepangkatan sebagai seorang Syeikh (Guru); dalam pengurusan kerja-kerja sehariannya, percampurannya dengan orang-ramai dan dalam menyeru orang-orang yang dekat dan jauh ke jalan Allah Taala.

Begitulah sedikit panduan, semoga mendapat keberhasilan untuk memperolehi dan berdamping dengan 'Teman Yang Baik'. Insyallah”.

Perhubungan Dengan Seorang Sheikh

Wahai murid yang budiman! Awas jangan sekali-kali kamu mentaati Syeikh secara zahiriah semata-mata, kerana kamu mengetahui bahwa Syeikh itu dapat mengesan ketaatan kamu kepadanya. Sedang dibelakangnya, kamu membantah dan mendurhakainya kerana pada sangkaan kamu dia tiada mengetahui kelakuan kamu itu, kelak kamu akan terjerumus ke dalam kecelakaan dan kebinasaan.

Keterangan:

“Ini adalah kesambungan dari tajuk 'Teman Yang Baik', maka panduan berikutnya seperti;

1. Hendaknya kamu mentaati Syeikh (Guru) secara zahir dan batin;
2. Berkeadaan Yakin bahwa Syeikh (Guru) dapat mengesan ketaatan, atas izin Allah;
3. Jangan membantah dihadapannya;
4. Jangan membantah dibelakangnya;
5. Jangan mendurhaka kepadanya atas amanah-amanahnya;
6. Jangan ada sangkaan bahwa Syeikh (Guru) tidak mengetahui kelakuan dan perbuatan;

Jangan sekali-kali melanggar panduan-panduan diatas, kelak akan terjerumus (jatuh) ke dalam **KECELAKAAN dan KEBINASAAN**”.

Wahai kamu murid! Jangan kamu mendatangi seseorang Syeikh lain yang berpura-pura dengan *taslik* (jalan kepada Allah Taala) melainkan dengan izin Syeikh kamu. Apabila Syekh kamu mengizinkan kamu untuk menemui Syeikh itu, barulah boleh menemuinya, serta peliharalah hati kamu dari berpaling tadah. Adapun jika kamu ingin bertemu dengan orang biasa, maka bolehlah kamu bertemu dengannya, meskipun kamu belum mendapat izin daripada Syeikh kamu.

Keterangan:

“Adab seterusnya, hendaklah kamu menjaganya seperti;

- 1. Tidak dibenarkan kamu mendatangi (berjumpa dan duduk) bersama seseorang Syeikh (Guru) yang berpura-pura didalam tarikat (jalan Allah) melainkan atas izin Syeikh (Guru).*
- 2. Peliharalah hati daripada berpaling tadah;*

Sekiranya ingin bertemu dengan orang biasa, maka bolehlah kamu bertemu dengan mereka, meskipun belum mendapat izin daripada Syeikh”.

Meletakkan Kepercayaan Kepada Syeikh (Guru)

Wahai murid! Ketahuilah, bahwasanya Syeikh kamu itu selalu mengambil berat tentang apa yang baik untuk kamu, kerana itu janganlah menuduhnya serta menyangka bahwa dia menyimpan perasaan dengki dan cemburu terhadap diri kamu. Dijauhkan Tuhan akan timbul sesuatu perasaan dari sifat-sifat yang dikeji seumpama itu dari orang-orang yang menyediakan dirinya untuk jalan Allah dan pengikut-pengikutnya yang khusus.

Keterangan:

*“Sambungan dari tajuk ‘Perhubungan Dengan Seorang Syeikh’. Maka sebelum diteruskan penerangan pada tajuk diatas, kesemua perkataan ‘syeikh’ digantikan kepada ‘guru’ untuk memudahkan para murid memahami lebih dekat lagi. Dan istilah ‘sheikh’ itu sememangnya ditunjukkan kepada ‘guru yang memimpin’ semata-mata **Lillahi Taala**.*

Ketahui dan fahamilah dengan yakin bahwa Guru selalu didalam keadaan mengambil berat tentang, apa yang baik, buat diri kamu. Tugas guru amat jelas, iaitu bertanggung jawab dan menjalankan amanah dari Allah dan RasulNya untuk membimbing murid-murid yang datang kepadanya untuk menuju kepada jalan Allah.

Ketahuilah, Guru, dengan dirinya sendiri mengkehendaki juga akan keampunan dan keredhaan dari Allah dan RasulNya dengan cara mengabdikan diri menunjuk jalan kepada sesiapa yang menginginkan dengan jalan sebenar-benarnya. Guru, diibaratkan sebagai ‘ayah’ kepada setiap murid-muridnya, mungkin lebih tinggi lagi, kerana tugas guru adalah memimbing tangan setiap muridnya sampai kepada Allah dan kepada kehidupan yang kekal abadi. Manakala seorang ‘ayah dunia’, akan mengambil berat tentang pelajaran buat kehidupan anaknya didunia yang fana ini.

Bila seseorang Guru mempunyai niat untuk mendapatkan keampunan dan keredhaan Allah buat dirinya dan pengikutnya. Mana mungkin guru itu, menyimpan perasaan dengki dan cemburu terhadap diri murid-muridnya. Tidakkah rusak, niatan siguru itu?

Tidak kira, murid itu miskin ataupun kaya. Guru tidak membezakan diantara murid-muridnya seperti seorang 'ayah dunia' tidak membezakan anak-anaknya. Guru tidak melihat akan harta benda murid-murid, terutama wang ringgit! Bukankah satu tanggung-jawab yang harus dipikul oleh setiap murid-murid melaksanakan segala kemaslahatan buat 'ayah akhirnya' sekiranya diri kamu sememangnya 'anak kepada ayah akhirat'? Bagaimana pula dengan seorang 'anak kepada ayah akhirat' dimana menunggu-menunggu untuk menjalankan tanggung-jawab bagi kemaslahatan buat 'ayah akhirat' kerana asyik mengira-mengira! Begitu juga dengan Allah Taala akan mengira-mengira untuk membagi sesuatu pada murid itu! Hikmahnya adalah supaya si murid melepaskan barang yang sangat dicintai dan diperlukan selain Allah Taala. Itulah maqam yang tinggi! Pahamiilah maksud ini!

Janganlah kamu bersikap biadab menuduh 'ayah akhirat' menyimpan perasaan dengki dan cemburu terhadap diri kamu. Jangan sesekali menjadi anak durhaka! Kalau mendurhaka terhadap 'ayah dunia' sudah dikira berat disisi Allah, bagaimana pula, kalau kamu mendurhakai terhadap 'ayah akhirat'?

'Ya Allah, kami mohon kepadaMu dengan keberkahan RasulMu untuk menghilangkan segala perasaan buruk dan sifat-sifat yang hina dan jadikan kami (murid-murid) yang menyediakan diri untuk jalan kepadaMu sebagai pengikut-pengikut Guru kami yang khusus. Amin Ya Rabbal Alamin'. Dengan itu berazamlah untuk menjadi murid yang khusus".

Awas! Jangan sekali-kali kamu menyuruh dari Syeikh supaya menunjukkan keramatnya, atau supaya ia menyingkap rahasia-rahasia hati kamu, sebab yang ghaib itu, tiada siapa yang mengetahuinya melainkan Allah swt. Kebolehan seorang Wali, paling banyak, Allah Taala menyingkapkan baginya setengah-setengah dari perkara ghaib pada masa-masa yang tertentu saja, dan tidak selalu.

Keterangan:

"Antara kesalahan seseorang yang mencari Guru adalah dengan untuk melihat samada Guru itu mempunyai keramat? Adakah Guru itu berperawatakan dengan pakaian seperti Ulama, mengenakan Sarban yang Besar, Janggut yang panjat, Jubah yang labuh dan mengetahui hasrat hati semasa berjumpa pada kali pertama dan adakah ia terkenal? Tetapi tidak seorang pun mahu tahu darimana ia mengambil ilmunya itu?

Maka jagalah hati dan mulut kamu daripada mempunyai niatan untuk menyuruh Guru menunjukkan keramatnya atau membaca rahasia-rahasia didalam hati kamu! Sesiapa yang mempunyai niatan sebegini, menunjukkan ia tidak ada ilmu dan tidak beradab keatas Gurunya. Kerana segala perkara yang ghaib hanya diketahui oleh Allah swt.

Ayat diatas ada menyebutkan 'menjaga hati dan menjaga mulut'. Tidak lain, adalah jangan tunjukkan nafsu kamu yang kotor dan jangan mudah bertanya (bercakap) sebelum menyelidiki apa yang hendak diutarakan!

Pahamiilah wahai murid, yang dihormati oleh Allah Taala! Untuk mengetahui seseorang itu 'sesuai' untuk dijadikan Guru kamu atau tidak, adalah melalui 3+1 bukan 3 dalam 1, perkara yang pernah dijelaskan iaitu:

- 1. Lihat pada percakapan dan perbuatannya dan rujuk pada AlQuran dan AlHadits.*
- 2. Bagaimana dengan segala kewajipan-kewajipan syariat, adakah dia melaksanakannya?*

3. Adakah kamu merasa sejuk (nyaman, tenteram dan haibah) bila berhadapan dengannya.
4. Bagaimana dengan para Wali-Wali Allah, Ulama-Ulama, Ariffbillah dan mukmin sekalian menerima Guru kamu dalam majlis mereka atau majlis Guru kamu?

Kebolehan seseorang Wali yang diberikan hanyalah sedikit dan Allah mengizinkan mereka menunjukkan sesuatu perkara ghaib pada masa tertentu sahaja, bukan selalu! Ingat bukan selalu? Sekiranya kamu tidak puas dengan penjelasan ini, maka lihatlah perkara-perkara seperti berikut untuk menilai samada Guru kamu seorang Wali (kekasihNya) atau tidak:

1. Bolehkah kamu menatap mata Guru dengan lama?
2. Adakah kamu rasa seperti takut dan gerun bila menatap mata Guru? atau sekecilnya tidak boleh menatap dengan lama?
3. Adakah kamu mempunyai sesuatu rasa bila berhadapan dengan Guru maka akan mengingatkan kamu kepada Allah?
4. Adakah kata-kata Guru yang diucapkan pernah terjadi dengan izin Allah?
5. Adakah doa-doa dari Guru pernah dimakbulkan oleh Allah?
6. Adakah kamu secara semula jadi beradab berhadapan dengannya, tanpa dibuat-buat?
7. Adakah tunjuk ajar dari Guru kamu membuah hasil dari 'alam ghaib'?

Sekiranya kesemua soalan disertakan dengan jawapan 'Ya', maka, alhamdulillah, kamu telah dikurniakan seorang Guru yang mempunyai 'keramat' dari Allah Taala. Sekarang, tanyalah kembali soalan-soalan itu pada diri kamu sendiri. Kenapakah tindakan kamu begitu???

Jawapannya adalah tidak lain, 'hanya sebuah pantulan dari yang Maha Besar'. Yang terpenting atas segala yang penting, Guru wajib melaksanakan dan memahami hukum-hukum syariat!!!"

Barangkali ada murid yang ingin menguji Syeikhnya, lalu ia menyuruh supaya Sheikh itu menyingkap rahasia hatinya. Pada zahirnya mungkin Syeikh itu tidak mahu menyingkap, tetapi berkemungkinan sekali secara batin, Syeikh mengetahui apa yang terkandung dihati murid itu, dan dapat menyingkap segala rahasia hati murid itu, malangnya ia tiada mahu menyatakannya untuk memelihara simurid tadi dan menutup hal-hal dan keadaannya supaya tiada terdedah kepada ramai. Sebab orang-orang **Ahllillah** (orang-orang yang menyediakan dirinya untuk mengabdikan kepada Tuhan) radhiallahu-anhum sangat mengutamakan menutup rahasia-rahasia dirinya, dan sangat jauh berkeinginan untuk menunjukkan keramat dan perkara-perkara yang luarbiasa kepada orang ramai, meski pun mereka berkuasa untuk melakukannya serta diizinkan untuk menzahirkannya.

Keterangan:

"Ada sesetengah murid yang sengaja ingin menguji Gurunya untuk membaca rahasia hatinya. Munculnya niat sebegitu disebabkan dorongan nafsu simurid sendiri. Oleh kerana dorongan yang kuat dari nafsunya maka ia ingin tahu adakah Gurunya mempunyai kebolehan tersebut! Dengan berlandaskan ingin tahu saja, tetapi tidak mahu melihat akan pelaksanaan hukum-hukum syariat yang dikerjakan oleh Guru. Yang penting bagi murid tersebut adalah kebolehan membaca rahasia hatinya! Kasihan pada murid sebegini yang sanggup mengetahui kebolehan Guru dengan mengetepikan Hukum Syariat. Kalau seorang Guru boleh membaca rahasia hatinya, maka dipegang Guru itu walaupun Guru itu tidak mengerjakan kewajipan-kewajipan yang dituntut oleh Hukum Syariat! Kalau didapati Guru itu tidak boleh membaca rahasia hatinya maka ditinggalkan Guru yang mengutamakan kewajipan-kewajipan Hukum Syariat!"

Pada zahir (luaran saja) kelihatan Guru tidak mahu (tidak boleh) menyingkap (membaca atau melihat) tetapi secara batin Guru mengetahui apa yang terkandung didalam hati murid-muridnya. Dan mempunyai kebolehan yang diberikan oleh Allah Taala untuk menyingkap segala rahasia hati muridnya, tetapi ia tidak mahu mengatakannya semata-mata untuk menjaga si murid dan lebih mengutamakan menutup perkara-perkara dan keadaan murid itu diketahui kepada orang lain.

Ini dikeranakan si Guru tidak mahu mengatakan apa-apa yang terkandung didalam hati muridnya samada baik atau buruk. Sekiranya dibukanya akan rahasia hati murid tersebut yang mengandungi perkara yang baik, ditakuti si murid akan merasa bangga diri dan sekiranya buruk, ditakuti si murid tidak boleh terima dan merasa beban yang sangat berat untuk dipikulnya. Disinilah letaknya kemahiran seorang Guru untuk menarik rambut yang terdapat didalam tepung dengan tidak merusakkan keadaan tepung itu! Sayang sekali, murid senantiasa tidak mempunyai kesabaran didalam menjalani latihan-latihan yang diberikan oleh Guru. Nak cepat aje . . . dan tidak mahu memahami peranan dan tanggung-jawab seorang Guru dan tanggung-jawab seorang murid kepada Guru dan kepada Allah Taala!

Wahai murid-murid, Ahlillah iaitu orang-orang yang menyediakan dirinya untuk mengabdikan kepada Tuhan, lebih mengutamakan menutup rahasia-rahasia dirinya dan tidak berkeinginan untuk menunjukkan 'keramat' atau perkara-perkara 'luar biasa' kepada orang ramai. Kerana mereka mempunyai keyakinan yang mantap bahwa yang berkuasa hanya 'Allah Taala' saja. Bukan diri mereka! Kerana mereka sendiri tidak mempunyai kuasa untuk menjatuhkan sehelai daun dari pokok atau mengerakkan sebuah batu, apa lagi perkara-perkara yang lebih besar dari itu! Didalam hati mereka hanya 'aku seorang hamba', itu saja".

Adapun keramat-keramat yang timbul dari para Auliya, hampir kesemuanya berlaku tanpa kehendak diri mereka sendiri. Apabila sesuatu keramat zahir dimata orang ramai, mereka sentiasa mengingatkan orang-orang itu supaya tidak menyiar-sebarkannya kepada orang lain, sehingga mereka meninggalkan dunia ini, yakni wafat.

Keterangan:

"Perkara yang berlaku diluar dugaan manusia yang timbul dari para Auliya (Wali/Kekasih) Allah, kesemuanya berlaku bukan dengan kehendak diri mereka!!! Apabila sesuatu 'keramat' terjadi dimata orang ramai, mereka sendiri tidak mengetahuinya! Setelah diberitahu perkara itu, maka mereka akan menasihatkan orang-orang itu supaya jangan menceritakan perkara yang terjadi kepada orang lain sampai mereka meninggal dunia. Beginilah keadaan mereka yang bersandar pada kekuasaan Allah. Tidak mengaku-gaku dirinya berkuasa! Dan sememangnya mereka tidak berkuasa! Camkan perkara ini!"

Pernah juga sekali-sekala mereka menunjukkan sesuatu keramat pada ramai dengan kehendaknya; iaitu setelah mendapat izin dari Allah Taala, apabila mereka yakin bahwa kepentingan menzahirkan keramat itu adalah lebih utama daripada menyembunyikan.

Keterangan:

"Kadang-kadang perkara 'keramat' ini ditunjukkan pada ramai dengan kehendaknya, setelah mendapat keizinan dari Allah Taala. Kerana mereka 'yakin' dengan menunjukkan 'keramat' adalah lebih utama daripada menyembunyikannya. Perkara sebegini terkandung pada keadaan yang memaksa".

Syeikh (Guru) yang Kamil

Ketahuiilah, wahai kamu murid, bahwa Syeikh yang Kamil itu ia seorang Syeikh yang memberi faedah kepada muridnya dengan penuh hematnya, perbuatannya dan perkataannya. Dia memelihara murid itu dimasa si murid berada dihadapan matanya dan dimasa si murid berada jauh daripadanya. Sekiranya si murid itu berada jauh dari tempat di mana Syeikh berada, maka Syeikh itu akan memelihara murid tersebut menerusi isyarat-isyarat dari kalbunya dalam hal dan urusan apa saja yang dilakukan oleh si murid mahupun yang ditinggalkannya.

Keterangan:

“Guru Kamil adalah seorang Guru yang boleh memberikan faedah (keuntungan/kebaikan/manfaat) kepada muridnya, dengan penuh pengawasan, pandangan, perbuatan dan perkataannya. Sekiranya pengawasan, pandangan, perbuatan dan percakapan Guru memberi bekas dan berkesan dalam lubuk hati muridnya, maka itulah Guru Yang Kamil. Dengan izin Allah, dia memelihara murid dihadapan matanya dan dimasa si murid berada jauh daripadanya.

Bagi murid yang berada jauh dari tempat keberadaan Gurunya, maka Guru itu akan memelihara muridnya melalui isyarat-isyarat (signal) yang di sampaikan dari hati Guru kepada hati muridnya. Tidak kira dalam perkara dan urusan apa sekali pun yang dilakukan oleh murid atau apapun apa yang ditinggalkannya. Si Guru akan memohon pertolongan daripada Allah Taala untuk memelihara murid yang dibebankannya dan dengan limpah kemurahan Allah, disampaikan pesanan, signal ataupun teguran pada murid-murid yang berkenaan supaya melaksanakan ataupun dan menjauhi sesuatu perkara yang dituntut dan dilarang dalam agama. Setiap murid yang mempunyai seorang Guru Yang Kamil pasti sudah merasakan pengamalan sebegini. Bagaimana keadaan seorang murid yang sudah mempunyai perhubungan dengan Gurunya seperti contoh tersebut tetapi memilih untuk memutuskan hubungan dengan Gurunya? Maka kita doakan mereka, memohonkan keampunan buat mereka dan diri kita, supaya kembali ke jalan Allah yang sudah jelas TERANG! Dimana kita tidak mempunyai kuasa sedikitpun dan kepada Allah jua kita serahkan perkara tersebut”.

Adapun perkara yang sangat membahayakan si murid, ia apabila hati Syeikhnya berubah dan tidak lagi memandang kepadanya. Dalam hal ini, jika dikumpulkan sekalian Syeikh-syeikh yang lain dari timur dan barat untuk mengubah hati Syeikh kepada murid itu, niscaya tidak akan berhasil apa-apa pun. Kecuali si murid itu sendiri harus berusaha untuk mengubah hati Syeikhnya dan mendapatkan keredhaannya.

Keterangan:

“Perkara yang boleh terjadi bilamana hati Guru berubah terhadap muridnya dan tidak lagi mahu memandang murid berkenaan. Ini adalah pertanda yang sangat merbahaya buat diri murid itu. Sekiranya Guru berbuat demikian, tidak lain adalah angkara murid itu sendiri yang tidak menghormati lagi akan segala arahan, perintah dan tidak ada lagi adab-adab keatas Gurunya. Yang dimaksudkan adalah niatan murid yang sebenar sudah bertukar gara-gara terpengaruh oleh hawa nafsu, dunia dan mengikuti arahan syaitan. Oleh kerana murid itu sendiri yang memilih kecelakaan dan kebinasaan dari kebahagiaan, maka Guru, setelah berusaha dan bermohon pada Allah Taala, supaya si murid kembali kejalan Allah diserahkan perkara itu kepada Allah Yang Maha Berkuasa untuk bertindak selanjutnya dan Guru tidak mahu lagi membuang masa pada murid yang menyeleweng pada niatannya dan menumpukan kepimpinannya kepada murid-murid lain.

Kejadian yang sering dan banyak terjadi pada berubahnya pandangan Guru atas muridnya kerana murid tidak mempunyai sifat amanah. Murid-murid yang tidak mengambil berat tentang sifat amanah. Murid-murid yang tidak mahu tahu apa itu amanah! Murid-murid yang melupakan bahwa sifat amanah wajib dilaksanakan oleh mereka. Bak pepatah melayu, kerana mulut badan binasa! Jangan salahkan Guru bilamana kamu ditempatkan kedalam api neraka, kerana kamu sendiri yang menzalimi diri sendiri!

Murid yang tidak mempunyai sifat amanah, sering melupakan perkara-perkara yang dijanjikannya terhadap Guru, setelah itu meninggalkan janji-janji yang diikrarkan keatas Gurunya. Dan tidak mahu tahu apa yang dijanjikan oleh lidahnya!!! Sedangkan dia berkuasa melakukannya . . . sebaliknya memilih perkara-perkara yang bersangkutan paut dengan keperluan diri sendiri.

Tidak ada apa-apa tindakan diambil oleh Gurunya kerana Gurunya tidak bersandar pada murid tersebut. Malah sentiasa mendoakan murid itu tetapi menjauhkan batinnya daripada murid itu tersebut kerana sedang mendapat kecelakaan dari tujuh petala langit dan tujuh petala bumi dengan segala makhluk yang berada diantara keduanya!

Untuk mengembalikan perubahan hati Guru, tidak ada jalan lain yang boleh dilakukan melainkan murid berkenaan sendiri memohon mendapatkan keredhaan Gurunya. Dan yang terpenting melaksanakan segala akur janji yang telah dibuat didepan Gurunya, sekiranya perkara ini tidak dapat dipikul oleh murid tersebut dan memohon pertolongan Guru-guru yang ada dimuka bumi ini, niscaya tidak akan berjaya mengubah hati Guru murid tersebut, kerana Guru-guru seluruh dunia juga mengetahui bahawa diri murid itulah punca kebiadapan diatas janji-janji yang dimungkirinya . . .”

Mencari Syeikh (Guru) Yang Tulen

Ketahuilah, bahwasanya seorang murid yang ingin mencari seorang Syeikh untuk belajar ilmu agama dan menyerahkan diri kepadanya, tidak boleh menghukum sebarang orang yang diakui sebagai Syeikh yang boleh memimpin murid-murid ke jalan Allah, menjadi Syeikhnya sehingga ia menyelidikinya terlebih dahulu, dan ia kenal benar-benar keahlian Syeikh itu dan hatinya menerima orang itu sebagai Syeikhnya.

Keterangan:

“Jangan sebarangan mengambil seseorang sebagai Guru sebelum diselidiki dahulu dan kenal benar-benar keahlian yang ada pada Guru itu dan lihatlah samada hatinya boleh terima dia sebagai Gurunya. Jangan pandang pada perwatakan sebaliknya lihat pada gerak gerinya”.

Demikian pula sebaliknya, seorang Syeikh itu boleh menerima sebarang murid yang datang kepadanya minta ditunjukkan ke jalan Allah, sebelum ia menguji kebenaran si murid untuk ditunjuk jalan, dan keinginannya yang sungguh-sungguh untuk mendapatkan seorang pemimpin yang akan menunjukkannya ke jalan Tuhannya. Syarat-syarat ini harus berlaku ke atas murid-murid yang belajar menerusi Syeikh Tahkim (Syeikh yang dalam tangannya terserah segala keputusan).

Keterangan:

“Begitu juga dengan Guru, tidak boleh menerima sebarang murid sebelum menguji kebenaran murid itu dan juga mengetahui keinginan sebenar pada diri bakal murid itu.

Syarat-syarat ini harus dipatuhi sekiranya murid itu bertujuan belajar kepada Guru Tahkim (Guru yang didalam tangan terserah keputusan dan mempunyai ijazah).

Murid-murid yang belajar kepada *Syeikh Tahkim* ini harus menganggap dirinya sebagai mayat yang sedang dibersihkan oleh tangan-tangan yang memandikannya, ataupun sebagai seorang bayi yang berada dalam pemeliharaan ibunya. Syarat-syarat serupa ini tidak berlaku kepada *Syeikh Tabarruk* (Syeikh yang biasa dipohon keberkatan daripadanya). Apabila seorang murid bermaksud untuk mendapat keberkatan seorang Syeikh, bukan tahkimnya, maka seberapa banyak ia dapat menemui berbagai-bagai Syeikh dan menziarahi mereka adalah lebih baik dan utama untuk memperolehi keberkatan itu.

Keterangan:

“Sesiapa yang sudah mempunyai Guru Tahkim, hendaklah menyerahkan dirinya seolah-olah seperti mayat yang sedang dibersihkan oleh tangan-tangan yang membersihkannya, tetapi malangnya tidak ramai, mungkin sukar hendak mendapati murid yang sanggup menjadikan dirinya sebagai mayat. Kerana pada zaman sekarang tidak ada lagi murid seperti itu. Mereka tidak mempunyai keyakinan seperti para salik terdahulu yang mengikut jejak langkah para sahabat-sahabat Rasulullah saw dan jejak langkah para ahli thariqah dan ahli tasauuf. Punca kelemahan dan keyakinan adalah bersumber daripada tidak ada keyakinan pada para ahli thariqah, ahli tasauuf dan para sahabat Rasulullah saw, terdahulu. Hilangkan segala was-was kamu yang sememangnya datang dari Syaitan. Serahkan jiwa dan raga kamu kepada Guru Tahkim itu, kerana ia tidak akan membiarkan kamu sesat sesudah mendapat cahaya ilahi.

Apabila seseorang murid bermaksud untuk mendapat keberkatan daripada Guru Tabarruk iaitu para Habaib dan Alim Ulama, tidaklah dilarang untuk berjumpa dan menziarahi mereka seberapa banyak, kerana perbuatan itu sangat dianjurkan dalam Islam dan sebaiknya mendapatkan restu daripada Guru Tahkimnya”.

Apabila seorang murid tidak mendapat seorang Syeikh, maka hendaklah ia meneruskan usahanya mencari Syeikh itu dengan tekun dan rajin, menunjukkan harapan dan keperluannya kepada Allah swt dengan kebenaran yang sempurna, supaya Dia menunjukkannya kepada seorang Mursyid atau pemimpin yang boleh memimpinnya ke jalan Allah. Jika ia benar dalam cita-citanya, pasti Allah akan mengabulkan permohonannya, sebagaimana Allah mengabulkan permohonan orang yang terdesak (dipaksa oleh keadaan), dan niscaya Allah akan memimpinnya dan membawanya kepada salah seorang antara hamba-hambanya.

Keterangan:

“Sekiranya seseorang tidak mendapati seorang Guru, maka hendaknya meneruskan usaha dan ikhtiarnya mencari Guru dengan tekun dan rajin tanpa putus asa, menunjukkan segala harapan dan keperluannya kepada Allah swt dengan kebenaran yang sempurna supaya diperkenankanNya menunjukkan seorang Mursyid atau pemimpin yang diizinkanNya sebagai petunjuk kepada jalan Allah bagi dirinya. Sekiranya murid sedemikian benar didalam pencariannya, bukan pada sesuatu selain daripada Allah, pasti Allah akan mengabulkan permohonannya. Yakinlah, niscaya Allah akan memimpinnya dan membawanya kepada salah seorang hamba-hambanya”.

Setengah-setengah murid pula menyangka dirinya tiada mempunyai Syeikh, maka sepanjang masa ia meneruskan usahanya mencari seorang Syeikh, padahal Tuhan telah mentakdirkan seorang Syeikh untuknya, sedang ia tidak pernah melihat Syeikh itu. Syeikh tersebut

memelihara murid itu dengan pandangan batinnya, dan menjaganya dengan sepenuh perhatian, sedang si murid tidak merasakan semua itu sama sekali.

Keterangan:

“Ada juga setengah-setengah murid tidak menyangka (tidak sadar) dirinya sudah mempunyai seorang Guru, maka ia terus dalam usahanya mencari seorang Guru, padahal Allah Taala sudah mentakdirkan seorang Guru untuknya, sedangkan ia tidak menyangka sama sekali bahwa didepannya adalah seorang Guru untuk memimpinya ke akhirat. Kerana Guru itu sudah lebih dahulu memelihara bakal murid itu dengan pandangan batinnya, menjaga dengan penuh perhatian sedangkan si murid tidak merasakan semua perkara itu sama sekali”.

Jika ada murid yang mengatakan tidak ada Syeikh pada zamannya, sebenarnya ia tidak berlaku insaf, ataupun mungkin tujuan dan niatnya untuk mencari seorang Syeikh itu tidak benar. Kalau tidak pada hakikatnya Syeikh-syeikh yang *Muhaqqiq* itu memang banyak sekali. Maha Suci Allah yang tiada mendedahkan bukti kepada para AuliaNya, melainkan seperti Dia menjadikan bukti untuk mengenal ZatNya, dan Dia tiada akan menunjukkan seseorang murid kepada para AuliyaNya, melainkan sesiapa yang Dia suka menyampaikannya kepada ZatNya sendiri.

Keterangan:

“Jika ada seseorang yang mengatakan tidak ada Guru pada zaman sekarang, maka hendaklah dia berlaku benar dan bertaubat. Ketahuilah dan Yakinkanlah bahwa Allah Taala sentiasa menyediakan Guru-guru untuk memimpin hamba-hambaNya menuju kepadaNya hingga hari Qiyamat. Sebenarnya tujuan dan niatan yang tidak betul dari murid untuk mencari seorang Guru, maka Allah Taala menutup pencariannya. Pada hakikatnya Guru-guru Muhaqqiq (guru-guru yang teguh dan tetap keyakinan pada keEsaan dan keAgungan Allah Taala) sememang banyak sekali, disediakan bagi orang-orang yang siddiq (benar).

Maha Suci Allah Taala, yang pada hakikatnya tidak memberi petunjuk untuk menuju kepada AuliaNya, WaliNya, KekasihNya dan WakilNya melainkan Allah sendirilah yang memberi petunjuk untuk mengenal ZatNya, dan Allah tidak akan menunjukkan pada seseorang murid kepada para AuliyaNya, WaliNya, KekasihNya dan WakilNya melainkan kepada sesiapa yang Allah redha untuk menyampaikannya kepada ZatNya sendiri”.

Penutup Bicara

Sebagai penutup bicara dalam masalah ini, maka wahai murid yang budiman! Jika kamu mengingini sesuatu dari Syeikh kamu, ataupun ada sesuatu masalah yang kamu ingin bertanya kepada Syeikh kamu, maka jangan ada sesuatu sebab yang boleh menahan kamu dari bertanya kepadanya, umpayanya takut kepada kehebatan Syeikh itu, ataupun takut disangka berlaku kurang sopan kepadanya. Malah hendaklah kamu bertanya kepadanya, jika tidak puas sekali, Tanya lagi kedua kalinya, jika tidak puas juga tanya kali ketiga, sebab bukanlah menahan diri dari bertanya atau memohon sesuatu itu terkira adab yang baik, kecuali Syeikh itu sendiri yang menyuruh kamu berdiam diri, dan memerintahkan kamu supaya menurut perintahnya, maka ketika itu hendaklah kamu menurut perintahnya.

Keterangan:

“Kepada setiap murid yang budiman dan dihormati oleh Allah Taala. Jika kamu ada sesuatu masalah atau pertanyaan yang ingin kamu sampaikan, janganlah kamu menahan dari berbuat demikian. Jangan kedepankan sesuatu sebab-sebab (alasan) hingga kamu tertahan untuk

menanya sesuatu masalah atau bertanya kerana takut akan kehebatan Guru atau takut disangka tidak ada adab kepadanya. Dianjurkan untuk kamu bertanya kepadanya untuk menghilangkan sesuatu masalah atau pertanyaan supaya kamu berada didalam ketenangan dan sentiasa didalam keyakinan. Bertanyalah sehingga puas hati kamu tetapi berhentilah bila Guru kamu menyuruh kamu berdiam diri. Sekiranya Guru kamu memerintahkan kamu supaya menurut perintahnya, maka ketika itu juga (serta-merta) hendaklah kamu menurut perintahnya. Tidak kah kamu ingat akan firman Allah Taala: “Barangsiapa taat pada Allah hendaklah taat pada Rasul, barangsiapa taat pada Rasul hendaklah taat pada Alim Ulama, barangsiapa taat pada Alim Ulama hendaklah taat pada Guru”. Ketahuilah wahai murid yang dihormati, kesetiaan (taat) kamu kepada Guru adalah kesetiaan (taat) pada Allah dan RasulNya, Muhammad saw, kerana Guru kamu adalah pewaris NabiNya”.

Sekiranya Syeikh itu melarang kamu dari sesuatu perkara ataupun mengutamakan seorang lain lebih dari diri kamu, maka ingatlah, jangan sekali-kali kamu menuduhnya berat sebelah. Malah hendaklah kamu menyangka baik terhadapnya, dan meyakini diri kamu bahwa Syeikh tersebut tidak membuat begitu, melainkan ada faedah dan baiknya untuk diri kamu. Jika kamu telah melakukan sesuatu dosa, dan kerananya Syeikh kamu telah merasa marah terhadap kamu, maka hendaklah kamu memohon maaf kepada Syeikh itu setelah bertaubat kepada Allah dari dosa itu, sehingga Syeikh redha kepada kamu.

Keterangan:

“Sekiranya Guru kamu melarang kamu daripada meneruskan sesuatu perkara, samada perbuatan, percakapan ataupun amalan, hendaklah kamu menurut perintahnya dengan segera. Ingat, Guru kamu tidak akan memerintahkan sesuatu yang akan mencelakakan muridnya. Pahami perkara ini.

Jangan sekali-kali kamu menuduh Guru kamu berat sebelah sekiranya kamu dapati Guru kamu mengutamakan murid lain, lebih dari diri kamu. Kerana perkara sebegini banyak berlaku kepada murid-murid yang tidak memahami sesuatu perbuatan samada zahir atau batin yang dikhidmatkan (diberi) kepada Gurunya, tidak lain adalah untuk mendapat keredhaan Allah dan RasulNya melalui Gurunya itu. Sekiranya perkara ini terjadi pada kamu, hendaklah kamu selidiki diri kamu sendiri sebelum kamu menuduh Guru kamu berat sebelah. Seorang Guru sejati tidak akan membezakan murid-muridnya tetapi sentiasa mendoakan dan menunggu muridnya yang mendapat kesedaran daripada Allah Taala. Maka selidiki diri kamu dahulu, jangan cepat-cepat menunjukkan masam muka! Ketahuilah, oleh kerana sangat cepatnya masam muka ditunjukkan, bagaimana Guru nak memberi perhatiannya? Kerana diri kamu sendiri melayani hawa nafsu dan syaitan itu! Bukan melayani (berkhidmat) pada Guru kamu, bagaimana boleh mendapat keampunan dan keredhaan daripada Allah dan RasulNya?

Hendaklah kamu menyangka baik terhadap perbuatan Guru dan meyakinkan diri bahwa Guru tidak akan buat perkara sebegitu, melainkan, mesti ada sesuatu sebab dan faedah yang baik untuk disampaikan menerusi murid yang diutamakan.

Mari kita lihat perbuatan Guru yang mengutamakan murid yang siddiq (benar dan amanah). Oleh kerana murid yang diutamakan itu secara hakikatnya menyerahkan jiwa dan raganya seperti mayat kepada Gurunya dan berlaku benar dan amanah didalam segala perjanjian antara diri dan Gurunya. Benar dan amanah didalam menjalankan kewajipan-kewajipan yang difardhukan ke atas dirinya. Mengerjakan segala perintah terutamanya wirid-wirid yang diijazahkan dan segala amalan-amalan lainnya. Maka dengan itu adalah menjadi tanggungjawab Guru untuk membawa murid yang diutamakan ke tingkatan selanjutnya. Hendaklah

kamu mempunyai azam dan semangat seperti murid yang diutamakan sekiranya menginginkan bimbingan seterusnya dari Guru.

Jika seseorang murid ada melakukan sesuatu dosa dan Guru kamu merasa marah terhadap kamu, hendaklah kamu memohon maaf serta merta kepada Guru kamu dengan tidak menunggu pada hari perjumpaan dengannya sekiranya kamu sememangnya seorang murid yang bersandar kepada Allah dan RasulNya. Sekiranya perbuatan sebegini sanggup kamu lakukan, itu adalah bukti akan siddiq kamu didalam menempuh perjalanan Allah. Janganlah menunggu pada masa yang kamu rasa sesuai untuk memohon maaf atau kebiasaan murid yang tidak benar adalah menunggu pada Hari Raya!

Hendaknya kamu bertaubat kepada Allah dari dosa kamu itu sebelum kamu berjumpa dengan Guru kamu, dan mohonlah maaf sehingga Guru kamu redha keatas kamu. Tetapi kebanyakan murid-murid dengan terang menunjukkan kedegilan mereka dimana tidak mahu memohon maaf kepada Guru mereka kerana pada kiraan mereka tidak melakukan dosa! Adakah kamu ingin mengatakan bahwa diri kamu terlepas daripada membuat dosa seharian? Kalau kamu rasa kamu bebas daripada melakukan dosa seharian, Alhamdulillah. Baguslah begitu. Teruskan.

Kebanyakan murid-murid tidak mahu melazimkan diri mereka untuk memohon maaf kepada Guru dan asyik nak tunggu Hari Raya aje . . . Dalam benak fikirannya asyik melayani dunia dan keluarga juga mengikuti arahan tubuh badannya . . . masih belum faham-faham lagi. Bila bersalaman dengan Guru, tidak ada yang menyatakan ‘mohon keampunan’, kerana apa? Sifat angkuh dan sombong. Murid mengira tidak mempunyai dosa untuk memohon keampunan pada gurunya. Para sahabat-sahabat Rasulullah saw dan para ahli thariqah dan ahli tasauf sentiasa memohon keampunan bila bersama dengan Rasulullah saw. Mereka tidak menunggu untuk memohon keampunan pada hari-hari tertentu, kerana mereka sentiasa menganggap diri mereka mempunyai dosa dan tidak mahu menunggu kerana mereka semuanya yakin bahwa malaikat maut tidak akan menunggu bila tidak saatnya. Begitu juga dengan para ahli tariqah dan ahli tasauf, sentiasa memohon keampunan kepada Guru-guru mereka dengan tidak menunggu hari yang tertentu. Pahamiilah”.

Jika kamu merasa bahwa hati Syeikh agak telah berubah terhadap diri kamu, maka yang demikian itu samalah seperti kamu hilang kegembiraan yang biasa kamu rasakannya dari Syeikh, atau seumpamanya. Maka hendaklah kamu jelaskan kepada Syeikh kamu itu kebimbangan kamu dari perbuatan hatinya kepada kamu. Kemungkinan sekali hatinya berubah disebabkan kamu telah melakukan sesuatu dosa, maka hendaklah kamu segera bertaubat daripada dosa itu. Ataupun mungkin kamu menyangka sesuatu hal yang tidak baik terhadap Syeikh kamu, padahal ia bersih dari tuduhan itu, dan Syaitan telah melemparkan tuduhan itu di hati kamu supaya berlaku perselisihan-faham antara kamu dan Syeikh itu. Setelah mengetahui bahwa Syeikh kamu itu redha terhadap kamu, niscaya hati kamu akan kembali tenang semula. Sebaliknya, jika kamu tidak menjelaskan kebimbangan hati kamu kepada Syeikh tersebut, meskipun hati kamu yakin bahwa kamu tiada menaruh sebarang niat tidak baik terhadap Syeikh itu, namun kamu masih tetap gelisah dan tidak tenteram.

Keterangan:

“Jangan kamu hilangkan kegembiraan yang biasa kamu rasakan samada berdepan atau berjauhan dengan Guru atau seumpamanya. Kerana itu adalah petanda yang tidak baik! Kemungkinan besar hati Guru berubah disebabkan kamu telah melakukan sesuatu dosa, maka hendaklah kamu bertaubat daripada dosa tersebut. Atau mungkin kamu mudah menyangka

sesuatu perkara buruk dan tidak baik terhadap Guru kamu, padahal Guru kamu bersih daripada tuduhan itu. Perkara sebegini banyak terjadi pada murid-murid kerana syaitan telah melemparkan tuduhan itu kedalam hati supaya terjadinya perselisihan faham antara murid dan Guru. Bukankah menyangka baik terhadap Guru itu dianjurkan dalam Islam???

Ketahuilah, hanya dengan keredhaan dari Guru akan mengembalikan ketenangan dan kegembiraan itu semula. Sekiranya kamu masih berdegil tidak mahu menjelaskan kebimbangan hati kepada Guru, walaupun hati berasa yakin bahwa kamu tidak menaruh sebarang niat yang tidak baik terhadap Guru, tetapi kamu masih juga tetap didalam kegelisahan dan tidak tenteram, menunjukkan keredhaan belum lagi diberikan oleh Guru kamu! Kerana rohani kamu busuk!”

Jika kamu melihat seorang murid yang menyimpan penuh Ta'zhim dan Penghormatan terhadap Syeikhnya, senantiasa mengagungkannya, meng'itkad kepadanya secara zahir dan batin, bersedia untuk mematuhi segala perintahnya, mencontohi kelakuan dan akhlaknya, maka itulah tandanya si murid ini sedang mewarisi rahasia-rahasia dari Syeikhnya, ataupun sebahagian daripada rahasia-rahasia itu, kiranya ia terus hidup sesudah wafatnya Syeikh itu.

Keterangan:

“Sekiranya kamu melihat seseorang murid memberikan penghormatan yang penuh takzim terhadap Gurunya, senantiasa mengagungkannya, meng'itkad kepadanya secara zahir dan batin, sentiasa bersedia mematuhi segala perintah dan taat melakukannya, mencontohi kelakuan dan akhlaknya, maka itu adalah tanda si murid itu sedang di mewarisi rahasia-rahasia dari Gurunya, ataupun sebahagian daripada rahasia-rahasia itu, sekiranya si murid itu masih hidup sesudah wafatnya Guru itu. Janganlah kamu sesekali merasa cemburu, hendakny kamu juga melakukan perkara sedemikian”.

Sifat Seorang Murid

Berikut, akan disebutkan beberapa sifat yang **HARUS** disifati oleh seorang murid yang benar. Bila mana sifat-sifat yang akan diterangkan dan dapat diamalkan bagi sesiapa yang mengaku sebagai murid, maka benarlah ia sebagai murid disisi Allah Taala.

Berkata setengah Arif-Billah, moga-moga Allah Taala redha kepada mereka dan memberi manfaat dari ilmu-ilmunya kepada kita sekalian, amin:

Keterangan:

“Alhamdulillah, segala puji dan syukur dipanjatkan kepada Allah Taala dan RasulNya, Muhammad bin Abdullah saw, shalawat dan salam keatasnya, keluarganya dan para sahabatnya. Dengan keMurahan dan keIzinan dariNya, maka sampailah pada penghujung kitab “Risalatul Murid – Petunjuk Jalan Thariqat” oleh Imam Habib Abdullah bin Alwi AlHaddad yang penuh dengan nasihat dan panduan bagi murid-murid yang bekeinginan yang hakiki untuk menuju ke jalan Allah.

Selanjutnya akan dibentangkan beberapa sifat yang harus (ada) oleh murid yang mengaku akan kebenaran inginannya didalam hati untuk menuju kepada Allah Taala.

Maka telah berkata arifbillah, semoga Allah Taala redha kepada mereka dan memberi manfaat dari ilmu-ilmunya kepada kita sekalian untuk diamalkan, Amin.

Seterusnya adalah panduan-panduan dan garisan bagi setiap murid yang belajar ilmu thariqat (ilmu menuju ke jalan Allah), sebagai pedoman hidup seharian hingga dapat bertemu denganNya. Semoga Allah Taala memberi kita kekuatanNya dan pertolonganNya dengan keberkahan RasulNya yang dicintai supaya dapat mencapaikan hajat-hajat bagi setiap murid, sampai kepadaNya. Amin, Ya Rabbal Alamin . . .

Tidak dikira sebagai murid (tidak diterima sebagai murid thariqat), sehingga panduan dan garisan selanjutnya di ketahui dan di amalkannya seharian dalam kehidupannya”

Seorang murid yang menuntut ilmu thariqat (ilmu menuju ke jalan Allah), tidak akan dikira *murid*, melainkan setelah ia mendalami isi Al-Quran dan memperoleh segala yang diperlukannya dari Al-Quran. Dia harus mengenal kekurangan dirinya dari kesempurnaannya, sentiasa memajukan segala hajat dan keperluannya kepada Tuhan bukan kepada hamba-hamba Tuhan, tidak ada beza padanya antara emas dan debu dijalan.

Keterangan:

1. ***“Mendalami isi Al-Quran dan Segala yang di Perlukannya sebagai Pendoman Hidup: Caranya: Hendaknya sentiasa membaca Al-Quran dan memahami maksudnya dan mengikuti akan segala perintah dan larangannya. Sentiasa bersama dengan Gurunya untuk mendengarkan Al-Quran dan penjelasan darinya. Jadikan ini sebagai sebahagian dari hidupmu.***
2. ***Harus Mengenal Pasti keKurangan Diri dan menGambil Langkah untuk memperBaikinya: Caranya: Jangan melihat akan kesempurnaan diri, kerana akan mengakibatkan diri terjerumus ke dalam api neraka. Sebagai contoh; Merasa puas bilamana dapat mendirikan sholat, merasa puas dapat membaca zikir, merasa puas dapat membaca tahlil, membaca yasin, membaca ratib, merasa puas dapat menghadiri kelas agama dan sebagainya. Yang sebaiknya, lihatlah akan kekurangan dalam mengabdikan diri kepada Tuhan, maka dengan itu kamu akan disibukkan oleh Allah Taala untuk sentiasa berhadapan denganNya. Kamu tidak akan dapat rasa kepuasan kerana asyik dengan mengabdikan diri (sibuk) padaNya kerana tidak melihat pada kesempurnaan apa yang telah kamu dah buat! Sebaliknya, sekiranya kamu melihat akan kesempurnaan yang telah kamu lakukan akan mengakibatkan diri kamu berhenti daripada melakukan ibadah lain. Perkara sebegini insyallah, boleh dicapai, hari demi hari, untuk mendatangkan rasa ketidakpuasan mengabdikan diri kepada Al-Haq! Begitulah pada hakikat sebenar bagi seorang hamba seperti firmanNya: “Aku jadikan manusia dan jin hanya untuk mengabdikan diri kepadaKU”. Maka terlaksanalah apa yang diperintahkan oleh, Allah Rabbul Alamin!***
3. ***Hendaknya kamu meMohon hanya kepada Allah Taala, Bukan kepada Hamba-hamba Tuhan: Caranya: Jangan durhaka kepada Tuhan kamu dengan memohon selain daripadaNya! Jangan buat Allah, murka kepada kamu! Jangan jadikan diri kamu berada didalam syirik! Dimana kamu majukan permohonan (hajat) selain daripadaNya. Hanya Allah sahaja yang berKuasa dalam Memberi atau Menahan. Kuatkan Tauhidmu, yakinkan bahwa Yang Memberi adalah Allah dan Yang Menahan adalah Allah! Kerana segala KeputusanNya samada diBeri atau diTahan mempunyai Hikmahnya (ada kebaikan-kebaikan yang tidak dapat kamu mengetahuinya) kerana Allah sangat Penyayang kepada makhlukNya. Adalah perkara mustahil bagi sifatNya yang tidak Memberi atau berat sebelah! Tidak pernah Allah Taala, tidak***

menyampaikan hajat-hajat hamba-hambaNya, baik yang beriman atau yang kufur! Maha Suci Allah Taala daripada Segala Sifat Yang Tidak SepatutNya. Oleh kerana Allah Taala Maha Pengasih, maka Dia mengetahui apa yang baik buat diri kamu. Samada diberi atau ditahan. Bila datang sesuatu nikmat samada dari makhlukNya hendaklah kamu yakinkan dalam diri bahwa nikmat tersebut hakikatnya (sebenarnya) datang dariNya. Bukan hamba-hambaNya! Kerana setiap hamba tidak mempunyai kuasa!

4. **Tidak ada Beza antara Emas dan Debu Jalan:** Caranya: Genggamlah tangan kamu sekarang! Jangan baca aje, gengam tangan mu! Dan sekarang bukalah! Apakah yang ada didalamnya??? KOSONG!!! Bukan?. Jadi, apa kena mengena dengan genggam tangan dengan 'tidak ada beza antara emas dan debu jalan'? Ketahuilah 'genggam tangan' adalah sebagai lambang kepada 'pengakuan kekuasaan'. Adakah kamu memiliki sesuatu yang berpunca dari usaha dalam mengumpul harta dunia! MANA DIA? Lihatlah pada datuk nenek moyang kamu, dimana harta yang mereka kumpulkan itu? Kenapa tidak dibawa bersama? Kalau ada, boleh juga masukkan kedai pajak gada di Alam Kubur! Ringanlah sikit! Lihatlah pada setiap bayi yang dilahirkan ke dunia, apa yang bayi itu bawa? TIDAK ADA APA-APA! bukan! Jadi mengapakah kamu masih mahu menyusahkan diri, bekerja keras sampai tidak ada masa menghadap Tuhanmu? Mengapa kamu masih mahu mengumpul harta dunia yang tidak ada manfaatnya buat diri kamu!!! Apa sahaja yang dikumpulkan (segala sesuatu itu) dimana pada sangkaan kamu yang mengusahakannya tetapi pada hakikatnya adalah pemberian dari Allah Taala kepada kamu. Sebagai keperluan yang diperlukan oleh kamu! Sebab Allah Maha Menyampaikan Keperluan hamba-hambaNya! Allah Maha Pengasih dan Penyayang! Apa saja yang kamu sangka baik yang berupa harta, wang ringgit (baik ditangan atau dibank), rumah (tidak kira rumah besar, rumah kecil, ataupun rumah sewa), kenderaan (besar atau kecil, sewa atau beli), isteri (cantik atau tidak, beriman atau tidak), anak-anak (taat atau tidak), adik beradik (hormat menghormati atau tidak) dan kaum kerabat (yang menyambungkan siratulrahim atau tidak) semuanya diatur dan diberikan oleh Allah Taala sebagai pinjaman (keperluan) buat kamu! Untuk kesedaran diri dan untuk kembali padaNya. Itulah hakikat kebenaran! Untuk mencapai tingkatan sebegini adalah dengan memfanakan (menghilangkan) apa saja yang kamu 'mengaku berkuasa dan memilikinya!'. Hendaknya kamu menghormati segala pemberianNya atas keperluan kamu dengan tidak menahannya. Jangan kedekut!!! Sekiranya barang yang kamu miliki itu kepunyaan kamu, bolehlah kamu kedekut! Jadi jangan kedekut! Tetapi jangan kedekut tak tentu pasal pulak! Nak kata faham tapi buat perkara bodoh!. Pokoknya segala sesuatu bukan kamu yang punya, hatta diri kamu sendiri pun bukan kamu yang punya! Untuk membuktikan diri kamu bukan kamu yang punya adalah seperti berikut: Sekiranya Malaikat Maut datang untuk mengambil nyawa kamu, katakan padanya tidak boleh, kerana kamu yang memiliki diri kamu! Itulah bukti yang terkukuh! Sekiranya tidak timbul sesuatu perasaan yang menahan kamu dari memberi apa yang ditangan, maka kamu sudah memahami maksud, 'tidak ada bezanya Emas dan Debu jalan'.

Seorang murid harus sentiasa memelihara batasan-batasan Allah Taala dan janji-janjiNya, selalu bersedia menelan pahit-getirnya qadha' (keputusan) Tuhan, sentiasa memuji Tuhan di waktu mewah dan sempit, dan setiap masa mengikhhlaskan dirinya kepada Tuhan, zahir dan batin.

Keterangan:

5. **“Memelihara Batas-batas Allah Taala dan Janji-janjiNya:** *Caranya: Setiap murid harus sentiasa memelihara batas-batas Allah Taala yang telah digariskan didalam Al-Quran. Melaksanakan segala perintahNya dan menjauhi segala laranganNya. Memelihara semua Haq Allah Taala dan mengerjakan HaqNya dan memelihara (berpegang dengan kuat) segala janji-janjiNya supaya kamu tidak berputus asa terhadapNya. Sentiasa melihat akan janjiNya bila didalam musibah atau kesenangan. Bilamana dapat memelihara batas-batas tersebut maka kamu sentiasa didalam lindungan dan rahmatNya.*

6. **Menerima Segala kePutusanNya:** *Caranya: Sentiasa bersedia dapat menelan segala pahit getirnya qadha' Allah Taala didalam menjalani kehidupan yang sementara ini. Sebagai manusia biasa, agak sukar untuk menerima pahit maung dalam ketentuan Allah Taala yang mentakdirkan, bilamana apa yang dihajati tidak tercapai. Kerana sememangnya sikap manusia hanya menginginkan yang sedap-sedap dan senang-senang aje. Bila seseorang yang bersandar pada TuhanNya, apa saja yang diberikan oleh TuhanNya akan diterimanya kerana dia mengetahui bahwa Tuhannya tidak akan membiarkan dirinya didalam kesusahan. Seperti seorang hamba yang melayani Tuannya. Maka jadilah diri kamu seperti seorang hamba yang menyerahkan jiwa dan raga kepada yang Memiliki Diri kamu. Berkhidmat dan terima, apa yang diberikan. Sekiranya kamu dapat mengetepikan keinginan kamu dan menerima keinginan Tuhan yang memiliki diri kamu, pasti kamu akan dapat melihat akan kemanisan didalam pemberianNya itu.*

7. **MemujiNya diWaktu Senang dan Susah:** *Caranya: Setiap murid harus membiasakan diri dalam memuji Tuhannya dalam waktu senang ataupun susah. Hanya murid yang menyedari bahwa dirinya mempunyai Tuhan sahaja yang dapat memujiNya kerana senantiasa merasa bahwa penghidupannya didunia ini diuruskan oleh Tuhannya. Maka dengan cara begini dia akan terbiasa memuji Tuhan yang memiliki dan mengatur dirinya pada setiap waktu samada senang ataupun susah. Perkara ini tidak akan dapat dilakukan pada murid yang tidak mempunyai Tuhan! Bila seorang murid yang tidak tahu memuji Tuhannya, pada waktu senang ataupun susah, itu adalah bukti terang, bahwa dia tidak mempunyai Tuhan untuk berterima-kasih diatas segala pemberian dan tidak perlu mengaku dihadapanNya tentang kehidupannya didunia ini diuruskan oleh Tuhan. Bilamana tidak ada rasa mempunyai Tuhan macam mana dia hendak berterima-kasih? Periksa diri kamu, seberapa banyak yang kamu ingat untuk berterima-kasih kepadaNya? Adakah kamu ingat bahwa kamu mempunyai Tuhan yang menguruskan kehidupan di dunia yang fana ini? Kalau ada, apa buktinya? Kalau ada, jangan buktikan pada orang lain, buktikanlah pada Tuhanmu! Jadilah hambaNya yang senantiasa bersyukur didalam pahit dan maung dalam kehidupan yang sementara ini.*

8. **Mengikhlaskan Diri Zahir dan Batin:** *Caranya: Sentiasa berkeadaan ikhlas, zahir dan batin setiap masa. Apa itu ikhlas? Bagaimana cara untuk sentiasa berkeadaan ikhlas? Ikhlas adalah tidak meminta sesuatu imbalan (upah) di atas perkara yang kamu lakukan ataupun mempunyai sesuatu hajat keperluan peribadi. Cara untuk berkeadaan ikhlas adalah bilamana kamu tergerak untuk melakukan sesuatu ibadah ataupun perbuatan bukan dari dorongan orang lain, semata-mata untuk Allah. Sebagai contoh; seseorang yang tidak pernah sholat atau jarang sekali sholat akan mengerjakan sholat dihadapan gurunya atau temannya atau orang ramai kerana di takuti di cop sebagai*

orang yang tidak sholat atau manusia yang lalai mengerjakan sholat. Itu tanda tidak ada ikhlas pada sesuatu yang diperbuatnya!”.

Seorang murid tidak harus diperhambakan oleh selain dari Allah Taala, tidak harus ditundukkan oleh pangkat dan kedudukan, tidak harus dipengaruhi oleh tuntutan syahwat dan hawanafsu, dan tidak harus dikongkong oleh adat dan kebiasaan. Pertuturannya merupakan zikir dan mutiara hikmat, diam-dirinya merupakan tafakkur dan tauladan, perbuatannya mendahului percakapannya, ilmunya membenarkan amalannya, syiarnya khusyuk dan ketenteraman jiwa, pakaiannya tawadhu’ dan merendah diri, berpihak kepada yang benar dan mengutamakan yang benar dan menolak yang batil serta membencinya, bergaul dengan orang-orang baik serta melindungi mereka, dan membenci orang-orang jahat serta memusuhi mereka, batinnya lebih baik dari lahirnya, pergaulannya lebih manis dari sebutannya, suka menolong orang, ringan kaki tangan, jauh daripada sifat degil, bodoh, orang kepercayaan lagi dipercayai, bukan pemaki atau pelaknat, tiada mengabaikan kewajibannya, tiada menggengam apa-apa yang ada didadanya bersih dari segala rupa jahat, hematnya tinggi terhadap segala amal yang boleh mendekatkannya kepada Tuhan, nafsunya menolak semua pekerjaan yang hina, tidak selalu tergelincir kedalam salah, tidak melakukan sesuatu pekerjaan kerana menuruti hawa nafsu, teman kepada sifat menepati janji dan kepahlawanan, rakan kepada sifat pemalu dan penjaga marwah, bertimbang-rasa terhadap semua manusia dan tidak marah jika manusia tidak bertimbang-rasa kepadanya, jika menerima pemberian ia bersyukur dan jika ditahan pemberian ia bersabar, jika ia menganiayai diri segera bertaubat dan beristighfar, dan jika ia dianiaya segera ia memaafkan dan mengampunkan, suka duduk bersendirian dan berjauhan dari manusia, tidak ingin mempamerkan diri atau menuntut kemasyhuran, lisannya diikat dari segala perkara yang tidak ada kena-mengena dengan dirinya, sedang hatinya sentiasa merasa pedih dan sedih jika terlalai dari mentaati Tuhannya, tidak pernah tawar-menawar dalam urusan agama, tidak akan tunduk sepi melainkan ada saja kebaikan yang dibuat atau ilmu yang diajarkan, diharap daripadanya segala kejahatan, ia tidak akan menganiaya orang yang menganiayainya, dan menghampakan orang yang menghampakannya, laksana pohon kurma semakin kamu melontarnya dengan batu, semakin ia menggugurkan buah-buahannya yang segar-bugar, ataupun laksana bumi betapa banyak sekalipun kamu meletakkan kotoran di atas mukanya, ia tetap mengeluarkan dari perutnya segala yang sedap dan lazat, cahaya kebenarannya meliputi semua bentuk lahirnya, sehingga apa yang terlukis di wajahnya hampir-hampir dapat mentafsirkan apa yang tersembunyi di batinnya, hematnya dan tujuannya semata-mata untuk meredhai Tuhannya, mengerjakan sesuatu ataupun menjauhinya semata-mata untuk menurut jejak-langkah Rasulullah saw yang dipandang sebagai orang ikutannya, orang kecintaannya dan orang pilihannya, ia mencontohi akhlaknya, dalam perlakuannya, dan dalam pertuturannya, sentiasa tunduk dan patuh kepada perintah Tuhan yang Maha Agung, sebagaimana yang tertera di dalam KitabNya yang mulia, dimana Tuhan telah berfirman:

“Apa yang diperintah oleh Rasul, kerjakanlah; dan apa yang dilarangnya berhentilah” (al-Hasyr: 7)

“Dan sesungguhnya pada diri Rasulullah terdapat tauladan yang baik untuk kamu dan untuk orang-orang yang berharap untuk menemui Allah dan Hari Akhirat, dan mengingat Tuhan sebanyak-banyaknya” (al-Ahzab: 21)

“Sesungguhnya orang-orang yang berjanji setia kepada engkau, sebenarnya mereka telah berjanji setia kepada Allah” (al-Fath: 10)

“Katakanlah: Kalau kamu benar menyintai Tuhan, maka turutlah aku niscaya kamu dicintai oleh Tuhan dan diampuniNya segala dosa-dosa kamu dan Tuhan itu Maha Pengampun dan Penyayang” (ali Imran: 31)

“Hendaklah orang-orang yang melanggar perintah Rasul itu menjaga diri mereka, supaya tiada ditimpa ujian, atau ditimpa siksa yang pedih” (an Nur: 63)

Keterangan:

9. **“Tidak Ditundukkan Oleh Pangkat dan Kedudukan:** Caranya: Janganlah kamu dipermainkan dan diperbudakkan oleh keinginan hawa nafsu untuk memperolehi pangkat dan kedudukan. Jangan terjebak oleh permainan dunia dan syaitan. Lihatlah pada mereka (golongan terdahulu) yang tergoda akibat mengejar dunia dan apa yang di janjikannya (dunia). Berwaspadalah! Pada azab siksaan dariNya bagi sesiapa yang ingkar (degil). Bersabarlah pada Allah, kerana Dia adalah sebaik-baik penjaga buat dirimu. Ketahuilah, bahwa selagi kamu didalam keadaan jujur dan berlaku amanah dalam pekerjaan, tidak perlu mengidamkan pangkat dan kedudukan. Akan diberikan oleh Allah Taala selagi kamu jujur dan ikhlas menjalankan ibadah dan didalam pekerjaan yang diamanahkan olehNya. Diatas kejujuran dan amanah yang kamu sanjung itu sebenarnya dengan sendiri sudah menjaga baik Syiar Islam! Perbuatan yang membuat Allah Taala ‘suka’ dan membuat RasulNya ‘senyum’. Alangkah baiknya sekiranya kamu dapat melihat mereka (Allah dan RasulNya didalam kegembiraan dan kesenyuman) alangkah manisnya!!! Aduhai, tiada kata yang dapat melukiskannya, melainkan bagi mereka yang sudah merasa dan melihatnya. Allahu Akbar. Sekiranya kamu sudah berlaku jujur dan bersikap amanah tetapi juga tidak mendapat pangkat dan kedudukan, janganlah kecewa diatas ketentuanNya, sebaliknya lihatlah akan janji-janjiNya yang akan diberikan olehNya diakhirat kelak. Mana yang kamu pilih, pangkat dan kedudukan didunia yang fana ataupun pangkat dan kedudukan diakhirat yang kekal abadi? Dengan itu berlaku jujur dan bersikap amanah sentiasa! Janganlah bohong pada diri sendiri, ok!
10. **Jangan diPengaruhi oleh Ajakkan Syahwat dan Hawa Nafsu:** Caranya: Amat susah sekali untuk seseorang menjauhkan atau menghilangkan segala ajakkan (keinginan) yang datang dari syahwat dan hawa nafsu. Sekiranya seseorang itu tidak mengenal mana ajakkan yang baik dan mana yang bukan. Ada satu jalan sahaja iaitu mendalami ilmu fiqh dan ilmu tasauf. Kedua ilmu ini insyallah, dapat memberi jawapan pada diri untuk memilih apa yang dibenarkan dalam Islam. Dengan itu bangun dan belajarlh pada kedua ilmu ini.
11. **Jangan Biarkan Diri Kamu diKonkong:** Caranya: Jangan biarkan diri dikongkong oleh adat dan kebiasaan yang selama ini dikerjakan dimana tidak ada nash, dalil atau dari ijmak ulama. Untuk mengetahui samada seseorang itu terjebak dalam melakukan perbuatan yang tergolong dari adat dan kebiasaan tetapi bukan dari perbuatan yang dituntut (disuruh) dalam Islam hendaklah mempelajari hukum Agama Islam dan membaca kitab-kitab sejarah. Diantara duanya ada mengandungi panduan dan garis bagi setiap muslim untuk mengikutinya. Jangan biarkan diri dikongkong oleh manusia, khususnya, majikan. Jangan sampai kamu sanggup menjual (mengetepikan) Haq Allah Taala, hanya kerana ingin mentaati majikan. Ini tidak lain adalah seseorang itu mempunyai ketakutan yang amat dahysat pada majikannya, kerana takut dibuang kerja! Bagaimana pula dengan Allah Taala yang memiliki diri kamu? Tidak kah Allah juga berkuasa untuk membuang dirimu? Pada hakikatnya Dialah yang memberi kamu pekerjaan! Bolehkah majikan kamu bertindak sedemikian tanpa izin dari Allah Yang Maha BerKuasa atas setiap sesuatu? Janganlah kamu dengan sesuka hati

mengetepikan Haq Allah Taala! Macam tak ada benda aja! Bagaimana pula sekiranya Allah Taala, mengetepikan keperluan kamu untuk hidup didunia ini???

- 12. Jadikan Percakapanmu Merupakan Zikir dan Mutiara Hikmat:** *Caranya: Setiap percakapan harus merupakan Zikir, yang bermaksud 'Peringatan menuju kepada Allah Taala'. Jangan lazimkan (membiasakan) diri bercakap kosong belaka. Bagi sesiapa yang suka dan tidak menahan atau tidak berpikir dahulu sebelum mengeluarkan percakapan yang 'baik' dimana dapat dimanfaatkan oleh orang lain, menunjukkan tidak ada iman, atau tipis imannya. Sesiapa yang sentiasa 'menjaga' daripada percakapan yang kosong yang 'tidak memberi manfaat bagi dirinya dan orang lain', adalah orang yang beriman pada Allah dan RasulNya, kerana sikap ber'jaga' yang dimilikinya. Mereka sentiasa merasai bahwa Allah Taala mendengar segala apa yang diucapkan dan para malaikat yang ditugaskan akan menulis didalam buku catitannya dimana akan ditunjukkan kepadanya dihari Qiyamat nanti. Dengan memperolehi perasaan itu, mana mungkin seseorang akan mengeluarkan sesuatu percakapan yang tidak 'baik' untuk dijadikan nasihat pada orang lain. Begitu juga dengan kata-kata yang berupa Mutiara Hikmat. Adakah seseorang akan membuang dengan tidak tentu pasal akan mutiara-mutiara yang dimilikinya? Itukan perbuatan orang gila! Adakah kamu orang gila? Tentu tidak, bukan! Jadikan nasihat berupa mutiara hikmat, sesiapa yang mendengarnya akan terpegun akan kesilauan mutiara itu dan menaikkan semangat untuk memperolehinya.*
- 13. Banyak Mendiamkan Diri:** *Caranya: Berdiam diri sangat dianjurkan dalam Islam. Bila seseorang yang banyak berdiam diri, mereka tidak akan ada masa untuk mengeluarkan kata-kata yang boleh menariknya pada segala sifat yang tercela dan hina. Mereka mengisikan diam (memilik diam) dengan tafakkur iaitu melihat akan keBesaran dan keAgungan Allah Taala didalam, pengurusan dan pengtakbiran yang dijalankan olehNya. Cara begini akan membawa seseorang itu dapat melihat dengan jelas akan pengtakbiran dan pengurusan Allah Taala atas setiap hambaNya dimana dapat menaikkan dan menambahkan keimanannya kepada Allah Taala kerana bertumbuhnya keimanannya itu berpandukan pada pandangannya kepada cara Tuhannya mengtakbirkan alam ini.*
- 14. Jadikan Perbuatan Mendahului Percakapan:** *Caranya: Ramai diantara murid-murid banyak melakukan percakapan tetapi tidak dijadikan perbuatan dari percakapan itu. Banyak mengaku-gaku faham, tetapi sayang tidak dapat melaksanakan perbuatan itu. Itu adalah bukti tipis akan keyakinannya pada memahami sesuatu perkara. Tetapi cuba menunjukkan bahwa dirinya faham sesuatu perkara. Sekiranya si murid itu faham akan apa yang dipelajarinya, perbuatannya akan mendahului percakapannya. Tidak perlu lagi untuk dirinya bercakap kerana perbuatannya sudah menjelas (menampakkan) apa yang mahu diperkatakan dan apa yang diyakininya dan dijadikan amalan hidupnya dan menjadi contoh bagi orang lain.*
- 15. Ilmu berSerta Dengan Amal:** *Caranya: Jadikan ilmu kamu sejalan dengan amal. Apa gunanya bercakap banyak tentang ilmu pengetahuan agama Islam tetapi tidak mengamalkannya? Adakah kamu seorang 'munafiq'? Tentu, kamu akan berkata tidak! Jadi, jangan jadikan diri sebagai 'munafiq'. Tidak kah kamu mengetahui bahwa 'munafiq' adalah musuh Islam tetapi 'kawan rapat dengan Syaitan'. Kalau kamu tidak mahu dicopkan oleh Allah dan RasulNya sebagai orang 'munafiq', jangan cakap banyak berkenaan dengan ilmu agama Islam! Beramal-lah, kerana dengan beramal*

saja, orang lain dapat melihat dan menilainya. Tidak perlu cakap-cakap! Buang masa aje! Hanya nak berkumpul dan menunjukkan taring-taring samplanya aje! Bila berdepan dengan orang yang berilmu, taringnya dah tak ada! Heh. He. He. Mana pergi taring itu? Maka diam lebih baik, diam itu adalah Mutiara . . .

16. **Jadikan Syiar dan keTenteraman Jiwa seBagai Matlamat:** *Caranya: Hendaklah setiap murid harus menjadikan matlamatnya bersandar pada Allah Taala sebagai 'Yang Empunya Diri' untuk mendapatkan ketenteraman jiwa. Bila seseorang itu mempunyai 'Yang Empunya Diri' maka dia tidak akan gentar dan takut pada sesiapa pun kerana tempat bersandarnya adalah Yang Maha Kuasa! Tidak ada sesiapa yang boleh mencelakakannya! Tidak ada sesiapa yang boleh memberi manfaat kepadanya! Melainkan Allah Rabbul Alamin! Itulah dua pokok pegangannya. Bila kedua pokok ini diyakini secara Haqqul-Yakin, ketenteraman Jiwa sudah dimilikinya. Untuk mengukuhkan lagi pegangannya adalah mengutamakan apa yang disyariatkan oleh Allah dan RasulNya sebagai pedoman hidup. Bila seseorang itu mempunyai pedoman hidup, maka jiwanya akan tenteram dan menantikan kematian untuk berjumpa dengan Allah Taala (kekasihnya).*

17. **Jadikan Tawadhu' Sebagai Pakaian Dan Merendah Diri:** *Caranya: Hendaklah setiap murid mengenakan pakaian tawadhu' kerana pakaian itu adalah pakaian dari Rasulullah saw, Para Sahabatnya, Para Alim Ulama dan Auliyanya. Sebaliknya janganlah berpakaian seperti mereka tetapi tidak mengenakan tawadhu', maka kamu tidak termasuk dalam golongan mereka. Setiap murid harus mencontohi mereka itu kerana mereka adalah Hamba-hambaNya yang mendapat keredhaan dan keampunan dari Allah oleh kerana Tawadhu' yang dimiliki mereka. Mereka sentiasa merendahkan diri bila berhadapan dengan makhluk dan merendahkan diri bila seorangan. Alangkah tinggi tawadhu' mereka itu, dimana mereka dapat bertawadhu' walaupun sendirian! Itulah yang dimaksudkan mengenakan pakaian tawadhu'. Bukan ditunjuk-tunjuk, pakai baru tunjuk. Bukak pakaian tawadhu' pun tidak ada. Hendaklah meninggikan orang lain dari pada diri kamu, walaupun pada zahirnya mereka tidak mempunyai ilmu agama, tetapi lihatlah menerusi hati kamu, siapa yang lebih baik? Sekiranya mereka bodoh, adalah dengan kebodohan mereka, bagi kamu yang mengaku mempunyai ilmu, dimana amalan kamu?*

18. **Mengutamakan Kebenaran Dan Menolak Yang Batil Serta Membencinya:** *Caranya: Setiap murid wajib mengutamakan kebenaran pada setiap masa. Tidak ada tolak ansur dalam perkara ini. Sebab setiap hamba Allah akan sentiasa mengutamakan kebenaran diatas kepalanya. Hendaklah sentiasa berpihak kepada kebenaran bilamana keadaan memaksamu untuk memilih sesuatu jawapan atau pandangan. Seperti contoh; Kamu diangkat sebagai saksi untuk meleraikan suasana rumah tangga. Pada satu pihak, ada pertalian saudara kandung dan satu pihak lagi pertalian sebagai adik ipar. Kepada siapakah akan kamu berpihak? Adakah kamu akan berpihak pada saudara kandung ataupun berpihak pada adik ipar? Keadaan ini akan menjadi rumit lagi bilamana saksi lain ada hubungan kekeluargaan. Mendesak, memaksa kamu untuk berpihak kepada apa yang disyorkan oleh mereka. Saksi yang lain itu pulak adalah ibu-bapa kamu sendiri. Dalam keadaan sebeginilah yang akan ditunggu oleh mereka yang mempunyai ilmu pengetahuan supaya dapat dilihat oleh mereka, dipihak manakah mereka menyokong. Adakah pada nafsunya? Atau jatuh pada pujukkan Syaitan? Wah! Ini bukan main-main? Memberi pandangan bersandarkan nafsu atau pujukkan syaitan menandakan kamu tersalah tekan butang, dibukanya pintu neraka untuk kamu!*

Bilamana pandangan kamu bersandarkan kebenaran dan mengutamakan Al-Quran maka kamu menekan butang kepintu syurga! Walaupun kamu dihina kerana tidak berpihak pada saudara kandung. Walaupun ibu-bapa kamu sedih diatas tindakan yang kamu lakukan! Kalau ikutkan hati, harus menjaga ibu-bapa dan jangan buat mereka sedih dan menangis seperti yang diperintah dalam Islam. Haruskah kamu mengorbankan kebenaran demi untuk menjaga kedua ibu-bapa kamu??? Ingatlah, Islam didirikan atas kebenaran! Bacalah sejarah Nabi kita saw, insyallah kamu akan dapat jawapannya. Hendaklah kamu menolak apa saja yang batil. Apa itu batil? Sesuatu perkara atau perbuatan yang tidak diterima oleh Allah dan RasulNya. Dan wajib kamu membenci akan perkara dan perbuatan itu dan kepada berserta pelakunya, kalau tidak kamu termasuk dalam golongan mereka yang membuat batil!!! Bagaimana seseorang dapat mengetahui bahwa sesuatu perkara atau perbuatan termasuk didalam kebatilan? Hanya dengan ilmu pengetahuan tentang islam, berpegang pada segala perintahnya dan menjauhi segala larangannya. Seperti sudah disebutkan diatas, belajar Syariat dan Ilmu Tasauf! Janganlah kamu membiarkan diri kamu menjadi seorang 'munafiq' bila melihat sesuatu kebatilan belaku tetapi kamu tidak berlaku adil terhadap agama. Bermaksud kamu membenarkan perkara itu berlaku didepan mata kamu! Bila seseorang dengan rela hati melihat kebatilan didepan matanya bukankah itu 'munafiq' namanya. Kerana tidak mahu membenci kebatilan itu. Berwaspadalah!

19. BerGaul Dengan Orang Baik dan Melindungi Mereka: *Caranya: Hendaklah kamu sentiasa berada disisi orang yang baik. Siapakah mereka itu? Mereka itu adalah, bilamana kamu berhadapan dengannya akan mengingatkan diri kamu kepada Allah. Bergaul dengan mereka membuat hati menjadi tenteram. Bergaul dengan mereka mengingatkan dosa-dosa dan kesalahan yang telah dilakukan. Bergaul dengan mereka akan mendapatkan nasihat-nasihat yang bermanfaat. Bergaul dengan mereka dapat membersihkan dosa-dosa. Bergaul dengan mereka kerana mereka diibaratkan lampu yang menyuluh supaya tetap teguh dalam perjalanan hidup. Bergaul dengan mereka kerana mereka pewaris Nabi saw. Bergaul dengan mereka adalah tuntutan Agama. Bergaul dengan mereka akan mendapatkan keberkahan dan doa dari mereka. Bergaul dengan mereka akan menanamkan sifat berkasih sayang. Bergaul dengan mereka akan mendapat keselamatan dunia dan akhirat. Dan banyak lagi sifat-sifat mulia mereka itu. Kerana itulah kamu harus melindungi mereka, menyalurkan bantuan, dan mengambil berat akan keperluan mereka (jangan bertanya atau tunggu disuruh). Dengan cara demikian kamu secara rohani menyalurkan bantuan kepada semua orang-orang yang baik. Kerana mereka mempunyai tali perhubungan antara satu dengan lain.*

20. Membenci Orang-Orang Yang Jahat Dan Memusihinya Mereka: *Caranya: Islam menghukumi kamu untuk bermusuhan dengan orang-orang yang jahat. Siapakah orang-orang yang jahat itu? Mereka bukanlah kaum kafir, kerana kaum kafir sudah nyata (terang) dengan kekafiran mereka. Yang ditujukan adalah mereka yang berselindung dalam Islam! Mereka inilah yang dimaksudkan, kerana berselindung dibawah bendera Islam! Tetapi sebenarnya Musuh Islam. Mereka itulah yang dikatakan orang-orang Jahat. Kerana mereka sebenarnya memusuhinya orang-orang Islam! Lihatlah dengan siapa kamu bercampur-gaul. Siapakah mereka? Mereka itu adalah orang-orang yang memiliki semua sifat-sifat keji dan hina. Tidak percaya akan agama Islam. Tidak percaya Allah. Tidak percayakan Nabi Muhammad saw.*

21. Batin Lebih Baik Dari Zahir: *Caranya: Hendaklah kamu tutup kebaikan batinmu daripada menunjukkannya. Kerana kebaikan yang batin (didalam) secara hakikatnya*

tidak perlu dilindung, kerana ianya tidak dapat ditutup. Tetapi berhati-hatilah kepada kebaikan zahir kerana mungkin pada batinnya tidak ada kebaikan tetapi dibuat-buat untuk melindungi diri atau menginginkan pujian dan sanjungan.

22. **PerGaulan Lebih Manis Dari Sebutan:** Caranya: Hendaknya kamu mempunyai sifat penyayang. Bila sifat penyayang ini ada, kamu akan dipandang lebih manis daripada orang yang menyebut tentang dirimu. Kerana yang menyebut-yebut belum melihat dirimu, hanya mendengar dari percakapan dari orang lain. Bagaimana pula bila orang itu berhadapan dengan si manis?
23. **Suka Menolong Orang:** Caranya: Suka memberikan pertolongan pada orang yang memerlukan. Tetapi lihatlah pada orang yang hendak diberikan pertolongan itu. Adakah dia seorang munafiq atau seorang yang beriman pada Allah dan Rasul. Sekiranya kamu menolong orang yang beriman pada Allah, akan menambahkan lagi keimanannya. Kalau kamu menolong orang munafiq, maka tebal dan kuat lagi kemunafiqkannya disebabkan pertolongan yang kamu salurkan padanya. Jadi adakah kamu bersyubhat? Benar, kamu termasuk dalam golongan mereka, kerana kamu punca kekuatan kemunafiqkannya! Menolong seseorang tidak semesti dengan wang ringgit, kalau tidak ada. Boleh juga dilakukan dengan tulang empat kerat. Pokok ceritanya 'ikhlas'. Menolong seseorang untuk menunjukkan jalan kepada Allah. Mengingatkan orang kepada Tuhan dan sebagainya.
24. **Ringan Kaki Tangan:** Caranya: Hendaknya wahai murid, dapat meringankan kaki dan tangan didalam beribadah kepada Allah Taala dan mengerjakan sunnah-sunnah RasulNya. Ringankan kaki untuk berdiri dihadapanNya (mengerjakan sholat). Meringankan tangan untuk mengambil wudhu dan mengambil Al-Quran, Kitab Pengajian, Tasbih untuk Berzikir kepadaNya. Ringankan kaki untuk menuju ketempat yang diberkatiNya. Ringankan kaki dan tangan untuk berkhidmat pada Guru tanpa disuruh! Itu juga salah satu bab, tanda ringan kaki dan tangan pada Guru dan sebagainya.
25. **Menjauhi Sifat Degil:** Caranya: Apa itu Degil? Keras kepala. Apa itu keras kepala? Ingkar. Apa itu Ingkar? Tidak mahu mematuhi arahan atau perintah yang diberikan. Kenapa? Degil-lah tu! Sikap siapa degil itu? Sifat Syaitanlah! Sekiranya kamu mengaku syaitan sebagai musuh kamu, bererti kamu tidak boleh memiliki sifat syaitan, bukan? Maka dengan itu hendaklah kamu sentiasa dalam keadaan akur (taat). Untuk bersikap taat ini diletakkan mengikut keutamaan dan kedudukannya masing-masing dalam rangking. Tetapi lihatlah kepada siapa kamu akur dan taat. Jangan salah akur dan taat pulak!
26. **Bodoh:** Caranya: Jangan kamu berada didalam keadaan bodoh, bodoh terhadap tuhan, bodoh terhadap rasulNya, bodoh terhadap perintah dan laranganNya dan bodoh terhadap matlamat kehidupannya. Pergi belajar, insyallah, kamu akan diberikan ilmu terhadap tuhanmu, terhadap rasulNya, terhadap perintah dan laranganNya dan terhadap matlamat hidup. Jangan sesekali kamu duduk dengan orang yang bodoh! Tak kira siapapun, walaupun kerabat terdekat! Mengapa? Orang yang bodoh akan membawa kamu kepada perkara-perkara yang melalaikan daripada mengingati Allah dan RasulNya. Bila kamu didalam suasana begini, maka kamu berada dalam kebodohan. Jangan biarkan dirimu didalam kebodohan kerana ditakuti Malaikat Maut datang pada ketika dan saat kamu sedang berada didalam kebodohan.

27. **Jadilah Orang Yang DiPercayai:** Caranya: Untuk menjadi seorang yang dipercayai oleh Allah dan RasulNya, oleh hamba-hambaNya dan oleh sekalian makhlukNya adalah dengan Sifat Siddiq dan Amanah. Bila seseorang itu tidak memiliki sifat siddiq dan amanah berarti tidak dipercayai oleh Allah dan RasulNya, oleh hamba-hambaNya dan sekalian makhlukNya, walaupun dia sholat sekalipun! Buat penat aje!!!
28. **Jangan Jadi Pemaki Atau Pelaknat:** Caranya: Sesiapa yang suka dan mudah mengeluarkan kata-kata yang buruk dan hina menunjukkan hati yang busuk! Sesiapa yang suka dan mudah melaknat orang lain, menunjukkan hatinya penuh dengan hasad dengki. Maka dengan itu jauhilah sifat-sifat ini.
29. **Tidak Mengabaikan Kewajipan:** Caranya: Untuk mengetahui seseorang ataupun diri kamu sendiri tidak mengabaikan kewajipan yang difardhukan didalam hukum syariat seperti contoh: Bila sampai waktu sholat, dia akan bangun meninggalkan sesiapapun juga yang ada dikelilingnya. Itulah tanda yang hakiki. Yang lain kewajipan terdapat dalam hukum syariat.
30. **Tidak Menggengam Apa-apa Yang Ada:** Lihat no. 4.
31. **Dada Bersih Dari Segala Rupa Jahat:** Caranya: Pertama harus mengenali yang mana satu rupa jahat, mana tidak? Bila tidak mengenali rupa jahat, bagaimana hendak membendungnya? Kamu harus menimba ilmu tasauif untuk mengenali segala rupa jahat dan cara-cara untuk membendungnya dan mengulang kaji pelajaran tasauif supaya tidak lupa pada mengenal rupa jahat itu. Jangan sampai kamu sendiri yang mempunyai rupa jahat. Dada berarti Hati dan Rupa berarti Niat.
32. **KeAzaman Yang Tinggi Untuk Mendekatkan Diri Pada Tuhan:** Caranya: Untuk mencapai keazaman yang tinggi terhadap segala amal yang boleh mendekatkan diri kepada Tuhan adalah dengan **PENGORBANAN bukan ANGAN-ANGAN**. Sekiranya seseorang itu tidak boleh berkorban demi untuk Allah dan RasulNya dengan niatan untuk mendekatkan diri, maka tidak akan tercapai dan tidak ada jalan lain, melainkan **PENGORBANAN!** Bagaimana untuk melakukan pengorbanan demi untuk Allah dan Rasul yang dikasihi? Bila dalam keadaan penat, berkorbanlah. Bila dalam keadaan mengantuk, berkorbanlah. Bila dalam keadaan membuat sesuatu yang tidak ada manfaatnya, berkorbanlah. Insyallah, dengan pengorbanan yang kamu dapat lakukan akan membuahkan hasil yang lumayan. Dan Allah serta RasulNya akan mendekatkan diri mereka kepada kamu. Sekiranya pengorbanan itu tidak dapat dilaksanakan, berarti kamu tidak mempunyai cinta dan kasih terhadap Allah dan RasulNya! Tidak ada alasan lagi.
33. **Nafsu Menolak Semua Pekerjaan Yang Hina:** Caranya: Untuk mempunyai nafsu yang menolak semua kelakuan dan perbuatan yang hina adalah dengan mendekatkan diri kepada Allah. Sentiasa Mengingati Allah. Mengingati RasulNya. Mengerjakan apa yang dituntut dalam Islam. Bila perkara ini dapat diamalkan, insyallah, nafsu kamu sudah berjinak dengan perbuatan yang dituntut dalam Islam dan menolak semua perbuatan yang mengundang kehinaan.
34. **Tidak Selalu Tergelincir keDalam keSalahan:** Caranya: Sebagai manusia biasa, tidak mudah terlepas dari tergelincir dalam melakukan kesalahan. Untuk tidak selalu berada

didalam kegelinciran dalam membuat kesalahan (dosa) hendaklah mengutamakan hukum-hukum agama sebelum melakukan sesuatu pekerjaan atau melakukan sesuatu perbuatan. Fikir dulu baru buat. Fikir dulu baru cakap.

35. **Tidak meLakukan Pekerjaan Menurut HawaNafsu:** Caranya: Jangan kamu melakukan sesuatu pekerjaan dengan menurutkan hawanafsu. Membuat sesuatu pekerjaan yang berlebihan itu adalah berpunca dari hawanafsu. Maka sebaiknya hendaklah berada didalam pertengahan dan istiqamah. Pelan-pelan. Bila membuat sesuatu secara mendadak dan banyak itu menunjukkan munculnya dari hawanafsu. Hawanafsu akan ketawakan kamu. Bila kamu letih, dia goyang kaki dah. Mission Completed!
36. **Teman kepada Sifat meNepati Janji dan berSikap sebagai Pahlawan:** Caranya: Maksudnya menjadikan sifat menepati janji sebagai teman hidup dan berdiri sebagai pahlawan menegakkan amar maruf nahi mungkar.
37. **Rakan kepada Sifat Pemalu dan Menjaga Maruah:** Caranya: Hendaknya kamu menjaga maruah dan menjaga maruah orang lain. Bila dapat menjaga kedua-kedua maruah ini membuktikan kamu mempunyai akhlak yang tinggi. Hendaknya mengutamakan sifat malu dahulu dalam semua perkara sebelum membuat sesuatu perkara atau perbuatan. Kerana sifat malu itu juga adalah salah satu cabang dari iman. Dengan itu jadikan sifat malu dan menjaga maruah sebagai rakan teman hidup.
38. **BerTimbang-Rasa terHadap semua Manusia dan Tidak Marah Jika Manusia Tidak BerTimbang-Rasa Kepadanya:** Caranya: Menaruh perasaan bertimbang rasa terhadap sekalian manusia samada Islam atau kafir adalah sesuatu yang dituntun dalam Islam. Bahkan di larang supaya jangan menaruh perasaan marah jika seseorang tidak bertimbang-rasa. Apa yang dimaksudkan bertimbang-rasa. Iaitu sesuatu perbuatan yang dapat bertolak-ansur dan saling maaf memaafkan dan saling tolong menolong. Orang yang tidak ada sifat bertimbang-rasa lazimnya adalah orang yang menyangka dirinya baik, tidak boleh buat salah dan dirinya aje yang betul. Sombonglah tuu.
39. **BerSyukur bila Menerima Pemberian dan BerSabar Jika diTahan:** Caranya: Melazimkan diri untuk bersyukur kepada Allah Taala bila menerima sesuatu pemberian dan sentiasa melazimkan diri bersabar serta bersyukur pada Allah Taala bila ditahan sesuatu pemberian. Bila keadaan seseorang dapat melaksanakan maka jiwanya menunjukkan bahwa dia bersandar pada Allah Taala dan sentiasa bersyukur pada pemberian yang diberikan ataupun tidak. Kerana keyakinannya begitu mendalam, yang diyakininya segala pemberian dan apa yang ditahan semuanya bersumber dari Allah Taala. Dan juga hendaknya melazimkan diri supaya mudah bersyukur dan bukan bersyukur bila mendapat pemberian saja. Kerana Allah Taala sentiasa memberi dan Dialah sebaik Pemberi. Hanya mata kasar saja yang tidak dapat melihat!
40. **Segera Bertaubat Dan Beristighfar:** Caranya: Tumbuhkan perasaan suka bertaubat dan membaca istighfar. Sekiranya kamu menganiaya diri sendiri dan terjerumus dalam sesuatu perbuatan dosa atau membuat sesuatu perkara yang membuat Allah Taala marah, lekas-lekaslah bertaubat dan beristighfar. Sekiranya kamu menyangka bahwa dirimu tidak menganiaya diri, hendaklah kamu bertaubat dan beristighfar juga kerana

tidak ada manusia yang terjamin lepas dari dosa. Yang anehnya ramai yang tidak mahu bertaubat dan beristighfar. Dan ramai juga menunda untuk bertaubat dan beristighfar. Kenapakah begitu? Sebab, kedudukan mereka lebih tinggi dari Nabi dan Rasul, kerana Nabi dan Rasul bertaubat dan beristighfar. Jadikan bertaubat dan beristighfar sebagai amalan hidup kamu. Jangan main-main, nanti kena main . . .

41. **Memaafkan Dan Mengampunkan Bila diAniaya:** Caranya: Hendaknya kamu mempunyai sikap suka memaafkan orang lain dan suka mengampunkan bila dianiaya atau difitnah. Bagi sesiapa yang tidak mahu memaafkan dan tidak mahu mengampunkan bila dirinya dianiaya atau difitnah, itu menunjukkan watak kesombongan dalam dirinya.
42. **Suka BerSendirian Dan BerJauhan Dari Manusia:** Caranya: Untuk mengamalkan duduk sendirian dan jauh dari manusia bukan sesuatu yang mudah dilakukan, hanya mereka yang sudah mengenal Tuhannya dan suka duduk dekat dengan Tuhannya akan selalu sibuk dengan urusan-urusan yang membawa dirinya kepada kedekatan kepada Kekasihnya Allah Rabbul Alamin. Bila diamati dengan sungguh-sungguh. Ramai manusia yang tidak dapat melarikan diri dari manusia, mereka mudah bosan, rasa sempit hidupnya tanpa berteman, tidak ada teman untuk berbual. Mari kita menjelajah jauh sedikit yang berbentuk dalam rangkaian kata-kata Makrifat. Bersendirian itu menunjukkan pada satu (1), yang ramai menuju pada satu. Bila dah satu tak perlu pada ramai, kerana ramai timbul dari satu. Tidak ada bosan, kerana bosan tidak wujud. Yang ada hanya Awal dan Akhir. Hidup tidak sempit kerana hidup tidak memerlukan pada ruang. Kerana yang Hidup tidak bersandar pada Hidup. Tidak perlu berteman sememangnya satu-lah teman. Tidak perlu pada berbual kerana diam itulah perbualan.
43. **Jangan Menonjolkan Diri atau Mencari Kemasyhuran:** Caranya: Janganlah kamu mempunyai keinginan suka untuk kedepan semata-mata ingin menonjolkan diri dengan bermotifkan untuk mencari kemasyhuran (nama). Supaya kamu dikenal manusia, menunjukkan perwatakan yang dibuat-buat, menunjukkan penampilan seperti orang alim, merendah diri tidak mengangkat kepala, kononnya tawadhu', mengikuti pembacaan sampil mengerutkan dahi konon-konon sedang menumpukan segala bacaan dan untuk menarik khusyuk, semua bohong belaka. Kalau masih merangkak, buatlah feil (perangai) merangkak, jangan nak berlari pulak, kalau dah jatuh, kain terangkat nampaklah kemaluan! Ooopps. Mana seluar dalamnya? Salah pakai dah, pakai kat luar . . . macam superman!
44. **Lisan diIkat – Tidak Ada Kena-Mengena Dengan Dirinya:** Caranya: Ini adalah salah satu sikap yang ramai melakukannya tanpa disedari kerana merasa sedap, syok dan terlena dibuai oleh hawa nafsu. Sebagai contoh; Dalam suasana kumpulan let say sepuluh orang. Ada dua orang sedang bercakap-cakap antara satu dan lain. Tinggal lapan orang yang masing-masing duduk diam, maka bangunlah seorang yang tidak senang hati daripada duduk diam, maka didekatkan dirinya pada kedua orang tersebut untuk mendengar apa yang dipercakapan diantara keduanya, walaupun tidak diundang bersama. Nah, sikap apa yang ada pada orang itu? Kenapakah tanpa segan silu dan tidak diundang datang duduk bersama untuk mendengarkan sesuatu yang tidak ada kena mengena dengan dirinya? Kalau ditanya, kenapakah kamu duduk bersama? Ia akan mengatakan bahwa ia kenal kedua orang tersebut! Bagaimana yang lagi tujuh orang itu? Adakah dia tidak kenal? Di jawabnya, sudah tentu kenal, kerana satu

kumpulan? Tapi mengapakah kamu mengangkat punggung dan beralih tempat lain? Mesti ada sebab sesuatu yang menariknya, bukan? Kalau tidak ada sesuatu yang menariknya, perkara mustahil ia akan beralih tempat! Daya tarikan apa kah itu? Pertama: Hawa nafsunya. Kedua: Tidak rasa senang hati melihat keadaan kedua orang itu. Ketiga: Antara salah satu kedua orang tersebut adalah orang yang dipeganginya iaitu 'Jin'nya. Bila seseorang yang memiliki 'Jin', dia tidak akan rasa senang hati kerana di takuti 'Jin'nya memberikan perkhidmatan (service) pada orang lain. Contohnya seperti; Aladdin & The Lamp. Aladdin akan bertungkus lumus memelihara 'Jin'nya apalagi kalau, 'Jin'nya dicuri orang lain. Keempat: Ingin memberikan pendapatnya sekali gus menjadi penasihat pada 'Jin'nya (walaupun tidak dilantik oleh 'Jin'). Kelima: Sudah melazimkan dirinya memberi makan pada 'Jin'nya maka dia tidak mahu orang lain memberi makan, iaitu sentiasa support apa keinginan 'Jin'nya. Keenam: Mempunyai Hasad, Dengki, Tamak dan sebagainya. Kalau ditanya padanya mengenai sifat yang ada padanya tentang hasad, dengki, tamak dan lainnya, dia tidak akan mengaku, tapi jelas kelihatan oleh orang lain pada perubahan wajah dan gerak badannya. Subhanallah, Maha Suci Allah Taala yang memberikan ilmu pengetahuan supaya tidak dipermainkan atau digunakan oleh orang seperti begitu. Allahu Akhbar! Jagalah lidah daripada menyampok percakapan orang lain. Jangan tunjukkan dirimu tidak ada malu! Tidak ada maruah! Tidak ada akhlak! Jangan mudahkan lidah kamu mengeluarkan kata-kata atau pendapat kalau tidak diundang atau disuruh. Maka diam adalah lebih baik buat kamu. Jangan melibatkan diri kamu dari perkara yang tidak ada kena mengena dengan dirimu. Dalam perkara sebeginipun kamu mudah tergelincir, kerana salah faham akan maksud 'jangan melibatkan diri pada perkara yang tidak ada kena mengena dengan dirimu'. Seinggakan kaum kerabat terdekat berada didalam keadaan musibahpun dikatakannya 'bukan urusanku'! Sangat sombongnya Engkau! Ini pegangan yang sangat jelas salah disisi agama. Bukankah darah yang mengalir didalam tubuhmu itu sama dengan kaum kerabatmu! Kalau benar, bermakna 'itu termasuk urusanku'! Seperkara lagi, jangan sekali-sekali mencampuri urusan Tuhan!!!

45. **Hati Yang Sentiasa Pedih Dan Sedih:** Caranya: Bagi sesiapa yang memiliki sifat sedemikian menunjukkan bahwa dia sudah kenal akan Tuhannya. Bila sudah kenal akan Tuhannya, maka kenal akan sifat-sifat Tuhannya, mana mungkin dia akan melalaikan kewajipan-kewajipan (perintah) yang diperintahkan atasnya! Kerana dia sudah melihat akan Tuhannya menerusi 'mata hati' akan sifat keBesaran, sifat keAgungan, sifat Maha Keras, sifat Penyayang dan segala sifat-sifatNya yang terpuji yang tercantum dalam AsmaulHusna. Dia mengenali kesemua sifat Tuhannya. Yang mana sifat Tuhan dan mana bukan sifat Tuhan! Dia bersandar dengan kuat pada Tuhannya dan berpegang dengan teguh dengan janji-janji yang dijanjikan pada dirinya menerusi Al-Quran dan Hadist NabiNya saw. Dia mengikuti benar-benar segala yang mungkin perbuatan Nabi yang dikasihinya. Kerana apa? Berpegang teguh dengan Janji-janjiNya. Bukan menginginkan Surga ataupun Neraka tetapi yang diinginkannya adalah duduk didepan Tuhannya, Rabbul Alamin dan Kekasihnya Muhammad saw sebagai idola kehidupannya. Hati dan sifat sebegini akan mengalami kepedihan dan sedih bila tidak dapat menjalankan kewajipan yang diperintahkan! Hatinya akan pedih dan sedih bila tertinggal akan amalan-amalan sehariannya! Hatinya akan pedih dan sedih kerana tergelincir dalam suasana lalai atau dilalaikan oleh makhluk lain! Sifat sebegini tidak akan didapati oleh mereka yang tidak ada Tuhan atau belum mengenal Tuhannya secara Haqqul Yakin. Hendaknya kamu sentiasa melazimkan diri supaya jangan meninggalkan atau lalai menjalankan

kewajipan yang diperintahkan oleh Tuhanmu, insyallah, dengan istiqamah dan langkah demi langkah akan membawa kepada sifat hati yang pedih dan sedih. Batu penghalangnya Cuma satu aje. ALASAN . . . ALASAN . . . ALASAN . . .

46. **Tidak Tawar Menawar Dalam Urusan Agama:** Caranya: Jangan kamu ada niat untuk bertolak ansur dalam urusan agama Allah. Jangan sesekali sanggup untuk berbuat begitu. Hendaknya kamu mengutamakan Haq Agama daripada melakukan pekerjaan lain. Melainkan kamu tidak ada pegangan agama, itu tidak mengapa, jalanlah terus . . . Kerana tidak ada hukum, disebabkan sudah dihukum. Satu-satunya perbuatan yang sering dilakukan adalah melayan kawan, lagi-lagi kawan yang perlukan untuk berteduh atau kawan yang dahulu atau masih menghulurkan bantuan atau sekali-kali. Maka terperangkaplah ia dalam keadaan begini. Nak cakap, tak boleh kerana nak berteduh. Nak tegur, tapi mengenangkan jasa yang telah disumbangkan. Didalam benak pikirannya penuh dengan alasan, seperti tidak ada tempat lain. Bukankah bumi Allah Taala ini luas? Mengapa masih hendak bersama dengan mereka yang mengetepikan urusan agama? Tersepitlah ia di antara kawan dan Tuhan. Disinilah bedah siasat dapat dilakukan (muqarabah), sekiranya memilih untuk menegur kawan Alhamdulillah, bermakna mengutamakan Allah daripada kawan yang fasiq! Kalau memilih diam dari menegur, bermakna mengutamakan kawan, bermakna dirinya sendiri yang munafiq dan fasiq! Mengapa hukumnya begitu berat sekali? Disebabkan sanggup tawar menawar dalam urusan agama. Mementing Kawan daripada Tuhan. Takutkan kawan dari Tuhan. Dalam apa juga perbuatan hendaklah kamu sentiasa mengutamakan urusan agama, jangan sesekali kamu sanggup untuk menjualnya!
47. **Tidak Duduk Diam Melainkan Kebaikan Yang DiBuat:** Caranya: Jangan kamu meluangkan masa dengan perbuatan yang tidak mendatangkan manfaat. Iaitu perbuatan yang tidak dan tidak dapat dibawa sebagai bekal ke kampung akhirat. Jangan menyia-nyiakan waktu kosong! Buat sepatutnya pada keluarga ala kadar aje sebagai tanggung-jawab sebagai suami atau isteri, yang lain di isikan untuk menyiapkan bekal kelak nanti. Isikan saki baki waktu yang masih ada selepas bekerja mencari rezki sebagai satu ibadah dengan berdiri sholat, membaca zikir, mentelaah buku pelajaran, bertafakkur mengenangkan hari hari akhir dan sebagainya. Seharusnya begitulah niatan seseorang yang menantikan hari pertemuan dengan Tuhannya. Menyiapkan segala bekal untuk perjalanan jauh.
48. **Mengajarkan Ilmu Dan Mengharapkan Daripada Segala Kejahatan:** Caranya: Ilmu yang dipelajari hendaklah diajarkan pada kaum keluarga supaya terlepas dari segala kejahatan, dimana harus bermula dari rumah sendiri. Satu daripada keadaan yang sering menimpa seseorang itu adalah tamak dengan ilmunya dimana tidak mahu berkongsi dengan ahli keluarga. Bila tidak dikongsi bersama, maka akan timbul syak wasangka, tuduh menuduh dan sebagainya, kerana pihak yang menuduh tidak faham akan keadaan kamu yang bertungkus lumus mencari rezki dan untuk bersama dengan Tuhanmu pada malam hari atau pada masa terluang. Jadi salah siapa? Alasan, dia tak faham. Tetapi dia lupa untuk melihat dirinya juga dahulu juga tak faham. Jangan sombong, dan jangan mudah nak mengatakan ahli keluarga tak faham. Disebabkan oleh kamu sendiri yang tidak mahu meluangkan masa bersama keluarga tetapi mengutamakan keperluan diri sendiri dengan bersandarkan dengan alasan. Tak ada masa? Bukan itu bohong namanya! Selagi masih hidup kamu bersama masa! Cuma tidak tahu dan tidak cerdik dalam mengaturkan masa. Kalau difikir dengan tenang dan satu per satu, maka akan terlihatlah siapa yang sombong dan tamak? Jadi siapa yang

sebenarnya sombong dan tamak? Siapa sebenarnya yang tidak faham? Memang benar, perkara ini buka mudah, hanya orang yang beriman dan bersandar dan memohon kekuatan dari Tuhannya dapat mengatasi perkara sebegini. Hendaknya kamu sentiasa didalam nasihat menasihati antara satu dan lain, bukan disuruh bukak bab! Mengingatkan antara satu dan lain akan mengutamakan haq Allah dan mengutamakan urusan agama. Dengan cara begitu, kamu sebenarnya menasihati diri sendiri juga.

49. **Tidak Menganiaya Orang:** Caranya: Dalam apa keadaan sekalipun jangan kamu sekali-kali ada keinginan untuk menganiaya orang lain yang menganiayai diri kamu. Lihat no. 41. Secara hikmah, terjadinya penganiayaan atas diri kamu semestinya ada sebab tertentu dimana tidak dapat melihatnya. Anggap ini sebagai peringatan dari Allah Taala. Kerana setiap penganiayaan tidak akan berkesan tanpa keizinan dari Allah Taala.
50. **Menghampakan Orang Yang Menghampakannya:** Caranya: Kerana mulut badan binasa. Kerana janji dibawa mati. Dengan itu jagalah mulut daripada mudah berjanji. Kerana kamu akan dipersoalkan di hadapan Allah Taala! Lihatlah kepada siapa yang kamu janji! Kerana setiap janji yang tidak dilaksanakan akan membawa dihadapan pintu neraka. Sekiranya pihak yang dijanjikan itu merasa hampa, maka di bukanya pintu neraka itu dan dicampakkan kamu ke dalamnya! Sebaliknya sekiranya dirimu yang hampa kepada seseorang hendaknya kamu jangan menghampakannya dengan menahan apa yang patut dikongsikan bersama.
51. **Cahaya KeBenaran Terlihat Pada Zahirnya:** Caranya: Untuk mendapatkan cahaya kebenaran sebegini bukannya boleh dibeli dengan wang ringgit. Cahaya kebenaran sebenarnya datang jauh dari dalam hati yang bersih dari segala sifat keji dan hina. Dan paling utama adalah mempunyai keikhlasan hati dalam melakukan segala perbuatan dan ditujukan pada Allah Taala. Apa yang ada didalam hatinya, baik percakapan dan perbuatan akan terlihat pada luaran dirinya. Sekiranya Gelap maka gelap jugalah terlihat diluarannya. Begitu juga dengan terlihatnya cahaya kebenaran ataupun kegelapan dapat ditafsirkan (tentera) apa yang tersembunyi didalam hatinya. Dengan itu, jangan cari, pasti kamu tidak akan dapat, tapi buatlah amal ibadahmu saja, hanya pada Allah Taala.
52. **Mencari Keredhaan Tuhan:** Caranya: Jadikan keazaman dan tujuan hidupmu semata-mata untuk mendapatkan keredhaan Allah Taala. Lihat no. 31.
53. **Rasulullah saw seBagai Orang Ikutnya:** Caranya: Selagi Nabimu ada didalam hatimu maka akan mudah untuk mengerjakan atau menjauhi sesuatu. Sebab, dialah guru sejatimu. Yang 'problem'nya nabimu tidak berada didalam hatimu, hanya dilidah aje! Ni, yang 'problem besar'! Sekiranya Nabi saw tidak diambil sebagai orang ikutannya, macam mana hendak menurut jejak-langkahnya. Kerana sebenarnya dia tidak mencintai nabinya! Kalau dia mencintai nabinya, pasti dia akan mengikuti jejak-langkah nabinya, bukan? Bila Nabimu berada didalam hati mu maka pertama sekali adalah kamu akan mencari (belajar) tentang Nabimu dan sifatnya. Kemudian, mencontohi akhlaknya, perbuatannya dan percakapannya. Kerana kamu mengetahui bahwa; sesiapa yang taat pada Nabi saw bererti taat pada Allah.
54. **Tunduk, Dan Patuh (Taah) pada Tuhan:** Caranya: Di sini tidak perlu penjelasan lagi. Sesiapa yang sudah mengenal Tuhannya zahir dan batin, sudah tentu akan sentiasa

tunduk dan patuh kepada Tuhannya. Tidak akan mengemukakan alasan. Yang berTuhan cuma dilidah aje akan tunduk dan patuh dengan cara main-main!”.

Kamu akan mendapati mereka sebagai contoh yang tertinggi dalam menuruti perjalanan Nabi mereka, sentiasa patuh kepada perintah Tuhan, berlumba-lumba untuk mencapai janji-janji Tuhan yang muluk (tinggi), lari dari ancaman-ancaman Tuhan yang pedih, sebagaimana yang tersebut di dalam firman-firman yang kami sebutkan sebelum ini, mahupun yang tidak kami sebutkan, asalkan yang menunjukkan maksud gembira dan bahagia dengan kemuncak kejayaan dan kemenangan bagi orang-orang yang menurut jejak-langkah Rasulullah saw, serta menunjukkan maksud hina dan duka-nestapa dengan kemuncak kecelaan dan kehinaan bagi orang-orang yang melanggar pengajarannya.

اللَّهُمَّ إِنَّا نَسْأَلُكَ بِأَنَّكَ أَنْتَ اللَّهُ الَّذِي لَا إِلَهَ إِلَّا أَنْتَ الْحَنَّانُ
الْمَنَّانُ بَدِيعَ السَّمَوَاتِ وَالْأَرْضِ ذَا الْجَلَالِ وَالْإِكْرَامِ
أَنْ تَرْزُقَنَا كَمَا لَ الْمَتَابَعَةَ لِعَبْدِكَ وَرَسُولِكَ سَيِّدِنَا مُحَمَّدٍ
فِي أَخْلَاقِهِ وَأَعْمَالِهِ ظَاهِرًا وَبَاطِنًا وَتُحْيِينَا وَتُمِيتُنَا
عَلَى ذَلِكَ بِرَحْمَتِكَ يَا أَرْحَمَ الرَّاحِمِينَ

“Ya Allah! Ya Tuhanku! Kami mengaku bahwasanya Engkaulah Tuhan Allah, tiada Tuhan lain melainkan Engkau, Maha Mengasihani, Pemberi berbagai nikmat, Pencipta langit dan bumi dengan penuh keindahan, wahai Tuhan Yang Maha Agung lagi Maha Mulia. Kami mohon kepadaMu supaya dianugerahkan kami menjadi pengikut-pengikut yang terbaik kepada hambaMu dan RasulMu, Junjungan kita Nabi Muhammad saw baik dalam akhlaknya mahupun perbuatannya, zahir dan batin, biarlah kami hidup dan mati atas pegangan ini, wahai Tuhan, kurniakanlah permohonon kami ini dengan Rahmat dan kelebihanMu, wahai Tuhan Yang Maha Rahmat”

اللَّهُمَّ رَبَّنَا لَكَ الْحَمْدُ حَمْدًا كَثِيرًا طَيِّبًا مُبَارَكًا فِيهِ كَمَا
يَنْبَغِي لِجَلَالِ وَجْهِكَ وَعَظِيمِ سُلْطَانِكَ . سُبْحَانَكَ لَا عِلْمَ لَنَا
إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ لَا إِلَهَ إِلَّا أَنْتَ
سُبْحَانَكَ إِنِّي كُنْتُ مِنَ الظَّالِمِينَ .

“Ya Allah! Ya Tuhanku! Engkaulah Tuhan kami. BagiMu segala kepujian, kepujian yang banyak, yang baik lagi penuh keberkatan, kepujian yang sesuai dengan keMaha-Agungan ZatMu, dan keMaha-Besaran kerajaanMu. Maha Suci Engkau, wahai Tuhan, tiada ilmu bagiku melainkan apa yang Engkau ajarkan. Sesungguhnya Engkau Maha Mengetahui, Maha Bijaksana. Tiada Tuhan melainkan Engkau, Maha Suci Engkau. Sesungguhnya aku (kami) tergolong orang-orang yang menganiaya diri sendiri”

Kini selesailah sudah pelajaran dan penerangan “Risalatul Murid – Pertunjuk Jalan Thariqat”, kami mohon kepada Allah swt supaya setiap murid diperteguhkan pendiriannya, diberikan bantuan, perlindungan dan pertolongan dalam perjalanannya serta diperbetulkan dengan kemahuannya untuk menuju ke jalan Allah Taala.

Selesai sudah penerangan dengan memanjatkan setinggi kepujian kepada Allah Taala pada malam 4 Rajab 1430 dari hijrahnya Nabi Muhammad shallallahu alaihi wasalam, dengan diiringi selawat dan salam kepada junjungan kita, dan disertai kepujian bagi Allah, Tuhan seru sekalian alam.

Amin!